

寶硯齋遺稿

無錫程頌嘉先生遺著

寶
頤
齋
賀
稿

癸巳夏初蛻翁署

序

寶硯齋遺稿分文詩筆記書牘聯語日記鈔六類共若干卷無錫程頌嘉諱宏遠之所著也先生卒於民國二十五年丙子六月卒後至今十有七年世變滄桑歲無寧日其孤日勳艱苦抱其先人遺稿無失並請常熟蕭退闇青浦戴克寬撰爲墓誌銘行狀示余更求余爲序將梓而行焉余於先生雖生前未有握手之雅而蕭戴二君則皆我友也今觀二君所作如見先生矣先生遺稿若詩若文若筆記諸種其氣穆然也其識充然也望而知爲有德有言者然先生豈詩人文人哉先生之學本篤實不欺之誠行修己治人之素故自清季肄業南菁出卽以造就人材爲己任次第主邑中及海上女子師範愛國女校等勞心苦志專一於教育者至三十餘年恆久無怠收效斯宏異口同聲士論翕服皆稱爲良師而卓然無愧者也昔嘗慨夫當世大抵詩人多而文人少文人多而學人少我讀先生日記而佩之以爲如先生者則非第學人可謂真切不磨有恆之君子非能求諸今世者已惜乎我伏處里閭未及獲交於先生徒於人往風微之後尙得序其遺書而識欽慕焉猶爲幸也癸巳孟冬金山高燮

泉程
如春

久

黃

合

赤

聽

舞

銘

壘

程君暨妃黃夫人合葬墓誌銘

虞山蕭煥文并書丹篆蓋

民紀二十五季丙子夏六月二十八
日吾交程君頌嘉歿於無錫里第余
為詩哭之越十五季壬辰其孤日勲
書來告曰吾父之窆以世亂不克葬
今將謀窆窆窆知吾父深莫先生若敢
請銘嗟夫修身淋行之士大為世詬
悼方來進既往忍不銘君諱宏遠別
號懺僧晚號罪僧余誌厥考韜雲君
墓世系詳矣君韜雲次子讀書修行

光緒辛丑補錫邑縣學生員壬寅科
試冠曹調南菁書院肄業逾年丁父
艱服除以文行主本邑各小學校遜
國後迭任本邑女子師範女子職業
榮氏女學上海愛國女學諸校取君
瘁於教育三十季祛私徇公約己裕
眾濬蒙以正責效於勤故君之門成
材稱盛君頽豐氣藹剛中柔外遇事
持正義邑政有不便民者輒以文字
爭於當道多蒙其益新安會館者徵
之六邑公建也清季姦人私鬻為貨

棧君以鄉誼起而力爭姦人知不勝
則分某紳以鉅金唱君君峻拒會館
以全然君終隱某紳名當君之長錫
女師範也吳君道逢一宦家女
君聞招入校教養成學與己女同日
嫁嫁具相埒君兩主婚而後己女人
尤異焉平居關懷鄉邦文獻旁搜遠
紹備志乘關遺成寶硯齋筆記如干
卷母氏方太君之卒君年五十餘矣
猶孺子哭踊哀動鄰里自是啟門不
復出不數歲以風疾逝春秋六十三

余交君四十季親知中老而不渝初
志者未易一二數存亡之感寧渠一
人之私而已丹徒莊庸軒平錫邑人
林列君聖門四科之首人以為篤論
君生清同治十二年甲戌十一月十
五日妃
黃夫人子三日照早卒日勲日省女
三學禮適楊學敬天學勤造華孫男
二與點與震孫女三申和舜華益華
黃夫人籍婺源隨父賀遷居常州羅
武壩有聞在室嬪於君得高堂懽子

女說說撫字一身任君館於外脩脯
不給夫人處之以忍諸從娶婦苦宅
隘夫人讓所居而處旁舍如娣閒終
歲難容如馬年四十餘送宦子女層
傷致疾歿於民紀十四年乙丑三月
十二日春秋五十一生清光緒元年
乙亥三月十日葬江陰馬嘶鄉祖塋
今以君合葬銘垂無極銘曰
玄黃黜黷坤靈及覆妖狐煽毒括人
不祿去彼喬木困於幽谷菜婦允肅
鴻妻孔淋異室負穀言歸斯復松阡

嶽嶽罔俾樵牧

武進朱松閻鑄字

寶硯齋遺稿目錄

| | |
|--------|-----|
| 散駢文 | 一 |
| 書牘 | 一三 |
| 筆記 | 二三 |
| 詩 | 三五 |
| 聯語 | 四一 |
| 日記 | |
| 南菁日記節鈔 | 五三 |
| 果育日記節鈔 | 七〇 |
| 旅京日記 | 七三 |
| 師範日記節鈔 | 九五 |
| 被兵日記 | 一二八 |

附錄

墓銘

行狀

祭文誄文

挽詩挽詞

挽聯

一三九

一四二

一四四

一四六

寶硯齋遺稿散駢文

柏源程氏宗譜序 代

吾族宗譜自同治乙丑分修後積於今四十一年矣。蒙祖宗之澤，子孫繁衍，且皆孝友敬恭，各安本務，無晚近驕奢僥倖，一切浮薄氣象，嗚呼盛矣！夫一木之植也，枝葉繁則不能無斜，正雜出之虞；一水之行也，流派遠則不能無清濁各殊之勢。惟吾族人，則父率其子，兄勉其弟，恂恂然一秉於禮，豈非祖宗之澤長而子孫之蒙焉者衆歟？型仁講讓，篤於禮義，故敬宗睦族之意深亟亟焉。有續修宗譜之議，余也以衰老之年，得觀宗族之盛，欣然爲主其事，並告於衆曰：吾族宗譜向統於鳳嶺，自道光年間未曾合修，後遂沿爲例。吾族支修至此二屆矣，同居一村，心志齊而考查易集，卽偶有遷徙他省者，爲時未幾，尙不虞其疏漏，惟作事之難也，必凜凜焉時存一救過不遑之心，而後可以有成功。若視爲甚易，循例編訂，後之人將奉爲定本，苟有舛錯，不敢改易，其得罪先人，貽誤來者，豈不大哉！今欲以一二山野之夫，論上下數十年間窮究其原委，詳訂其本末，此必不及之勢矣。然竊聞譜之爲道，異於史、史者合天下國家爲一書，人民政治、地利、風俗、包舉靡遺，故取於才，取於學，又取於識。譜者以一族之人聚一族之事，人人親其親，長其長，則人人能事其事，吾但求其詳焉而已，備焉而已。至於體例之乖違、文辭之鄙陋，則後有作者不難據而修正也。衆皆曰：然於是說局於宗祠。凡我宗惠公之子孫咸集焉，或任採訪或任編訂，或任較勘，兩越月而譜成，傳曰明德之後必有達人，吾祖宗之明德後世必有以興起者，能切水源木本。

之思繼敬宗收族之志推而大之是又余所深望也夫時光緒三十一年歲次乙巳清和月之吉裔孫某某拜撰

二

無錫縣立女子初級中學校廿周紀念刊序

縣立女子初級中學校將刊行二十週年紀念冊校長顧毅嘉女士詢舊日校史於宏遠按是校原名縣立女子師範學校成立於民國元年發起於侯君保三討論於臨時縣議事會議長胡君雨人以及地方人士咸鑒於師資缺乏男女教育須求平等竭力贊同而議遂以定校址無着即暫賃楊氏私宅開辦首任校長者爲黃君澹如當時編訂年度預算合計臨時經常兩費猶不足二千元蓋草創伊始不得不實行節縮政策宏遠以黃君之招膺國文算學講席暇則贊襄校務翌年黃君移長東林謬承其乏綆短汲深常虞隕越幸風氣尙稱醇厚同學數十人各砥礪學行能以黃君之心爲心取則不遠遂得濫竽者數年今之校舍爲舊金匱縣城隍廟地方團體咸思利用亦以黃君之請而民政長秦君效魯即予批准撥歸校有飲水思源其功尤不可沒當時所最感困難者爲經費不充必待一級畢業始准續招新生其辦法爲全國二十二省所無在是校則不啻已成鐵案無可動搖聞嘗與黃君談地方事業常引以爲憾茲則時移勢易凡曩昔之所困難排除盡淨而規模式廓人數激增與黃君時左支右絀情形大相徑庭可知時機之至如泉流風發不可遏抑當其未至則雖竭智盡能而所願終未易達成念故交已成異物撫今追昔真不知涕泗之何從也

遊青山寺記

山光明淨水色澄鮮從來好景難求一年容易最是秋光未老四野晴和踏遍香塵行經吟社松風一徑未離樵
牧生涯茅屋幾家疑是神仙窟宅若青山者誠附郭之名區幽棲之妙境也癸亥九月僧馮子君輝王子雲軒顧
子經生吳子幹卿作竟日之游烹泉石上選勝山中從負薪乞米之餘分來暇日自鬥酒尋詩而外別寄幽情竹
樹蕭疎林樾曲折遨遊自適歌嘯皆寬後十日而登高閒雲比爛喜五人之爲伍舊雨相僧遠陟山顛行吟谷畔
歷山寺古難尋長史之堂忍草菴荒已散詩人之社惟茲亭臺如舊巖壑依然任吾輩之流連供騷人之憑弔亦
云幸矣致足樂也時則霜酣楓葉雲擁松根艷同二月春花紅出千尋老樹人歸谷口挑來斜日一肩僧話山腰
坐對畫屏三面戀彼景色儘許留題愛此風光何妨小住而乃餘霞盡散暮靄將沉遠寺鐘殘平湖帆落數飛鳴
之倦羽落水荒巢起墟里之孤煙夕陽遠道吟成珠玉載歸長吉詩囊寫出丹青珍重輞川畫本他日買山結約
爲留住處之菴何時挈榼重遊請認嬉春之節

寶硯齋集古瑣記

余於書畫初不之好幼時有李碧泉者婺源甲村人流寓於錫與先君子善以畫花鳥著憶長兄婚時李客吾家
黃昏無事輒強作畫情隨得隨棄不知寶貴稍長習舉業既不知書又不知畫後居家課徒曾購芥子園畫譜選
擇臨撫聊以自娛民國三年長縣立女子師範學校課餘與華君少純遊骨董肆華爲東亭世家頗知鑒別始有
所求厥後與胡君汀鷺同事周君蓮府又與胡君習時相往還竊聞其緒餘歷年所得始以爲奇久而知其無足
輕重習久生厭設法售去者亦復不少就余今日所有楊芝山之桃核長及寬約半寸刻十八羅漢像神工鬼斧

見者稱奇計價銀八元購於觀前街典舖觀音保八言對筆情馳寫爲後來劉石庵相國所祖在松風閣茶肆見之議價未成後爲趙藝經先生所得越年先生壽同人觴於酒樓談次以銀四元易之歸郭蘭石尙先字屏四幅得於常州章雪樵手時客吾邑設骨董肆於倉橋計價銀二十四元蒼瀟款扇廿四頁安鎮汪靜山先生藏得之胡汀鷺手計價銀六十元中多清初名人尤以姜西溟嚴藕漁紀之竹字華坡王武許永山水花鳥爲勝隨後又得董文驥華長發字張槿等畫六頁去銀十元則紙色已舊惟上款爲黃守中先生耆年頌德清初鄉賢之首亦殊可寶此外真精新三字俱全者約五六十頁多爲長女師時所購其三分之一則爲周先生蓮府朱夢華硯弟所贈擬集鄉賢作品爲一集如梁溪詩文鈔例愧未能也尺頁以裘君歧伯割愛之一小冊中選出陶紹原華題蓉沈旭庭焦仲梅等四頁爲勝焦作野田風景尤推逸品去銀五元秦梧園山水絹本袖珍尺頁十二方另各系一詩紙寫亦十二頁去銀三十元泮清夫人江樓橫笛圖冊有絹本圖一方夫人諸父及舅姪文各一首陳蕊卿女史詩一絕餘爲邑人許湛華得之嶺南徵人題詠者圖爲絹本中有摺斷痕因並原文原詩重裝一橫幅懸之座右以寄望古遙集之思此冊得價最廉僅費番佛二尊直幅有絹本許右史牡丹孫子滿贈錢梅溪詩并序均覺可愛約各銀五元翁小海花鳥小軸則甥女華四箴贈因余歷年訪求翁氏真蹟不得自海上購歸報以趙石農刻壽山昌化石章五印泥盒一甥女能詩工畫亦足當之先考軫雲公遺像係古硯一方趙君石農刻硯亦趙君所贈先君像僅泰西攝影一紙三十年來已極模糊趙獨心摹手追得其神似殊堪寶貴同時蕭君退閣有寶硯齋篆額之賜此事發起於五年前至甲子新春始成亡兒師錫時時在念悲未及見以貽吾孫與點冀其讀書行善克紹家聲大抵物之成毀聚散均有數存焉學不充識不廣財不富裕銖積寸累僅資展玩不足以言收

癡惟心力所瘁獨此區區且思天下之物當賴天下人分寶之使余身後凡祖宗所遺能知寶貴卽爲孝子慈孫如余所有但不輕易錢米俸物仍完好歸諸其人卽爲能體我心庶於物亦無枉棄焉又歷觀各事均關天命豈獨書畫遂可以己意強耶噫甲子秋八月江浙戰起邑多逃亡夜窗無事書以誌感罪僧程宏遠

半亭記

先君子卜宅承賢橋南同時別購蔣氏地數弓於宅之西北隅臨河建屋兩楹繚以粉垣余少時曾讀書休憩其中後昆季皆婚娶子復娶婦先君子所營宅不足以居於是余就臨河之屋居焉時屋經添建有四楹足供食宿余不常家居子若女復就傳於外門庭清晏容膝易安中歲長子次女相繼不祿覺人生有涯老之易至而人山不深入林不密心煩慮亂一時境地具形狹窄於是張君伯聲顧君蘅泉者爲介紹毘隣姜氏張氏基當得姜氏基時卽面南構一亭偁於勢方不盈丈後得張氏基續謀建築擬毀亭恐涉勞費遂中植以屏分半與別室通而亭得其半焉夫天下事又烏能得其全哉余生五十有五年矣心之所欲或係於天或係於人均未能得其全者則亭之有半適與余遇相稱又何慰焉且世變日亟飢寒顛頽之人不絕於道是皆欲求其半而不得者則余之有半又安知非造物之獨厚其賜歟因感而爲之記

幼嬉圖跋

宏遠不德生五十七年矣少時依依膝下如在目前吾父性嚴整然於不肖兄弟少所笞責經商外常購書誦讀

寒暑不輟吾母於不肖兄弟男女七保抱提攜澣洗補綴未嘗稍閒吾兄菊村年最長次爲適華氏姊次適鄒氏姊而宏遠於吾兄實小九年與三弟貽孫年相若適丁氏妹及幼弟敬堂又小宏遠者逾十年故居恆嬉戲長兄幼弟恆不相爲謀惟與三弟俱牆陰屋角時有二人踪跡宏遠善挾彈百步外能跳躍命中其術實得之同鄉戴某戴額有創忘其名亡命來依其族某欲謀一業以自活性誠篤喜與童稚游三弟善踢毬亦戴製能連續踢至數十百千而不倦不墮隣兒亦服其能常旁立睨視愧不能及而我二人者又各事其事不相爭競及揣父母有命則潛肅而人以故吾母於諸孫前恆繩不肖兄弟幼時之善以爲無近今惡習而不知其背於父母亦自有所爲樂者在也特與里隣諸兒則常相友好永無違言以是吾父母常不之覺今椿萱並謝抱恨終天欲求如少時之挾彈踢毬已不可得王子雲軒有少女繼平以通家之好爲寫余母像而肖因更乞寫吾父母而并及余兄弟姊妹七人圍坐一室如當時狀余與三弟仍挾彈踢毬不掩其惡惟貌爲今日之貌而事則昔年之事以誌感也嗟乎人事何常

日勳謹按是文 先君作未終篇圖亦未見倩寫殆擬意後別有所感因而中止也

跋卞玉京像

玉京道人墓在惠山錦樹林祇陀菴之原見吳梅村詩集楊蓉裳芙蓉山館集有過錦樹林吊卞玉京詩麟見庭鴻雪因緣稱於惠山之麓遇清微道人云將傍卞玉京墓種梅百本自營生壙年湮代遠玉京墓固杳不可知清微墓且失其所在吊古者憾焉周君寄湄得玉京像於秣陵款暑癸巳仲春吳門孫璜摹上有舒固卿題詞孫與

舒均名不甚著驗之紙色或爲乾隆之癸巳則已時越百年矣慨古墓之不存幸斯圖之尙在因情許君光敷爲
摹一紙並錄舒題藉以見滄桑屢易人事不常而尙有此本流傳人間不可謂非古人之幸耳辛酉新正五日黃
山三十六峯罪僧識於無錫之自在菴

公園同人祭錢季常先生文

嗚呼哲人其萎風景不殊大雅云亡酒賦無續枉却一園花好病臥三春愁聞五夜鵑啼魂歸四月惟先生身通
六藝目極羣書人頌清芬振家聲於吳越門多通德綿世澤於箕裘播姓氏於雞林文章有價勞精神於象譯數
理成書絳帳譚經白眉著譽研求法學博通能冠其曹保障人權清慎不虧所守林泉小憩風月清談抽筆墨之
餘閒樂親朋之情話期無不至役必相從今者人琴俱杳空彈高山流水之音風物依然同抱落月停雲之感情
聯花萼好尋舊有諸昆契結苔岑又獲新知幾輩別開境界免看人世紛爭脫却風塵畢竟神仙安樂無窮想望
不盡低徊月挂一鉤遲君不至花明四壁悵我何如奉以瓣香當爲樂公立社譬之薪火佇看伏女傳經生死殊
途幽明異路十洲三島風光儘足流連萬歲千秋魂魄猶應戀此持斗酒隻雞而憑弔期雲車風馬以俱來嗚呼
哀哉尙饗

代祭張雨亭夫人文

嗚呼福滿璇閨期萱堂之康健魂歸蓬島極梓里之哀榮攜杖有夫式好訂白頭之約入門爲婦相與與赤手之

家慶集一堂獻羅四代固已極人倫之樂事而歎福壽之能全者矣某某夫人生逢離亂境歷速遭鳳鶴初平膠鸞始續家儉而鷄豚逮養能諳食性於君姑日夕而牛羊下來預卜歸期於夫子春秋偃蹇歲月淒涼迨後海宇安甯邊塵靖息解甲歸華山之馬恥語封侯含辛牽沫土之牛遠行服賈一肩與共曾並挽夫鹿車兩心相同堪媿美於鴻案惟識時者傑願遷地爲良於是明月二分別伯鸞之故廡煙波萬頃泛范蠡之行舟甫卸征裝爰投賓館夙與夜寐依然斂荆裙布之常節食縮衣未改力穡耕桑之舊無何門庭大啓蘭玉挺生拓漢家于公之居門容旋馬守周室后妃之戒旦聽鳴鷄僧老堪娛方興未艾拜手頌多福多壽子早生孫快心皆佳兒佳婦孫又生子而乃徵音違杳婺彩長縉某等誼託絲蘿情聯縞紵入集賢之里記曾拜母登堂過通德之鄉且沐留賓投轄人天永隔仙佛同歸對月興懷莫慰黃門之痛采風紀實宜揚彤管之芬爰束生芻追思慈範奠北堂之杯棬口澤猶存薦南國之蘋蘩心香共爇嗚呼哀哉尙饗

退僧自述

宏遠皖南婺源人同治甲戌生常熟西鄉烏墩長兄生十年繼以長次二姊然後及子母病新痊人以爲瑞故小字瑞生及長常戲署懺僧言抗屢走俗如僧人拜懺非上乘也中年長子次女並亡妻復病歿蕭然如僧而罪孽未清又自署罪僧邇來心力俱衰事皆退讓遂改署退僧少時喜出遊不知向學嘗兩應常熟登山嘯傲臨流觴詠以口音相同無詰之者其來應無錫試也以族叔立勳入邑庠在先負笈出入人亦安之念吾人託業及一衿得失亦有命存焉猶記余幼年入塾但貪逸樂讀書數年毫無所得吾父偶令背誦怒不可遏指生書二葉令

熟讀背誦時方喜閱小說默觀強記未暮卽畢後不令習商而使讀書實始於此然至今碌碌無能虛父母期望亦以此也辛丑府試病偏頭痛下午更劇故交卷獨早府尊德元誤認爲文思敏捷置諸前列壬寅科試一等以足疾讀晉書怪晉人放誕故國亂未已入場史學題爲傳咸上書併官省役務農論遂以居官廢事不僅可併而且可殺若官得其人則役自可省農自可務等爲言閱者是之調入南菁肄業癸卯秋先君子棄養兄弟均經商於外諸婦妯娌侍老母於家門庭景象爲之一變不得已辭歸訓蒙時子姪七八人長者未十歲幼者五六齡婦女昧於教訓非故縱卽酷罰飯時叫囂尤甚奉老母命食與同桌有遺粒責令拾取納諸口惜皆中才曇花一現如吾子者無論矣其餘亦僅浮沈市肆無卓然自立者人事變遷後入補公學堂七年果育學堂一年女子師範六年石塘灣小學一年愛國女學二年職業女學五年榮氏女學五年長此自誤誤人殊覺疚心庚午夏老母復見背悲人生之如夢念形役兮何爲遂重理舊業閉門家居吾兄弟四人兄十年以長常敬畏之季弟又小於余十歲且從余讀惟三弟年相若且嘗同塾親愛之情有出於不自覺者今兄弟髮皆頽白子又生子無慮數十人人情合則親分則疏久久相離安知不視同陌路故強爲結合納諸一堂方今風俗日偷城市尤甚孩提之童欲令悉出於正惟有責之讀書六經爲人根本儘有詞句淺顯明白易知者故常爲刪節以省時日秉性不同或護厚有餘或跳躍自喜將來果能無忝祖宗與否吾不知也

大學孔氏之遺書而初學入德之門也於今可見古人爲學次第者獨

賴此篇之存而論孟次之

學必資乎典籍當擇要以詳其序焉夫大學一書其爲孔氏之所遺者無疑矣而初學以是而始則所謂論孟者其次第不可詳審乎且學者幸生中國文明之會當載籍極博之餘固不難遠紹旁考古而得前人之秘矣顧博雅爲難貫通非易過鄒魯絃歌之地車服猶存溯齊梁遊歷之年風流未艾後先濟美而輝映一時中國言六藝者得託焉豈猶曰抉擇之未精也今夫人之學也資乎書而書固有純駁之當辨書亦有次第之宜分伊古以來凡著一書立一說有以顯名當世佑啓後人者不一而足要其集羣聖之大成開千秋之盛業煌煌乎津梁後學嘉惠儒修遐哉其惟我孔子乎昌平開講學之基而東箭南金悉受裁成於函丈故或則親承指受抱緒論於當途或則業繼纂修切昭垂於來許而追隨無自者且私淑維殷屋壁有遺經知蟲鳥有靈亦以寄繼往開來之大任洙泗爲傳經之藪而春風化雨早深灌漑於及門故或則有志潛修極講求於古詣或則澤躬爾雅深紹述於斯文而仰止不遑者且願學是切尼山有定本而餉遺靡盡自不同百家諸子之爭鳴大學一書其遺於孔氏而足以爲初學入德之門也久矣願簡冊有不言之蘊而徵文考義聖教無流派之分修途有託始之基而互訂參觀自古有緩急之別刼經秦火殘編斷簡之恨深疏出漢儒闡幽表微之功少不爲區別古人之所學不著即古人所學之次第不彰而著述在聖門且有齊魯諸家之聚訟修明在王道將與荀楊諸子而同觀古人之不幸

豈非生於今者之不幸哉而吾蓋有以序次於其間矣望古而考先民之著作鴻章鉅製非不彪炳於人寰然繁而鮮當足以煩常人之涉獵不足益修士之身心初學將望而却步矣吾也經數十載之研求而知大義微言各有不容泯沒之故有大學而後有論孟有論孟即當有大學其取舍可默以定也如碩果之僅存而雨雪風霜不能蝕太學校勤之本英賢繼起得後先闡發殷勤成衛道之功夫豈非留遺之有在哉入室而思古籍之紛披綠字赤文幾若浩繁於煙海然博而寡要祇以供華士之取求不足以益修儒之德業初學將棄之弗顧矣吾也歷半生來之參考而知先作後述實有隱相表裏之端知大學而後知論孟知論孟即不可忘大學其離合若互爲主也幸先型之未墜而涵濡沐浴彌足昭後人趨步之方賢傑代生又比附周旋議論扼當時之要夫豈非位置之宜詳哉吁史氏藝文亦有編目標名之舉而考訂未精其體會故收藏雖富祇以見一朝學術之降入學肄業當詳豪養作聖之功而編摩旣極其精純則取法靡窮方無愧畢世依歸之正由是而學其有所差者鮮矣此吾所以念大學而不置也

織文鳥章白旆央央元戎十乘以先啓行

振振而出登車有光矣夫織文鳥章白旆央央所以紀軍容之盛元戎十乘以先啓行所以壯軍國之威以伐獯猶何虞不克哉且自仗鉞以麾切景從者八百國秉旄而誓徵同德者三千人我周威武維揚固無不陸讐而水慄矣乃軍容如昨中國不忘振旅之經而撻伐未加蠻夷先有稽夏之志一時風雲變色旌旗蔽空同仇偕作之餘已殊覺先聲之奪人矣如獯猶之侵已至於涇陽矣其時奔走而告者邊吏之倉皇也左右憂憤者人民之擾

攘也而師出以律擅專閫之威權行必有功肅長途之號令爰命軍吏乃建我旄則織文鳥章也亦樹之旗則白旆中央也轟雷掣電卜我武之能揚逐北追奔冀敷功之克奏而於是三軍兩發多士雲屯建大將之鼓旗塞邊隅之險阻熊羆逐隊看我國士盡千城螻蟻難逃料伊敵人將捲甲蓋旌旄所至洵無堅之不摧車甲所經已羣情之共懾所謂運籌帷幄之中決勝千里之外古之將帥才其措施類能有此所以功成告廟飲至策勳輶戈斂甲洗天半之銀河偃武修文集環球之玉帛而異鄉殊域側聞元老壯猷社稷人民倚爲北門鎖鑰所向輸誠四夷賓服豈能泛泛而致此哉遐哉真不可及矣

寶硯齋遺稿書牘

爲保全新安會館上金匱縣令書

竊生等均徽州府婺源縣人自祖父以木業經商居錫新安會館爲徽州六邑公地會館之興革當與六邑人共之吳圻等強詞奪理謂婺源木商另有新安分所不應干涉新安會館之事查新安分所建設於道光初年費出婺源一邑故分所爲一邑所獨有然自設立分所以來各同鄉對於新安會館熱心如前兵燹以後稟請清丈會館基地有婺源人江人鏡等爲之首厥後集資恢復婺源人隨衆樂輸未嘗自外有同治七年縣卷可查有歷年新安會館收捐執照可證若謂經理會館近係歙人其餘各邑卽不應過問是必改新安會館爲歙縣會館可謂經理會館半係典商其餘各業卽不應過問又必改新安會館爲典業公所可否則凡籍隸徽州者人人有保存會館之權此宜明辯者一也天下事不恃人之不知而恃有可以告人之道使吳圻等無害於會館雖至今不問可也惟其貪橫不德無公理公法可言故同鄉從而爭之爭之不獲始出於呈控會館之被毀在去年十二月二十以後同鄉之呼號求救亦不自今始堆棧竣工已在生等呈控之後可見事無遲早要以吳圻等今日所爲是否合理爲斷若必以直爲曲舍本逐末恐同鄉遍於天下起而爭者尙不止生等數人當前數月謂生等爲非將必以擅拆會館者爲是矣天下有是理乎此宜明辯者二也會館之成雖從前各經理之功而所以成此會館之費則六邑人士其分其負担中祀先賢有關典禮此外片牆寸土無非桑梓敬恭之地堆棧則吳圻等三數人

之私權衡輕重宜拆堆棧以還會館明矣若謂成功不毀我會館已成功數十年何獨不蒙法律之保護而宛被拆毀乎况其喧賓奪主門面十二間無一非堆棧之屋大門之上額設大有字樣旁關兩門無不皆然而會館反無一隙可尋一門可入此何等景象謂稍有人心者能相安於無事乎此宜明辯者三也世惟一二人所爲之事可以一二人之私壞天下之公生等爲同鄉各團公舉而來同鄉千百人人有監察之權何所容其覬覦况從前會館歷有盈餘同鄉均人人自愛從未過問豈今日會館已殘缺不全所有脂膏被吳圻等吸收殆盡負債數萬金危如累卵轉欲步人後塵安生希冀乎至登報一節係詢問去年領銜稟案之黃恩煥等亦是非公諸大衆之意此宜明辯者四也查吳圻等所稱一若有會館不能不拆堆棧不得不建之勢則請得而駁詰之從前會館所入有漕米兌運局年納房租洋四百元各同鄉捐輸亦數百元支出之款惟歲修館屋一項不及所入十分之一其餘則飲食宴會而已既無別項公益可辦則會館之儲蓄自日積而日多即使偶事擴充用款不敷當就同鄉議捐以清界劃斷無剷除根本拆毀已成之屋讓主權于人而可謂有益會館者此應行駁詰者一也使拆毀會館改建堆棧於會館果有絕大利益則亦已耳乃問之項崇禮初據答稱共用洋三萬七千元每年須償息三千七百元而房租所入僅有洋二千五百元以租抵息年不敷洋一千二百元及後同鄉不服風潮日緊又據吳紹成答稱實共用洋三萬五千六百五十元周鑑之稟則稱三萬二千元今姚觀福等稟則又稱實用洋二萬五千元伊等均自認爲經造此項棧屋之人而數目不符前後相去有一萬二千元之多其朋串弊混已可想見據同鄉訪查此項棧屋實共用洋一萬五千元係吳圻等數人所集湊故究用若干終無定數稟案之詞尙敢如此嘗試其對於同鄉可知此應駁詰者二也就錫金兩邑論有地各人惟有租地與人任人造屋作用地主但收地

租不問其造屋用費之多少如同仁堂以餘基租給商人建造同仁堆棧某姓以餘基租給裕甯建造官銀錢局均從此例從無借債造屋將屋出租之理蓋借債則負息重出租則獲利輕且多屋多險設遇不測屋去而債仍在其不致以地爲徇者幾希故利害分明人人能辨之也吳圻等所爲明欺會館係同鄉公業同鄉或不之覺操縱自如不復顧及將來此應行駁詰者三也查周鑑之稟稱二十年後會館可得絕大事業姚觀福等稟則又稱二十六年會館方可將棧屋收回既各稱訂有合同何措詞尙不能劃一其爲飾詞朦朧訴已可駭笑惟就其訂有年限而論似乎會館但租地與人而非借債造屋蓋地方風俗租地與人亦有估租客造屋之費共值若干分年抵作地租者年滿之後將屋歸還地主而地主無絲毫責任若借債造屋則其債之能償與否須視其所造之屋有無風險且必視地主之財力能否清償方有把握否則盡屬虛談無關實際此應行駁詰者四也牛等忝居此邦不忍坐視會館之廢故起而與爭若夫義利之辨夙昔尙堪自信（下略）

投錫金商會節略

謹將新安會館被毀估建堆棧詢據同鄉公論有不能不爭者三大端徑代表瀝陳伏維公鑒

一、會館爲六邑公地不能以幫分也查新安會館實始於婺源木幫百年以前由鎮連蘇木植常虞船隻阻礙門毆生事故設立會館於運河之上以便照料其捐多半出自行商現在婺源木幫所建新安分所尙有百年前新安會館零星舊賬可查厥後木幫漸衰他邑同鄉居此者日多前人推桑梓之誼合六邑而一之會館遂爲徽州人所共有然盛衰興廢事本無常道光之初婺源木幫復盛會館已爲郡人所公有遂於會館

之外別立一幟在無錫縣屬惠山地方另建新安分所每年仍撥捐錢若干千文於會館以示補助意至厚也今亮壩新安會館被毀婺源人爭之者衆各該人遂飾詞拒絕謂婺源木商另有新安分所不應干涉新安會館之事及後新安分所執有新安會館收捐執照可證則又捏稱此項捐錢爲新安分所應出地租謂新安分所之屋係租新安會館基地而建有生以來此語實未之前聞試問我新安分所租地契安在若謂婺源木幫既有分所其餘各人卽非木商亦不應過問則同治七年稟請清丈之時婺源人江人鏡爲之首同治七年以後又誰將會館公權出賣與人推各該人之意並非拒絕木幫亦非拒絕婺源人但有發其陰私抱存會館之志者則拒之不知現在所與爭者不盡出婺源人之意亦並非木幫之意若論籍貫則婺源外休甯歙縣黟縣均有之若論職業則木幫外漆幫茶幫布幫均有之以宏遠言祖籍歙縣寧墩中遷婺源寄居此間有譜牒可證謂之爲歙人可謂爲婺源人亦無不可希孔則朱子之裔也爭所當爭亦將敬其祖宗拒其子孫乎不自咎其行爲之非乃欲以業爭以籍爭無理取鬧多見其不知量也蓋心苟無瑕何恤人言使各該人具有天良於會館絲毫無損則足以謝一邑卽足以謝六邑否則凡籍隸徽州者不論爲農爲工爲士爲商雖五尺之童皆可起而與爭天下無閩郡會館被人屠割佔據郡人士可俯首無言者至其以典夥經理會館遂謂會館爲典夥聚議之所此等不法之談尤爲可誅究竟會館爲閩郡捐建抑僅爲二三典夥而設言之顛倒一至於此無怪其膽大妄爲將閩郡公產拆占自由窺視同鄉也直道猶存應將新安會館究竟爲徽州六邑所共抑僅爲典夥私產何以郡人士不能過問明白判斷庶是非可得而言矣

一、不交原限任憑公同核算不足以平六邑之氣而明經理人之心也查現在所爭皆爲會館利害起見欲知

會館利害非歷查從前會館原賬不可會館資財皆闔郡同鄉所捐集經理者不過代衆經營斷無藏匿賬據之理各同鄉有隨時盤核之權故稟奉縣批准予照會貴會查帳賬據是查帳賬據爲此案根本當前最要之舉乃各該人獨匿其原賬不肯宣示僅以抄賬一紙敷衍塞責查新安會館勸捐縣示給發於同治七年各該人呈縣基圖亦註明會館前造建自同治八年何以當時收入支出各款並不開列直至同治十年爲始顯因會館前造被其拆毀恐同鄉照價勒賠故匿不提及又改建堆棧與遷移丙舍事屬一起係宜統元年十二月二十以後有該董等稟縣之詞可證何得將此項用賬開入光緒三十三年即使新丙舍基地係光緒三十三年購買亦但當開支地價不應將後來各費牽連混入且旣稟明有案稱以各屋舊料移建矣何又浮開造屋費錢三千四百五十一千五百八十一文又續開東邊丙舍費錢五百二十七千三百七文仍留西邊不言兩共已合錢四千串左右現在所建其費若此從前之屋所值可知一出一入應共損失會館錢八千串左右又後面新購基地一畝九分八釐二毫係宜統元年八月爲會館價買其價若干未據開列若爲各該人之私產則亦已耳若欲爲會館價買開入會館用賬豈非因各該人欲改建堆棧營私舞弊借債之外又層層剝削損失會館鉅萬金耶總之抄賬可任意開報無從核實一經吊齊原賬則前後自了然也

一、私借私支私立頂首房租各契萬萬不能承認也查會館未拆以前積蓄甚多無一事可辦何致患貧乃必飾詞少拆已成之屋夫改建堆棧者並非爲會館生利計但陰謀暗算以吞佔會館耳不然人言可畏已共知其用洋一萬五千餘元其餘均屬浮冒即使涓滴歸公當如同仁堂以公基出租與人建造同仁南棧例

建築費歸棧主墊用屋成之後盡作押租概不起利地主月收地租洋若干元存棧逐月加息年以十二月計算遇閏則十二月計算以冬盡一月爲房屋修費其餘逐月存積至押租之數則棧屋歸地主收回設中途遇險以押租抵過地主無絲毫責任今新安會館何以獨喜借債且情節離奇一望而知查借債若干均爲起建棧屋之用及後工程加大係有益該棧之事何以不向棧主加借轉以求諸四典一莊兩棧著謂棧主不肯則工程照舊不必加大且加造樓屋四幢係在原估之外棧主既加出頂首二千元矣何以加頂不加租豈四幢樓房在天外飛來棧主應額外得福無庸加租耶上漏下濕歸房主修理水火風險歸房主承當是於會館則處處喫虧多債於棧主則着着便宜坐享其成使吳圻而非棧主安肯色色迴護實心實力若此况開設四典一莊兩棧既非徽州同鄉又非該棧股東與會館風馬無關而獨肯借無利之債與會館亦一奇也實則用意奸險無出其右者蓋此款如何棧主加借前後一起攤還卽照伊浮關之數計二十一年一月可連頂首一律還清惟其前七年拔還另借之款致七年無存積在今日約略觀之似無大害及爲反覆籌思會館之喫虧有不可言喻者蓋將此七年移在十八年後則七年之息應滾存洋二萬八千五百元爲是爲非可覆按也至現在該經理代新安會館立出房租各契係在九月初旬涉訟之後背棄私立不作憑證蓋同鄉在六月中旬未訟之先曾一再親往查問當據答稱尙未書立最後又有同鄉詰問公函可證茲何以忽有五月書立之契出現况會館爲六邑公地出租與否須得六邑公認則歙縣典夥四人不能爲六邑之代表應將此項私立草據情形另稟爭控作廢再會館被毀固吳圻等之不法實亦由吳紹成共事之金聲甫從中圖利慳慳而成該夥非徽州府人確然無疑前於六月中旬宏遠在吳紹成處當

面詢伊籍貫伊竟不自知爲何縣人冒稱徽籍插身干預會館之事害及會館尤應鳴鼓共攻現在異口同聲是否情實抑係誣指不妨照查附議

爲催請秉公追查新安會館賬據致錫金商會書

啓者新安會館一案蒙貴會於九月二十五日開特別會議時列入公議當因案中主要宜先令會館經董交齊會館原賬聽憑各同鄉到會核算劃清會館與堆棧界限既清是非乃有定論全案可以就理各議董一再討論公同議決卽會館經董亦當衆聲明願將會館原賬呈會核算至今情景如昨人人聞之卽人人能言之乃議決未久忽稱會館經董不肯將原賬呈會查貴會爲秉公之地多數議董皆秉公之人集多數秉公之人於秉公之地正式提議議決之件其價值可以想見豈一轉瞬間可任意變更作爲無效况會館經董會當衆聲明願將各賬交會則今日之不願又誰實使之總之會館爲同鄉公建同鄉有責成該館董交賬之權該館董無匿賬不交之權貴會爲地方衆商所託命尤宜嚴守法律以維持公論會館計卽所以爲貴會前途計幸辱教之

致商會坐辦華君書

昨日面承明諭憐其愚拙不忘夙昔之好誨之惟恐不至言言金玉可泣可銘年來風塵僕僕舍己耘人隨今世所謂教員之後致學業不精去道益遠往往有過於自信孤行一意之處生成頑鈍幾不識世故人情爲何物可憐亦可自嘆夫一事之起情節紛歧固嘗有窮年莫究累世莫殫之勢然執其大綱不外是非二字是非既明雖

萬變不離其宗新安會館一案姑勿論孰是孰非即以現在核賬而論如謂賬可不交則亦已耳交賬到會謂惟會可以包掃一切不必公同核算則亦已耳乃既語及不才而又若深忌不才謂該賬只能一看不容抄謄細札是有意爲難視不才如龍蛇惡物可遠而不可接又視不才如泥人木偶全無性靈可憫而兼可欺使徒負看賬之名而不得看賬之實不才何苦空尋煩惱自欺欺人如不獲已許其愚妄請以一人之身盡十日之長用力鈎稽俾得稍知底蘊持釋琴疑否則塗飾敷衍非所敢聞敬布區區幸辱教之

分致商會各董書

新安會館一案其要素在先查札會館從前出入賬目以清會館與堆棧界限方能提議各事故縣署特變通成例以會館之案照會商會藉憑公斷二十五日會場提議此案之時經兩造宣布節略之後蒙公等在場公同議決先令會館經董將會館原賬檢呈到會聽憑各同鄉核算再議辦法當時會館經董亦曾當衆允從乃案經公決之後昨前兩日忽又有該館董不肯將賬呈會之語究竟商會當衆公決之件是否可以作廢一律無效抑須稍存顧忌藉彰公道再兩造呈會節略所以備公鑒而辯曲直各同鄉所具節略呈送至會之第二日即據商會聲稱被總理薛南翁帶歸私宅遺失及補繕送呈至二十五日會議時又稱總理未到物在總理身旁不能公布幸同鄉備帶原稿當衆宣讀藉以稍申公理不然僅憑該館董一面之詞是非從何而明此等舉動皆足召人口實殊非錫金各界期望商會之意事關會場議事大局除續具節略到會力爭並函各議董外乞伸公論力予維持敝館幸甚

爲保留學田事呈江蘇省署

爲縣有公產不應變賣請飭永遠保存以安輿情事竊無錫縣屬向有學田義田賓興田計共二千四百畝零係從前縣屬士紳捐助爲體恤庠序多士之用自教育款產經理處成立即劃歸經理凡百事業仍賴挹注於本年一月卅日忽由該處召集各市鄉董事議決將上列田畝儘數售賣以增收入等因在該經董等擬售賣此項田畝之理由無非謂學田賓興田銀漕向由佃戶自行完納田單由佃戶收執經理處所管租籍祇有佃戶姓名及租額數目並無千號畝分細數設使原佃亡故或鄉間經手催租人將田佃藏匿不報則此田無從查究甚至佃戶已將該田變賣而暫還虛租數年之後欠租不還差提追償而該佃聲明並無此田不能虛還田租該處即無從追究必致全歸消滅等語查縣屬田畝均有魚鱗冊籍分區掌管官府徵糧人民承業悉惟糧冊是憑此項賓興學田畝分號數雖爲該經理處租籍所不載然縣署檔冊斑斑可考况田爲公有在鄉里婦孺咸知何從隱匿使如所言數年後即無形消滅則此項田畝爲地方公有已數百年何至今仍絲毫未少俾該處得繼續經理至催租人等向爲該處出資雇用該處經董有完全督率之責更不容有將田佃藏匿諸弊伏念地方公產消滅則易創建則難清查整理事不容緩變更售賣情有未順爲特附呈報載議案一紙懇呈鈞座俯念地方公產飭縣永禁售賣並責成該經理處清查冊報藉維公益

寶硯齋遺稿筆記

止水祠

止水祠者高忠憲公擇瑤禍委身清池以全國體而因祠之池上者也池在居地後園卽今水曲巷底公旣緣瑤禍家毀第隨他售順治間高氏族人彙旃念此一泓實忠憲全歸處人足流芳水亦不朽捐資贖回葺屋其上請於有司而俎豆之義也禮也其後彙旃歿遂配饗焉

忠憲墓址

邑志公墓在燦山朱君夢華館河埒口時爲余言實在燦山之東南距山約里許卽自河埒口通慧山之馬路旁平田內並偕余同往瞻拜始知邑志之謬後屬高君涵叔查家譜得所葬地爲鳴字一千二百六十三及一千二百七十七兩號計糧三畝一分二厘七毫

誦芬堂祀考

閱高氏嘉慶間譜惠山忠憲祠增建誦芬堂記謂乾隆元年詔修先賢祠墓子孫恪遵重建復於堂左築誦芬堂祀公先代孟永耕樂省軒雪樓黃巖父靜逸本生父繼成暨兄弟明陽字初沖玄默齋彥和聲野而公之子伯珍

仲聚季遠并從孫察超楚培尤克紹家學有功于公者悉置主祀焉其先王祭川先河海之義也云云按誦芬堂從祀凡以崇德報功昭示來許後昆之功在祠墓者皆得置主祀乾隆五十四年高氏族人名象郝者以捐田租充忠憲祠墓錢糧修葺之用得傳族送祔後孫其壽其德又捐田充公亦得傳知通族送祔焉

龔毅所

俗傳明浙江布政使邑人龔毅所先生勉少貧苦有避債詩云柴米油鹽醬醋茶椿椿都在別人家明朝大年三十夜綠蘿菴裏看梅花然考先生家譜父某以商起家裕於財悔未讀書故課子甚勤則前詩非先生語明矣綠蘿菴在東門外至今尚存

秦宅門聯

明尚書秦金宅在西水關相傳其門聯有九轉三朝太保兩官五部尚書語某鄉人羨之歸亦書榜於門有非之者鄉人口君以爲誤乎是必誤在西水關余不認誤也今邑人尚襲用此語以嘲不自認錯者

馬忠肅公故居

余嘗訪問馬忠肅公世奇故居在城已無知者邑志亦未標明後執教蕩口果育學校其地與甘露咫尺密邇始知在甘露附近土名蔣梅棚下嘗偕友人往訪屋已無剩有老桂一株土人謂尚係忠肅手植云

陳讓庵像贊

同學陳君瑞周出示嘉慶二年其高伯祖岷山所輯家譜有乾隆乙卯秋仲八十三叟素園王游序大致言陳氏此譜其第一世爲宋相文正公康伯八傳爲邊錫始祖師慶又八傳爲湖廣方伯讓庵其才品卓犖見邵文莊寶像贊倪行人峻曷表由方伯至今歷四百餘年皆潛德弗耀同邑若工部勉光州守以忠及東林名輩幼學俱不及凡淵源一本者則錄之求其的也云云又凡例謂讓庵墓表像贊俱諱禮讓邑志貢生表則名禮官湖廣布政司無讓字豈選貢時名禮至通籍後加讓耶抑以公號讓庵遂從而訛之也且選貢年分譜與志亦不符竊思譜本一家之言而志則千百年來傳信一邑不可誣也今則從志改定譜載邵文莊題待漏閣像贊此大方伯讓庵陳公趨朝時耶予嘗慕其有潤身之學經世之才乃今獲一覩其風儀蓋其始也爲才部郎經籌給軍國之用其終也爲名藩長承宜究德澤之施寵遇受九重之獨眷譽望起百辟之相師此靜寄先生表公之臯道者豈我欺也吁嗟若人其諸前輩之可瞻依者乎嘉靖甲申九月旣望資善大夫南京禮部尙書予告侍養前戶部左侍郎都察院右副都御史總督漕運二泉邵寶贊

鐵莊感舊記

陸紫宸先生楣一號鐵莊善古文有鐵莊集行世邑志稱其幼孤讀書雞棲豚柵旁但所謂雞棲豚柵者果何在耶問之父老已無知者嗣讀黃堯咨先生錫金識小錄始知先生爲東鄉毛道橋人戊午七月二日起獨早是日

立秋淡雲微風略具秋意步行出東門至九里庵稍憩復前行過東亭鎮開毛蓮橋所在途人指在北錢旣至岡一小市集也時方卓午農民入茶肆小憩者相接余亦入坐問之羣稱陸鐵莊者莊名非人名也前明有陸氏買以鐵起家故其莊曰鐵莊四面皆港汶蘆荻青青一望易迷必待人導行乃可又曰莊有石獅二其狀甚奇古吼山寺僧擬以重價購之未允猶分時桑田中莊上人家初皆西向形勢絕佳而子孫貧困謂恐無福消受改而南向今則貧困如故也少頃有陸全官者至形容枯槁髮已半白老農也聞人言及其祖宗欣然曰余祖固天下士也客何來因未及坐導余行途見集之東有昊天大帝廟廟東卽毛道橋過橋而北爲河南巷卽先生訓蒙處又南行約半里許卽先生所居也曲折入村有年輕於全官而輩分較長名來寶者導觀各處柴門臨水矮屋數家均非當時之舊僅有所謂奇古之石獅則仍西向踞桑田中耳指東南荒邱示余謂卽先生墓所行數十步至墓前墓南向有石碑鐫清故處士等字下不可辨左右皆子姓叢葬者墓東南復有丘隴獨高臨河東向松柏蒼翠謂係先生祖墓墓門有碑惜叢草沒踝未能往嗚呼讀書能文則報本之意多凡祖宗丘墓所在必竭力經營之及一身旣歿而子孫貧困往往不復能以先人之所以事祖宗者事其先人以余所見如邑人周懷西先生鎬墓及其祖墓與此相類均厚於所親而薄於本身然農服先疇人食舊德子孫耕釣之餘猶能於客至道其彷彿若城市之家雖功名富貴盛極一時不數傳後門閭改觀子孫散處有不知其先世生長之地委骨之所者豐於此卽嗇於彼盛衰興廢彼蒼若固定之爲可悲也辭出尋原路歸

鄒可遠溶因匿法葆繫獄志稱其藏之山中而不言所在鄒氏家譜稱藏之惠山忍草庵較詳

顧晴芬

顧晴芬先生皋張涇橋人父賈傲居於城家計艱困某歲鄉試以貲斧不給求助於族老某某富而傲不之助有族兄弟二人合得會錢三十千文分半與之是科果中式尋大魁天下及貴與張涇橋族人不相往來惟某兄弟二人親愛逾於同胞云

韻香

尼韻香善畫蘭竹常自署清微道人顧臬與暱一時名士咸至繡絳見之紀載者如奚鐵生致黃小松書麟見亭鴻雪因緣冊然皆與惠山相連及今聞諸邑人謂所居在城中東河頭巷名雙修菴巡撫某封沒入官蔣氏購其地居之

楊芝山

山名學善江陵楊氏宗譜亦稱其工鐫刻但無他語生於道光辛巳十月初四日卒於光緒乙亥十一月十四

日享年五十五歲

皇華館

館在西門外城根門臨大河遠對慧山俗稱接官亭嘉慶中邑令葵源齊梅麓彥槐有聯云驛路通吳津君子至
斯常得見鷗程接慧麓好山相對亦忘言光復後沿河泊有水巡船匪徒謀毀船夜自城上擲炸彈下不中館爲
所毀

周 鎬

周犢山鎬令浙時識徐士棻於寒峻中教養不遺餘力周歿家中落僅剩幼子二會徐貴攜之京師延師督課情
逾兄弟其後二子皆中式順天鄉試聞者兩美之

孫鄉臣

孫鄉臣贊元直隸富潤人以舉人官無錫性仁厚然慮事周密吏不敢欺故事歲科兩試士求進取者必先試於
縣試日公於文卷語多獎借俗凡文列前十名者加以美評下次則依回兩可若百名外常置不論不議之列公
雖數百名外殷勤指點善善從長人皆以爲賢公精通小學故於卷中字體繩墨獨嚴僞訛悉加紅勒全縣幾無
一識字者如予以衛作衛以廉作廉均遭指斥在任日以元旦辦理石塘灣左近林莊一家殺死三命案最爲艱
苦及歿相傳卽爲無錫縣城隍神云

楊士晟

無錫令楊士晟直隸總督楊士驥弟也以進士官下邑起居服御如貧士慈祥愛民每聽事於堂觀者雲集一日僕供鹽水畢置其座旁爲觀者傾覆水滿於地公執卷起避冀除旣畢復還座未嘗有愠怒之色初至遇士紳有請託書常高粘於門以示黷辱由是請託絕跡旋以報荒忤上官意去任鄉農執香送者數萬人途爲之塞

虎翼林

南塘把總虎翼林皖人以軍功保參將銜守南塘常州營游擊何天林初與友善一日傲人來代虎疑其交不終怒甚妻慙惠之乘元旦朝賀懷刃至常謀刺何被執戮於蘇州妻子不能歸竟淪爲丐

鄒渭清

鄒渭清先生仁溥幼客豫省邑人某方官其地三往而不得見饑驅甚憊及後以軍功任浙凡同鄉往從者輒予提挈卽賦閒在寓亦復食客滿前常謂士不能耕而又不可無食最爲苦事

雪根

北門內沙文井上有石獅子菴者羣尼居之以庵前有石獅二故也具饌應客善治鴨有尼名雪根咸心傾之

邑先達華海初文匯贈以集聯云獨釣寒江雪讀書秋樹根陽湖汪子淵太史洵同時亦有贈聯爲勾留鴻雪影滋味菜根香前輩風流於此可見

廉三妹

三妹八兒巷娼也有孝行築屋於今邊善局後北向養親以居一時文士均嘉憐之汪保蘇本銓贈聯語云情留吾黨二三子名冠人間姊妹花及歿秦健亭毅豐挽之云貞孝兩難全濁已養親不愧一時奇女子門楣重獨創牽蘿補屋方知絕代有佳人

張意秋

張意秋者人稱之爲要緊完言欲盡敗乃家而又迫不及待也據知者告張祖遺無錫北大街一帶市房約值銀數十萬元田產稱是不數年變賣殆盡父死出殯延女尼爲執紼人給綢衣一襲其侈妄大率類是余聞名而未之識甲子春遇於崇安寺之聽松園年約五旬許足穿舊式緞靴曲其背面現梅毒衣冠尙齊整或告予曰彼已無家可歸寄居東大街之萬安客棧族人議日給銀一元以贍之妻父爲甲戌進士邑人顧紹成其餘親戚亦均望族云

櫻桃葉治痰喘

有南福官者不詳其姓氏設骨董肆於塔家弄口年五旬餘病痰喘咳不爽而氣塞客過之謂曾見經霜櫻桃葉煎湯飲之而愈者試之果煖稀氣爽其病若失

江南鄉試進場秩序

林文忠公則徐督兩江見江南鄉試入場時士子數萬人爭先恐後往往滋事斃命歷年無善法公首創以兵法部勒之試院前除東西轅門兩路外復於對面河上架木橋五分士子爲七路入口處以各學教官及武弁帶兵守之恐兵弁爲士子所輕不違約束故監以教官恐教官無武力被窘於士子故佐以兵弁其心思之精密頗堪發矇復分百數十縣爲百數十起如無錫縣爲東路第一起則東路發砲一響路口旗杆頂上懸一燈武進縣爲西路第一起則西路發砲一響路口旗杆頂上亦懸一燈第二起則發砲二響懸二燈餘依次類推凡士子入場者先期由各縣教官給與一尺長五寸闊黃紙一張其上書第幾起某某縣人某姓某名加以官印每人胸前懸一油布袋預備點名時接卷儲于其中者前紙卽貼於袋面試士自顧常羞縮不前然不得不恪遵其命苟一不如法則沿途兵弁林立拒不放入此法傳至數十年安靜無事人人誦德可見古君子常抱一濟人利物之心於小事亦未嘗不注意今之作官者於職所當爲尙不能盡心爲之可以知世道之隆汙矣

刺馬

清代野記一書記清咸同光宣四朝遺聞軼事所載張汶祥刺馬新貽一節較予聞於郭師靜溪者略異師言時

值鄉試上下江士子雲集遇官府出往往數十百人圍觀遣左官以其士也假借之從者希主人意亦不與士較故汶祥雜稠人中得近馬而刺焉否則以總督之尊嚴出必前呼後擁士卒左右護衛又執得而近之執得而刺之曰較閱士卒於轅門內遇刺夫較閱則士卒多於平時轅門以內非可任意入觀之地又何從下手汶祥無行刺之道惟馬之爲人當時已有訾議學使者錄遺命題傷人乎不問馬殊信而有徵焉

談 鬼 四則

華鑑遠君來晚飯後煮茗譚鬼憶余八九歲時慈親之姑母洪年老無子在南門外尼菴誦經余逃學匿其處天熱坐廣場食暮色蒼涼余北面正對佛殿忽見殿上一黑衣人疾趨自左而右疑爲賊大號燭之無所見至今疑之然猶得謂一時目迷未必果有鬼也

華海初前輩歿接回日重門洞開子孫環靈座哭錫俗接回必於夜謂亡者是時必歸家一視故曰接回余居家無事以妹丈丁翼青館其家攜燈往與談閒二鼓始歸由旁門出及至大門聞旗杆石下若有小鴨數千百頭羣聚而鳴燭之無所見燈綠如豆聲則環余四周不止心大悟曰此卽所謂鬼叫乎舉足狂奔聲隨之不去及鄰犬吠乃止鬼不畏人而畏犬亦理之不可解者或人先示之以弱歟

先君子於癸卯七月三日始病八月五日棄養是年值鄉試余坐廳事攻舉子業黃昏人靜輒見座旁之椅動若有人起坐者然其初二二日心注於書忘其爲怪一日忽悟桌椅之類人不之動而自能動者寧非異兆於是心憂吾父之不起既而怪絕父病竟不起

余年十六負笈廬山郭靜溪先生之門同學十數人夜讀畢徙倚於門門之左老農某居焉病久將死探視者畢集狀頗匆遽余等亦立觀動靜忽去門數十步若有聲猝然倒坳者聲震遠近往視無所見正驚疑間而老農家哭聲作矣或曰人之死陰曹有勾攝者若人間差役然人多塞門彼不得入故戲之耳

果報二則

江陰南鄉有商人某收帳至別鎮日暮將歸攜銀五十元遇素識無賴某亦在鎮遂相約同行途中譚笑樂甚至三河口無賴忽自後猛推商人商人跌於石頭破血淋漓死無賴取其銀以歸人無知者當無賴之將行也戲語石曰石乎今日之事汝勿言也石作人語曰汝不自言余亦不言於是案懸者累年某年六月鄉人坐樹下乘涼各譚鬼怪事適無賴至欣然曰汝等所言終無余所遇之奇者因舉推斃某商人並石言事鄉人大駭執而送之官越年服法是歲余肄業南菁學堂一時誼傳殆徧其事或尙可信

十年前光復門內沙文井有少年居之性酷嗜野味遇鳥巢有雛常以桐油塗雛體雛遂不能生羽毛烏終日銜物哺雛雛長倍常肥大可食卽取而下之嗜味者且向少年購買歸享上客風聲所播幾不知忍心害理之爲惡井有效少年之所爲者一日少年登樹取雛忽失足下墜樹枝貫其身腹洞穿臟腑皆出死狀甚慘城廂見者無老幼咨嗟太息以爲殘忍之報於是此風遂絕

聯語

秦澹如贈某酒徒五十壽云四十九年窮不死三百六日醉如泥丁雲軒夫人病故孫寒崖挽之云長技短技却已悼亡三矣中醫西醫其爲送命一也蓋丁氏兄弟一善畫一善醫均以多技稱而均喪妻至此已第三人孫與總角交故以游戲出之楊藝芳被議歸施叔愚贈聯云陪康健老親喫飯聽聰明兒子讀書名人吐屬畢竟不凡

東亭土產

東亭鎮以製豆腐乾剔梳帚及賭博之紙牌著名豆腐乾爲江公正一家獨製日有小販肩挑往城人可獲利三四百文因其物不使久藏故不能行遠年約售錢一萬千左右剔梳帚則鎮屬各鄉細民爲之獲利甚微紙牌分工而治有裒工有剪工有切工有繪畫工亦有一人而兼衆長者農隙無事家人父子坐而工作日可獲一二百文行銷各處年約銀六七千元又西人所需之結網花邊向惟城市女子爲之今則遍及鄉曲該鄉婦女什九以此爲副業可知利之所在有不待強迫而人自趨之者自國體更新官重農工非暴斂以阻其生機卽干涉而貌爲提倡務名去實愈離愈遠均不能無所感也

四海天樂

光緒間邑菜館以四海樓天樂園聚豐園三家爲最著華海初先生善談諧一日宴四海樓嫌其味不佳曰四海困窮天樂永終不久二肆將閉歇矣後竟如其言

寶硯齋遺稿詩

許君彝定屬題先德芝庭先生蓉湖秋泛圖

羅將五岳在心胸小隱名山傍九龍最是年年秋色好一湖煙水泛芙蓉
妙墨流傳洵有神百年手澤尙如新當前不少滄桑感難得珍藏有後人

甲子齊盧之戰無錫戒嚴歲杪與顧君衡泉胡君汀鷺王君雲軒飯于王

君之鶴巢三君者皆善繪事飯後合畫蔬食圖命題因占二截句補白

迭經憂患已餘生又見潢池盜弄兵歲晚偏多朋舊樂同岑相處是危城

朱門富貴餘梁肉世亂民貧一飯難等是幾莖菜蔽菜清腴味勝大官餐

題異禽圖

偶從市上得異禽二鵝羽冠嘴趾類鴨鵝象月餘辨其憔悴適陸子仲謙自常歸謂武進中學有園池頗廣足供週翔因以屬之胡子汀鷺寫是圖極極如真淺顯紀事

生來毛羽甚離奇此物原難相以皮豈獨懷才傷不遇憐他憔悴亦如斯
縱有餘糧堪一飽愧無霄漢任高飛物生兩大原如寄或者知音是陸機

秦寧喬芝珊兩先生奉祀雙孝祠恭賦紀盛

三六

孝行由來足感天弟行兄守計方全人傳懷實來荒微時有販珠實客嘗往來西北即語志決尋親到絕邊塞外苦寒誰

問訊途長乞飲得流連酒家以言語不通謂此尚有秦老亦南人當明其語可招之來即先生父也我聞如是當堪信志乘加詳待後賢

殺賊能教不顧身果然孝子即忠臣雲山悵望寒還暑菽水承歡暮與晨家累千金資負販手完一室實艱辛

芝珊先生西行後養母之責實秦喬先生任養親刲股爲餘事庸德庸言最可珍之手完家室厥功甚偉不傳刲股療親已也

高韞甫先生挽詞

柳下和風氣可親歲寒介節比松筠酸鹹遍閱塵中味圭璧終完刲後身學以精純延道脈交從平淡見天眞生
存華屋今安在落月雕梁倍愴神

太邱在昔有元方玉樹長埋劇可傷老至多情唯涕淚時艱無事不滄桑眼中蘭桂聯翩起身後詩書繼述長如
此全歸眞是福况當戎馬正倉皇

翻書得辛丑游庠錄率題志感

此事去今已卅年風塵回首意茫然愧非學業升堂後漫說雲程得路先登向龍門同御李宗師李公殿林借將鴻
雪紀因緣姓名兩頁從頭數半去修文劇可憐

己巳重陽前一日辛丑同案諸君雅集於惠山公園孫君錫丞賦詩索

和次韻卻寄

科名易代已無徵，小試容將一得矜。
卅載光陰如水逝，阿儂馬齒歎徒增。
風塵今日吾猶入，事事委心任屈伸。
枉說書生能報國，並無一檄慰雙親。
名場角逐比登龍，堪笑宮牆亦我容。
落拓依然成一夢，算來此夢未曾濃。
大義微言日與星，讀書稽古在窮經。
但謀衣食成何事，一霎韶光五十齡。
空期運會起貞元，無復餼羊告朔存。
歡笑此時皆勉強，相逢知己且開樽。
盟心同是在山泉，敘首名園亦夙緣。
孫楚多才稱獨步，清詞麗句唱當筵。

代王子咸贈戚好歸江山原籍行醫

顛連疾苦有斯民，滿目瘡痍感慨頻。
救敵補偏兼起廢，不能醫國且醫人。
地分中外不同方，舍短還應取所長。
周禮十全稱上上，羨君加惠到家鄉。

師錫兕破後予心如割偶挈申和與點兩孫攝影題此志痛

骨相聰明盡可兒，天心剝復漫相期。
孩提已抱終天恨，白首毋忘有此時。

題錫山石浪攬勝圖

同游者具名於卷後。蘇軾嘗觀之。周鼎謂此。蘇軾謂君。胡汀嘗謂水。河及余凡九人。丁巳春間。事也。越四年辛酉花朝後一日。偶檢得蘇軾影片。深感圖景如昨。而人事不常。秦君。孫已於隔處。下世矣。因題二絕句于上。

相逢勝日足清遊。趨步同登最上頭。風景不殊人事異。個中良侶失秦侯。
百年三萬六千日。難得浮生半日閒。愁緒苦多情緒少。一春負却此青山。

代郭壽同鄉某

郭江西人。屬咏並無事略。可謂且堅。索四首。白戰終篇。當時殊以為吉。

盛德如公合大年。江鄉小隱古之賢。身經戎馬疑無地。手復田園會有天。端木多財傳貨殖。汾陽晚福比神仙。稱觴喜值登高後。籬菊花黃月正圓。

愁看人海茫茫無定得。失紛紛似奕棋。致富術曾師管子。長生法亦學安期。圭璋品節春風度。龍馬精神野鶴姿。一老婆娑真世瑞。階前應挺萬年芝。

難得兒孫盡鳳毛。老人意興自雄豪。樽開北海籌添屋。菊采東籬果獻桃。萊舞一堂人介壽。節逢九日客題糕。年年此會應常健。笑插茱萸酒飲醅。

漫言孔李是通家。浪迹江湖等泛槎。往日老成皆白髮。頻年歸信誤黃花。感來高誼雲天厚。拜到幽居水竹嘉。此日登堂思未得。清秋涼露溯兼葭。

祝姚母六十壽

忝附絲蘿識母賢
箕裘世澤正綿綿
關心都爲民生計
入手常翻女誠篇
修到蘭馨兼桂馥
喜看璧合復珠聯
平添福壽方無量
桃熟初開第一筵

家國兼籌事事賅
日繁慈慮百千回
相夫能守無違戒
教子真成有用才
早識農田關至計
頻修水利濟沈災
功名富貴從頭數
六合調和到鼎梅

寶硯齋遺稿聯語

無錫縣立女子中學校廿週紀念

愧爲人師以吾一日長

樹之女範·餘爾廿年遙

無錫縣立乙種實業學校十週紀念校在學宮旁

居近聖人則古稱先有六藝

名標實業敬教勸學已十年

洛社蠶桑指導所成績展覽會

研究苦心機學有專門所至歡迎如泰斗

殷勤賴指導功成不日始知大利在農桑

其二

古必親蠶如何起首收場大家看看
禮聞獻繭到此成功開會小坐談談

代賀振秀女學校成績展覽會開幕

以巾幗負教育仔肩看桃李盈門無非辛苦
爲姑姊謀技能發展有琳琅滿壁足壯觀瞻

岸船楹聯

爲學宜求放心願乘屋角春長得閒把卷
處世須知罷手莫待船頭風滿始起收帆

秦逸芬姻丈百歲紀念

畫本至今傳四海知名推碩彥
桐陰依舊好百年繼志有雲禎

其二

下筆起煙雲千古隆名同石谷

傳家惟孝友百年遺澤過雲林

壽孫厚甫丈 丈以千金建四十岸橋

九五福富壽能兼綵舞當筵賓至合調將進酒
四十岸往來稱便功高如石橋成恰值古稀年

挽秦于卿 早歲會同讀江陰南菁書院

萍跡寄蓉城燈火宵深舊學商量如昨日
離歌傳梓里釣游人往故交零落感晨星

挽朱葦菴

少時已訂苔岑師門講藝客邸聯吟雲樹故人情別後有書頻寄我
先壠近依梓里聞笛心傷圍爐腹痛江鄉寒食節此來無策可尋君

代敬堂挽內弟陸

爲恩往日劇可傷心儘有家財偏屢空

幸得安居又嗟短命此非人事實由天

挽張湛華 某絲廠經理居南門外壽鈞橋之陋巷

愧未識荊州貨殖成家名比春雷曾灌耳
來尋今粟里簞瓢陋巷賢如顏子最傷心

挽任捷卿

得後賢繼述壽過六旬生有口碑推長厚
看新婦來歸駕留一日死無心事卽神仙

挽諸鳳明

揮手別殘冬珍重殷勤燈火元宵期後會
傷心多苦語淒涼婉轉尺書今日忍重看

挽孫奇舫丈

塵海沐垂青高誼難忘愧我至今仍落魄

書齋敞涵碧舊游如昨哭公過此獨傷心

挽高韞甫先生

生不解爭卽此垂子孫家法
名無虛立試共聽鄉黨人言

挽姚月度前輩

有子繼家聲承兩葉科名勤恤民情稱循吏
降才關世運綜一生行誼主持風雅是傳人

挽孫厚甫丈

有子不須多問公幾世修來一藥已足
逢辰同晉祝愧我連朝打算四韻未成

挽錢季常 代茶墅同人公挽

任他鐵馬金戈故我依然未脫秀才真本色

來此風廊水榭斯人不作忍看新月迥黃鸝

挽陶錫侯

久敬見交情異擊殷勤待我每留無限意
守成兼創業發揮光大痛君正值有爲年

又代榮氏女學校挽 陶手創績成小學校

祖德誦清芬手理田園兼種秫
人生如幻夢心傷械樸正儲材

挽王鈺泉

施無求報交不嫌貧溯將世上苔岑義篤如君難再得
諶切同舟驚聞易簣望斷天涯芳草魂歸何處可容招

挽楊蘊甫

本辛苦以成家有守有爲不愧四知祖訓
歷艱難而創業克勤克儉永垂萬石門風

挽謝介子

磊落風塵才足濟時偏短命

昏迷苦塊淚盡思親又哭君

挽孫仰辰

因欠賦情亟投秦弱水先生千休館旁池水死

到此或能休命盡騎鯨無限悲懷同弱水

輕生齊致嘅政苛如虎果教貽禍及清流

代唐氏昆仲挽親家陶某

申之盟好重以婚姻休戚總相關醫藥經年求續命

締造方新經綸初展公私皆未了門庭此日最傷心

又代唐外孫挽外叔祖

髫齡已是孤兒對字望衡咫尺外家承顧恤

隻影堪悲吾母撫今追昔仰瞻遺範倍淒涼

鄒甥翼溟恂恂儒雅爲各家長所垂愛以病久體虛歿於六月九日新愁舊

恨根觸予懷率綴斯聯用抒哀悼並抑夢清姊丈悲思

蒼茫感歎曾登思子臺來掃盡一身愁聽到鶻啼猶飲恨
渾厚聰明實足成吾宅相悲從六月息可憐鵬去不能歸

又代新之姪挽內弟

休戚最關心那堪淚落重閣拋却寡孤成永別
中西皆束手太息病經匝月竟無醫藥可回生

又代龔鴻圖挽內弟

久病卽沉疴姊弟情深爲叩蒼天祈永命
入門皆慘境妻兒環泣最難白髮慰重闈

代挽陳母

早賦柏舟篤幸眼前玉樹臨風壽過七旬家正盛
頓回蓬島駕看膝下麻衣如雪疇稱五福母能全

挽薛吟香夫人

與夫子並譽名場宿草驚心白髮催人今亦老
有愛女曾膺講席達材成德絳帷有母昔稱賢

挽家佐之夫人

卦有長嫂如母語言叔幼失恃賴嫂提携也

婦兼子職族重母儀叔氏賴提携同氣一堂尊長嫂
象服相夫熊丸教子孫行方秀出平頭六秩是完人

代三弟挽弟媳

爾性本通家話舊傷心歸寧空憶堂前燕
一身多逆境從今撒手忍教愁對鏡中鸞

代楊挽妻

有母七旬年聽於無聲視於無形息息相關君是賴
結褵三十載兒尙未婚女尙未嫁茫茫後願我何堪

挽高母喬太君

我愧人師別有真源推季子
天憐母德爲延晚景見曾孫

挽唐水成母

弦誦播風詩唐俗儉勤懷舊德
機絲嚴日課敬姜慈惠遍窮檐

挽張秋園母

八旬境遇有誰同歡承子婦慶衍孫曾合以好德考終共說箕疇全福
一語褒揚無溢美名滿國中教成門內益之居仁由義允推巾幗完人

代王某挽外姑

考終五月壽近八旬甥館倍淒涼榴樹花明愁照眼
能極衰微老艱似續母懷殊慘痛蓬房子苦最傷心

代唐經國昆仲挽姊時旅居皖垣迎歸調養不數月卒

客館正思家爲掛歸帆千里江山藻繪終莫慰蘭閨弱質多病多愁同氣最關情醫藥躬調求續命
夜臺重見母應悲短夢一場身世萍飄只博得梓里尊親稱賢稱孝聞喪齊洒淚孩提今後復誰依

代王吳女士挽姊

女士久寡在外省任教職近依其姊於寧姊歿爲視殮焉

頻年隻影孤飛近借一枝相見情深欣有姊
此日憑棺視殮別成千古未能身殉却悲予

代江孟祥挽妹

心傷別鵠淚竭撫雛身世太淒涼未死情懷知妹苦
方痛母亡又悲汝逝塵寰餘涕淚此生憂患算兄多

代某挽姪女

女許字某未嫁而某死女聞耗悲痛不食未幾亦
卒在家爲弟妹製衣履常終日不違

生時不解安閒十指常勸衣履能分慈母責
殉節抑何堅決寸腸欲斷環佩空歸月夜魂

挽先室黃孺人

少日夫妻方期貧賤相安糊塗到老
成年兒女忍使死喪迭見凄慘收場

自挽

生逾六秩不爲天世變親嘗有何滋味
縱難到百年亦是死時艱日取常恐流離

其二

既鮮德業又乏事功惟心腸無愧祖宗卽此可了
生有自來死復何往幸魂魄長依父母返本爲歸

寶硯齋遺稿日記

南菁日記節鈔

光緒廿九年癸卯三月廿四日晨起溫西文上堂授課畢劉總教自寶廳來乘轎入室諸生以次進謁用紅裏帖旁書受業程宏遠字瑞生年二十七歲無錫縣附生十八字一叩首一揖教習答叩首答揖依賓主禮命坐問何日到此現在何字號平日尙用功家居是否授徒數語寒暄畢辭出已午飯矣下午算學上堂演習兩點鐘並借閱新世界學報藉增知識薛君某每喫飯必遺下半碗不肯食盡初猶以爲偶然耳乃竟無一日無一次不是如此尤可恨者喫至半碗非嫌冷卽嫌硬攪入飯桶之內換而再食昨被隣桌見之大加恥辱今每飯另置一碗以盛睡餘若欲其食而不賸不能也此等惡習皆幼時不知檢束父母過於溺愛以爲無關輕重任其所之遂使習慣自然受人鄙棄且推而議及其父母以爲教無義方亦可嘆矣今日午飯薛又自誇其家之富厚以爲食必樂肉衣必文縐又有奴婢以供其使令故在此頗覺不慣謂我曰閣下家道何如似欲襲石季倫鬪富故事我徐答之曰幸居父母蔭下尙可暫免飢寒然堂上御我嚴常戒之曰惜食惜衣然後有衣食苟違此語未有不餓死者也故我敝衣粗食到處安之實不敢與閣下比也旁觀爲之報然薛戲笑自若猶以我爲慙云

廿五日兩晨起食朝粥畢帶筆硯上堂教習南面坐牆題紙發出共六題政學題二其一(一)方今時會艱難財用支絀而欽奉上諭緩辦印花稅停止苛細雜捐並嚴懲不肖官吏巧立名目何獨不顧及籌款歟宗旨所在賦毒

釋之(一)價款索金經各省疆吏會銜電致外務部照會各國公議應如何措詞得體可勸外人之聽以冀調停挽救多士經繪素裕行將出膺艱鉅盡各擬照會一遺藉覘詞命藝學題四(一)讀繁易之辭神聖代有制作補考工之記輪軸早具端倪製造之興非今伊始矣近者海禁宏開各省皆創製造局而輪路則延聘西人鎔砲猶訂購德廠豈華人心思才力果不及泰西歟抑泰西別有致精要道實足勝於華人者歟試推求之(二)礦內分金有若干類若干法願詳陳之(三)勾弦較與和比若半弦和較與股弦較比準測圓海鏡圖所列邇高平大小差等式參互觀之皆寓此比例之理試詳言之(四)砲彈若干枚列爲正平方則不足三十枚如每邊減去二枚仍爲正平方則餘六枚求彈數若干照抄一紙領卷畢各歸號構思教習亦退入內院依學堂堂章程宜在堂面試因諸生共覺不便此例遂不能行是日作政策第一道完卷即睡

廿六日雨作藝策第一道謄正已午後二策共二卷定例於諸題之中任擇一題作之卽爲完卷若精力有餘能分外多作則多多益善也初意以爲照會最難外人輕視中國由來已久犬羊之性斷非筆舌所能爭謂欲措詞得體實非容易後聞姚康錫曰所謂照會非真照會也放筆捷書或剛或柔任我爲之何難焉若欲視以爲真則左支右絀雖禪謹子羽孔子稱之爲善辭命者居今之世亦不能贊一辭矣何子拘泥之深我聞之恍然大悟信局送來四弟信知前日寄歸之物已收到

廿七日天雨朝飯後晴是日城中有香會堂中散學一天任人出遊午飯後同蔡蘊之一路閒步看香會每隔數十家必有香壇一所延羽士誦經祈福陳設香花古玩精采奪目聯語亦佳惜不能盡記有志心朝禮對稽首皈依者見之無不叫絕走至江陰署前其儀門東有船上所用鐵錨一只長約七八尺重可六七百斤半入於地

半出於外如此重大之物斷非船上所可用且日久爲人摩塗故四角光滑似非數十年物行路者言人人殊不足爲據嘗問諸江陰讀書人攷諸江陰縣志然後能得其所自矣

廿八日天晴晨起溫西文朝粥後十點鐘上堂讀至十二點鐘歸號下午算學上堂習至三點鐘歸號常州王子楷去冬聞其家中成病久欲致問迄未有暇今日寫一信交郵政局寄去以敘契闊并詢近况閱通鑑輯覽十有史論數篇登藏書樓見二月分經解史論諸卷多原原本本具有根柢之作漢武帝詔求茂才異等可爲將相及使絕國者論超等一名瞿葆剛常州人以將才相才納入使才之中按切時事慨當以慷於漢代邊塞地形徵引詳瞻筆力健舉允推傑作

廿九日晨起溫西文照常上堂功課畢喫午飯今日算學不上課在號閱通鑑輯覽三十頁梁武帝以雄傑之姿倒行逆施篡取人國夫能爲操莽之事者其才必不亞於操莽乃卽位以後堅信浮屠之說至令祭祀不用犧牲食御惟崇淡薄捨身同秦日誦經典一如鄉村老嫗無復英雄氣象令人莫窺其意張氏溥謂爲貪心無厭自愚以愚天下欲上掩弑逆之跡下全其不死之身是說也可謂能知古人之隱而誅其心者拓跋魏襲漢武之敵凡後宮舉子者必賜之死以杜母后專制之禍而世宗胡后獨得不死其後卒以禍國所謂出於人事之所不料者天也

四月初一日晨起溫西文朝粥畢照例上堂下午又上堂學算吳教習出籌二十五枝演與瞿君健齋看因瞿身弱多病勤學不輟用心頗苦故教以籌算之法謂用籌則可不必勞心我諦視之盡得其術覺一轉移間不知省却多少心思嘉惠後學實非淺鮮蓋籌算本是古法而吳教習所用之籌連平立兩方亦可不用心思一望而得

真奇妙無匹矣。歸號演習一番，心頗樂焉。下午發廿五日政黨課案，政學已在一等第九藝學則超等一名。此真大好運氣，同人皆艷羨不置。俄而賬房司事送來前半月膏火洋壹元七角，錢五十文，獎賞洋二元二角，錢六十文。總教習因家中有事，欲歸將初三經史課提前一日着聽差徧告諸生預備明日上堂。

初二日天晴晨起，朝粥畢上堂。總教習照彙例將題目紙發貼經題子產爭承論。今天下車同軌，書文行同倫。義史題陽城治民如治家，論法國路易十四擢用考弼爾掌財政呂氏廉羅伏阿治兵李鴻任外交，恢張王權發國威說四題之中，以治民如治家爲易於下手，故歸齋後即構思起草。總教習上午乘轎下船堂中，諸生無人管束，遂各置作文於度外，嬉笑誼諱至晚不絕。此題如以循良一類字面砌入，非特寬泛，且人云亦云，無以動目。必於治家一面竭力描寫，以文言道，俗情見得治家事則人人認真，治國事則怠惰者多如此。方有趣味，惜乎思所能知而筆不足以達，作至二鼓僅成半篇，遂睡。

初三日晨起盥沐畢，續前作至午後方告成。日長易餒，同姚君康錫步至街上喫麵，用洋一角歸已上燈時矣。坐談一刻，喫夜飯畢即睡。

初四日天晴晨起，聞今日提憲在黃山閱兵，同人皆約往觀。教習亦不上堂授課，我與陳君湛如登藏書樓觀此次課卷堂中定例，凡諸生課卷經總教習評定之後，聚訂數本，供人流覽，以昭公允。俟下期課卷評定之後，再將前卷散給我藝學卷批云：洋洋灑灑，將近來各局敝弊病和盤托出，復爲之悉心經略，求所以振興之道，語語扼要，卑而易行，一則好奏稿也。閱諸卷畢，又同湛如步觀各號舍迴廊曲折花木扶疎，頗饒勝致。到堂以來，日被功課迫促，刻無稍暇。今日始前後曲折一走，到可免升堂而不入室之讒。近晚郵局送來大哥信，閱信面尙是廿

九所發計日已隔三日其遲緩不便可知

初五日晨起溫西文朝粥後照例上堂孫教習太自尊嚴同人嘖有煩言將來學者不免中道而止朱純安託查補廩一事今日已轉託江陰人章擷珊尙未有回覆

初六日晨起接顧少泉來信敘我家中瑣事甚詳讀之而喜即寫一回信并將其原信略加修飾仍寄還之朝粥後照例上堂夫學問之道無一容易即如英文算學初學之時固覺甚難及略有進境又覺其易然方自喜其易而難之百倍於前者又至矣盡力狂奔茫無涯岸雖勇者亦將廢然而返故非豪傑有志之士不以得失難易動其心者不足以優游而底於成吾近來所學無一可決其成功東施效顰依然醜婦反不如荆釵布裙自安素履逐隊而行有悔心焉書此以自勉

初七日照常上課畢在號間坐因思我中國鐵路起於何時共有幾處一切經費若何籌集均無從悉其本末於是徧遊各號歷詢同人在蘇州人俞蘊蘭處借得經濟文一本歸而讀之知光緒初年英人於上海至吳淞興築鐵路四十里爲我中國有鐵路之始當是時沈文肅公爲兩江總督聞而爭之謂汝英人不應造路於我中國地上而英人則謂造路之始汝何不言之速事已垂成乃欲令人拆毀乎無奈何出銀二十餘萬將此路購歸頓時毀平或有爲公惜者公曰不可使後人議論洋人在我中國築鐵路謂是沈某始後時有請興鐵路皆爲言者所阻法人爭越南日本侵琉球劉銘傳巡撫台灣首疏於朝請與中國各處鐵路李鴻章等皆是之因鉅款難籌延緩未辦二十二年王文韶張之洞並推舉津海關道盛宣懷於是上諭令其督辦中國各處鐵路准領部款一千萬江海關稅三百萬招華商股本七百萬借洋債一千萬恐一借洋債洋人有干預路權之事故設立鐵路總局

如各國公司之例以爲鐵路非國家所造不過商辦而官督之耳一切款項歸總局經理商借商還不得以賄地相抵無論何國首借銀與我者鐵路一切工程即歸其承辦故比國尤之莫美德皆尤之今已造成者漢口至盧溝大沽口至京師上海至吳淞現方築廣東至漢口一路將來復須由吳淞築至漢口以期脈絡貫通枝幹畢具此中國內地鐵路之大略也至山海關外及雲南龍州之鐵路則莫知其緣起尙待查攷

初八日晨起總教習由家中來船抵碼頭堂中司事備轎去接新到宜興縣生徐政儀拜客片用西式衆人嗤之今年課卷前列者守舊人居多其品學兼優能撐持此守舊之局者爲武進瞿葆剛陽湖姚祖晉江陰章鍾祚章元溥鹽城唐乃釗李秉良儀徵朱錫琛而數人之中以姚爲尤奇年少才長獨不沾染習氣斯爲可敬每作文不起草稿提筆捷書不加思索句句奇警且考據精詳令人莫窺底蘊下午總教習遍歷各號查察一切材字號聽差和寶侍諸生勤於其職時適因事他往道字號聽差阿培平日專事遊蕩除清晨掃地抹桌以外不見其影而時獨以午倦睡於號旁總教見之反爲阿培勤而和寶懶戒之曰此次從寬罰扣工錢五百文若再不勤慎必遭斥革云云諸生皆從旁大笑星命家所謂流年月建之說其信然歟

初九日照常上課經董張來謁總教因堂中添建號舍購辦書籍經費支絀議欲減少膏火并嚴定課程整頓一切云云後聞同人竊議以爲膏火一項較從前創始之時已形儉嗇而花紅每次尤不及從前十分之二從前課列超等有錢二十千或十餘千不等近來則一二千而已試思此中諸生若在家教讀誰非可自謀溫飽者而必欲從數百里外奔走來此喫三餐淡飯以仰人鼻息乎且諸教習及學長各有身家故束修當從豐致送而吾輩豈無父母妻子待養者若謂學業過人則恐較短量長正不知鹿死誰手也出此言者常州江陰人居多蓋南菁

向設學長八人擇肄業年久資望甚深者充之每月每人膏火二十千安坐而食無所事事若遇課期乘興撰成一篇無論優劣另卷呈閱當擬作看待給潤筆二千其中謙以自牧者固不乏人而目無餘子妄自尊大者亦常有之去年改設學堂定例凡諸生課卷必先呈學長閱過擬定甲乙然後呈諸總教衆人心不能平羣起攻之此例遂廢今日所言仍是餘怒未息也

初十日大雷雨夜不成寢晨起總教習發出字諭兩張其一曰本堂譯學備東西兩文聽諸君自擇誠欲採異域之擅長補中學所未備有志之士亦既欣然從事抑鄙人猶有一言與諸君商者則以深造必先自得循序乃能升階葛藟不同時而襲甘辛不並口而嘗也蓋洋文最重音讀文隔東西音讀自爾迥異若不專精一途有類齊楚之傳况學問無窮精神有限今諸君於中學算學既萬不可緩而又兼兩國文字筆燈破曉大有妨於攝生即如京師大學堂考選通才收錄之後意在兼堂然必須一國卒業之後再及其他且非獨洋文然也算術測繪理化三項亦然算術有門徑而後可學測繪理化鄙人於諸君向學之殷亦既無任欣佩而其中層累容或有未能曉然者用特表而出之尙希垂亮其二曰古人爲學兼重息游各處學堂例准休沐諸君勤奮可嘉反休息無期殊非愛育之道今遵欽定章程明示停課日期俾習傳循誦之餘收泮渙優游之益卽自四月初十爲始以後一律照行皇太后皇上萬壽聖節皇后秋節至聖先師二仲釋菜日端陽中秋節每月逢十小建則二十九各休息一日屆時或澄心默坐靜攝精神或游目騁懷就近閒步慎毋宴樂迭遊羣聚嬉譁是爲至要

十一日晨起聞同人譁言昨宵講堂上狗哭聽差數人宿於其旁皆蒙被而臥不敢出視至天明始息道字號中亦有聞之我則每夜熟睡一無所聞據云去年新造屋二十餘間未曾謝土後遂屢聞狗哭且有各種妖異丁教

習遂亡今又不知是何朕兆孔子曰敬鬼神而遠之此等虛無杳渺之事不必堅信爲有亦不可盡斥爲無陰陽道隔置之不議不論可也下午至藏書樓領浙江局刻新唐書十本因燈下看書易耗目力故日間看洋板諸書夜間則看局板書管書者姓錢字銜之江陰本城人年約二十餘歲性甚和平老成忠厚授以此等職司可謂知人善任詢能無忝所守者

十二日晨起溫西文照例上課下午接季昂信握管擬覆而德字號姚康錫由家來帶有肴饌數種約我去喫酒座中皆議論孫教習之狂妄每月課期諸生上堂總教習必見而起立加以禮貌孫則高踞自如上坐無訕言動氣象無一非令人可厭可憎有少數怯懦同學見其手執積分簿以爲有進退人才之權無不自貶氣節曲意奉承致孫格外驕倨常以待若輩者加之他人致同人無不切齒現聯成一約凡上堂之時皆不准與孫點頭看其如何想獨夫亦無甚趣味也更可鄙者人惟偏於一傲而是人則傲而兼諂遇貴家子弟如楚莊襄之奇貨可居者則變其故態強顏迎合此等寡廉鮮恥之徒實世所罕有頃之陳湛如來亦言孫之短處蓋陳急欲精通西文故受孫之氣尤多吾輩則不求甚解虛應故事與之無甚往來故受氣少也

十三日照常上課下午班船送來四弟信及衣包一個略書數語交原人帶歸以當收條因純安詢補廩一事日久未有回音託章楮珊去催據覆學院實未接有詳文大約又是學書舞弊騙人錢財世風不古詐僞百出非十分老練每易爲人愚弄此亦足爲深戒卽寫一信交局送無錫轉寄以便及早料理近晚信局送來大哥哥信知家中平安今日圈史論大觀五頁閱通鑑至唐貞觀十八年唐太宗誅建成元吉人皆原之以爲其所遭之不幸乃天獨不肯原之及諸子稍長互相爭奪致當局無可如何欲引刀自刺處兄弟則有餘處諸子則不足可笑可憐

足爲殘忍而不顧天理者戒

十四日西文共有五班挨至十一點鐘我等方上堂在號守候又無心緒再看他書故每日上午專讀西文其中字義音讀尙易領會不可爲難所苦者讀之不熟旋讀旋忘耳今將讀過諸字另錄一通貼諸座右晨夕對之或者稍能記憶核提之童入塾讀書每日識三字已稱笨伯然一識之後尙可數日弗忘我等則每日五六字竟不能熟亦可恥矣下午學算吳教習人極和厚凡有疑難之處上前就正無不詳細剖解使人能明其理而止我近來於約分通加分減分已演至極熟自喜略有進境黃昏接父親手諭是昨日由錫發者

十五日因欽定學堂堂程有每月朔望教習率諸生上堂宣講聖諭一條今日始遵章舉行晨起後設公案於講堂教習東向立諸生以次排立於下講者南向據案宣講其人姓繆名承金字麗生江寧府六合縣人蘇州陸尹甫今日告歸因乃兄鴻儀已成進士捷電傳來催其回去聞年僅二十四歲去年春間入泮青雲直上年少翩翩真足令人艷羨

十六日照常上課下午發前屆課案我已在一等十三經姚康錫第一史李秉良第一均議論縱橫筆意開展不愧一堂之冠楊瀛仙者冠亭前輩之子也舊居西塘市今移居江陰城內來此訪友遇我號前解后相遇招入坐談一刻而去

十七日照常上課同堂潘芳名者字駿聲淮安府人持扇來屬書此真問道於盲矣辭不獲命爲之轉託於俞君韻蘭近數年來士大夫競談時務書畫兩項已成廣陵散午飯時總教送客來外見我等四人同桌喫飯二輩一素一湯碗皆小號飯未半而菜已盡矣卽傳喚廚房謂其欺慢諸生大加聲斥夜飯菜甚豐滿近來各物皆貴腐

房包辦飯菜勢不能不從儉嗇總教所言官話也

十八日政藝課政事題今日中國多行警察軍矣惟鄂省所行最善江蘇或仍用保甲究竟古所謂保甲者若何西所謂警察者若何中國舊用保甲何以治日本改用警察何以異異其名者可同其實歟易其名者何以副其實歟此中利弊必有所在願昌言之中國言自強久矣所已舉行者武則海軍水陸師武衛軍文則方言館同文館大小學堂商則輪電礦路銀行工則紡織製造農則墾牧樹藝而且整飭官常有課吏館綏靖閭里有警察軍一切諸大政均逐漸推行遠規越人生聚教訓之年近考明治效法西政之期有過之無不及矣然所行者政之迹耳而所以宰乎政之迹以求副乎自強之初心者究應從何處入手昔賈誼有陳政事疏嚴安有言世務書匡衡有上政治得失疏多士席珍待聘素裕經綸仿前賢言事之規陳今日急要之務立言貴乎得體論事取其切情勿爲空談毋滋橫議期他日上諸政府有可採擇施行想亦有志匡時者所樂抒懷抱也藝學題義國夏里留以塔考驗墜物之理能申其義歟平凹鏡雙凹鏡凹凸鏡何以能漸離透光平凸鏡雙凸鏡凹凸鏡何以能漸聚透光試析言之願少泉信十四由無錫寄至今日下午始到

十九日搜索枯腸至午飯後告成姚康錫昨日飲酒高臥今晨始動手洋洋數千言頃刻而成甚以作文爲樂人一己百對之且羨且媿子弟苟非上智慎勿令其讀書徒苦無益也薄暮倦甚閉門睡一刻黃昏在禮字號內同金伯瀛等談閒

二十日休沐晨起剃頭楊瀛仙來邀喫點心謝之朝粥後託馮憶範向唐康甫借鈔本南菁同門錄亦擬手抄一本其人不在號中遂歸下午同人約遊北門買帳鈎一付碗二隻用洋四角

廿一日照常上課下午間分班之期又將改易前日總教面見學憲會言舊時在堂諸生已逾三月新來諸生或未滿匝月分數懸殊若遽爾分班恐有偏枯學憲之意以爲雖緩至後五月仍舊先來者分數多後來者分數少勢難一律不如仍依曩例於五月初三會攷分班其分數多寡屆時可略爲變通總使舊者不負其苦學積累之功而新者亦得有及時表見之樂總教唯唯而退未置一詞今日忽送函至學院稱分班之時勢不能不憑分數若寬緩一月較有把握云云學憲僅回一束未有覆函想已答應矣

廿二日接四弟及顧少泉來信各一封少泉問我英文讀過多少計自到堂以來讀過華英初階三十四課皆臨時強記經宿即忘不可謂學僅足以言敷衍而已算學開方比例尙是淺近之學並非精深每日洋文算學上課之後閱通鑑輯覽十葉閱畢取古今人之論其事者逐一圈點既足以長識見并可以免遺忘現閱至唐代宗末年史論大觀亦圈至是年爲止所居之號迫近廚房天方破曉即聞刮銅擔水聲鬧不成寐故黃昏看時務數則即睡

二十三日照常功課近晚至街上買賬簿一本以備起草稿演算式等用今日無事可記將學堂中屋宇多少前後一覽繪成一圖使閱者識其大概亦如升堂入室焉通南菁號舍以道字號爲最陋人之出入者必經其地自晨至暮連絡不絕向皆棄而不居現因人多屋少不得不勉強俯就道字四號則陋之尤陋矣南菁書院四字額筆力堅勁世不多覩近改學堂將舊額易去棄置一旁甚屬可惜舊講堂懸一聯爲左文襄公撰并書句曰釋志多忘嗟老大讀書有味且從容將來稍暇擬摹從容有味四字帶歸作書房匾額

廿三日照例上堂算學中輟者多不及從前之半故併成兩班自今日爲始不再間斷每日下午兩點鐘一體上

堂四點鐘歸號學堂西首爲城守署昨晚帶勇下鄉在周莊地方擒獲兩盜今日押解到城聞卽吾邑榮巷典當被劫之犯俟江陰訊實之後想須歸案懲辦

廿四日照例上堂下午將號中略加布置開窗透風稍覺爽快總教習乘輿出外聞至厘捐局拜候親友并往學院衙門晤商學堂一切應辦事件至晚始歸德字號屢次失物今日又有人失去小洋十八角走告賬房欲向聽差索賠門禁甚嚴其賊不知從何而來亦可異矣客居所以宜格外小心失物之後悔已無及信局送來父親手諭并四弟信知家中平安與陳湛如金伯瀛閒談約定初三課後卽同伴告歸

廿五日照常上課海州人丁錫福字嚮卿庚子優貢向在南善定例考取優貢之後須向學院領取貢單方可進京朝考去年丁遠道來此學屬科索費過鉅未曾領歸在途遇風船被覆沒人幾溺死故恨入骨髓現朝考期近房科知不可緩卽將貢單齎送來堂丁見之大怒旁人亦代抱不平該房科無可奈何狼狽而去挽同堂課生江陰人謝某爲之說項丁竭力堅拒不鳴一錢紛紛擾擾尙未了結同鄉薛君常自以爲算學頭班氣陵同輩今日上堂見其於最易之開方題目尙不能算我始異之後聞滿如言薛每日竊取他人算出之數依樣葫蘆騙取分數而且以其從前之考案首考一等第一誇張於人不去諸口幸吾輩存心忠厚不喜發人陰私然稍有人心者將慚之不暇而又何誇耶

廿六日照常功課下午案出我又在一等此次語多支離明知不能勝人故心中怛然無所介意而同人屢遭屈抑妄生橫議謂同堂共有五派在堂多年屢列前茅者謂之賞識派雖經賞識常在超等末者謂之顧盼派優拔舉貢年姻世誼不能不列超等者謂之周全派忽而在前忽而在後用以調劑者謂之輪迴派其次常居人後永

不前列者謂之屏棄派又有南黨北黨新黨舊黨之目好事者編列姓名粘諸座右以資談笑

廿七日各分教同舟賦歸功課皆停頓覺安閒德字二號俞蘊蘭徙往裏面新起號內戴君禹修獨占一號甚覺寬大我即搬與同居軒窗明淨較道字四號有天淵之隔惟來往人多困於應酬暫且託足俟有佳處再行計議下午學憲來總教迎入內廳諸君羣往觀之總教面告學憲此次課卷佳作如林頗難位置學憲謂提調官曰現在經費雖甚支絀諸生遠道來此若末班每給膏火錢三千恐人思別圖不足堅其向學之心將來須與經董商酌早爲之計提調唯唯似有難色總教又告學憲曰今年有鄉試七八兩月之課最好提前於五月中併行學憲曰甚善寒暄數語卽起辭總教提調送之庭一揖學憲升輿從者數十人皆翎頂補掛夾扶而去

廿八日有人在藏書樓看此次課卷總教評語有目光炯炯明察秋毫二句誤寫明見輿薪不逞之徒藉爲口實議論譁然又義戛里留意大剽伽離本是一人譯音稍異某君誤認爲兩人總教未曾檢點信手加圈列於超等狂妄者益加抨擊將卷任意塗污并貼匿名對於總教會客之處文曰人可化身世無好眼跋尾語更不遜韓文公有言諸生業患不能精毋患有司之不明朋友之間尙宜以仁恕相待况同列於門牆仰承樂育竟貌視師長爲此無禮無法之事世風不古士風亦復如是可勝慨哉

廿九日總教因昨晚之事心不能平提調亦手足無措晨起卽入內謝罪再三勸慰朝粥時總教發出手教一張其詞曰鄙人學問尙淺謬承斯乏精神智慧兼不如少壯之聰強甚賴諸君勤匡不逮集同人之教益補故我之荒疎初到此間便求評友頃蒙高見指出章卷之訛無任欽佩義戛里留卽意伽離略同音異譯本是一人偶涉粗心未予糾點茲承忠告何幸如之嗣後凡有見到之處足以匡鄙人所不逮者尙乞隨時隨事無吝直教匿名

揭帖賢者羞之奉璋方以砥成大器厚望諸君然則風靡薄俗二三同志亦與有責焉也敬書此以誌吾過

三十日山陽唐乃釗字康甫居道字一號昨夜忽而昏厥良久乃醒據醫云肝陽上動須靜養數天即可無妨屢起總教特臨慰問同鄉亦往探望已精神爽健起坐如常咸爲驚喜初三之課因諸生佳節思歸改期初一舉行初三日大約可一律起程

五月十一日由家中趁船來江陰船上頗擁擠船夥似已識我照料周至房艙早有人占據遂宿於中艙夜半大雨船不能行至青陽泊焉

十二日上午十點鐘抵岸雨仍未止持傘先行囑舟人俟雨霽之後代將行李送來以免沾濕到堂午飯飯畢至提調總教處銷假金伯瀛亦是日到

十三日天雨因分班在即各須溫習中文故東西文算學概免上堂在號靜坐看書數頁初三經史課發案我在特等超等一名郁振域鎮洋人新調到堂未滿匝月殿軍威震瀛則三月份政學課超等第一也抑揚頓挫不可窺測如此

十四日天晴外間議論譁然羣言孫分教徇私阿黨侵權舞弊內外洶洶不知從何而起俄有學長六人進謁山長又有同堂數人連袂而入據云面呈公函一件內臚列孫之短處共有十餘款皆昭然在人耳目無可隱諱者勢成不解一發難收不知孫分教何以爲情卽山長亦何以調處焉

十五日因昨日之事各號談論紛紛山長發手諭一張以安衆心詞曰邇日謠言四起不知所從來細察諸君大有搖惑不安之狀竊維分班一考大局攸關公道攸關非可任意高下掉以輕心持以成見也大宗師愛士情殷

每次晤談願我堂士子植品勵才超越各處學堂實爲廟堂重器甚盛意也鄙人雖到堂以來爲日未久而中懷坦白立志堅貞亦以從前肄業同是學生曾受瑞安定海兩夫子培植堂中濟濟多士半多同硯之交至於英俊少年亦是我同鄉中後來之秀頗願互相砥礪文字訂交他年出爲名臣楙建大業鄙人亦與有榮施焉所以每次校藝一秉大公凡心力所能關愛者無不勉副衆望相處已經三月區區衷曲諒早洞鑒及之所有中文算課分數業已明白揭示三處藝學分數悉由分教諸師當堂評定諸君亦當早知明日卽行揭示十八日學憲臨堂攷驗願諸君爭自灌磨以爲臨時證據學憲之視諸生何一非其桃李自必以資歷之淺深爲合格之準則謹遵上諭中西並重中文果優斷不至以藝學之淺遠遭屈抑藝學果深卽或有中文稍遜亦當量予裁成如曰畸重畸輕固非大宗師之本意卽鄙人亦無此成心也况此事權衡主之者大宗師所憑者公道非旁人所能干預更非私心所能服衆矣一切浮言足以惑人者高明人當以一咲置之仍安心候考毋自擾之是所至望日來涼懷不均諸希珍攝考前尤宜加意焉劉奉璋敬白

十六日晨起卽見同學諸君往來如織聲勢洶洶皆以攻讐孫分教爲言此事之起所以猝然觸發不可收拾者蓋孫之擅作威福積怨已深各分教學長久欲去之懼外間課生或有不服課生又懼各分教學長鄰居親近爲之袒護江北同學懼江南同學素與孫睦江南同學懼江北同學甘爲孫下故互相隱忍不甘首發昨日不知何人倡首一呼百應羣起而攻自酉至亥不兩時投書總教前說孫短處堅請遣去者盈積如山總教躊躇一夜手足無措天明請提調進內商酌以爲孫旣犯衆怒萬難容留惟究係師長豈可卽時揮之使去一面婉諭諸生一面令各分教暫行同歸以避其鋒論內有諸君所注意鄙人已早有安排大家都是同鄉何妨稍緩須臾以全體

面等語諸生互相商酌以爲孫居心陰險若不及早圖之必貽後悔遂糾約多人索取名片寫具公函堅求總教定奪孫不顧體面不肯告退外間風潮大作禍在目前已間不容髮秦子卿陳湛如念同鄉之情以爲當局者未免執迷不悟遂相約同往告以外見情形勸之及時告退孫始收拾行李僱船將發前門已圍繞多人紙錢滿地遂從後門遁去到堂未及三月已付過束修四百十五元每月洋四十元已透付十個月臨行又欲向賬房付一百元爲諸生所阻總教無可奈何自貼洋三十元以作程儀方糜貪心卽此一端亦可見其毫無廉恥矣當鬧事之時余與同號諸君往外喫點心遇湖蕩莫順勇來此買豆餅

十七日在號看書收拾物件以備分班

十八日黎明卽起盥沐畢食朝粥着聽差將考監肩往堂上俄而學憲至輿從煊赫入座點名經史題晉悼公復霸論元世祖遺程文海訪求江南人才論限四刻謄正首段蓋戳畢卽命駕回衙諸生亦搬歸號中構思下午五點鐘一律繳卷繆君麗生因病未與

十九日有王某者江陰本城人家中設一學堂去年入泮今年卽多方營幹調入南菁每日到堂學西文之後卽歸而以西文授徒自孫分教攻去之後大失所恃施其詐計捏列同學姓名函稟總教云有張姓者精通西文品學兼優可以延訂爲同人所知惡其無知妄作有意累人卽進見總教申說王捏名緣由總教大怒卽將其原信送呈學憲以憑核辦後同人又函稟總教此後如諸生有事稟商須夾名片爲憑以杜捏飾

二十日休沐同號諸友無事閒談以爲人心難測卽以近日南菁諸事而論可畏可懼出門交友尤宜格外留心總以謙恭處物不與聞人事爲妙蓋人心雖不可測而我之所以自處者固可自求其不敗也已無招怨之方人

亦何從而怨之同鄉薛君現無人肯與同桌飯時強顏入座往往受人訕笑可爲殷鑒

廿一日山長將王某捏名稟薦西文分教之函及後諸君公稟王君捏名情節求代剖別之函一併封送學憲核奪下午學憲發來告示一張謂聘請教習之柄操自本部院今該生竟思干預捏列多名實屬不知自愛僭妄已極姑念迹近疑似不予深究嗣後宜各加勉勵敦品立行以仰副朝廷作育人才之意如有再蹈前轍害馬敗羣本部院耳目甚近將不僅斥逐已也

廿二日庖丁部根者年十六七三四日前尙在廚房傭作因腹痛歸今晨忽已病故家甚貧苦遺一老母棺斂無資諸君好義代爲勸貸我亦給洋五角下午接家中來函寫寄碧市信純安補廩一事今日蘇府學已有詳文到督學衙門大約可邀批准總算有九分成功矣

廿三日江北諸君因天氣漸熱患病者多求請將暑假移前半月來月初一日一律遣放山長答應可以從權辦理惟江南諸君離家較近來去甚易願留者各聽其便淮揚通泰諸君遂紛紛收拾行李大約俟分班榜出卽當束裝就道矣

廿四日諸君探問分班榜信聯絡不絕江北諸君倚裝以待尤望眼欲穿其所以遲遲不發者有數端存焉學堂規矩全憑平日分數不以一日短長爲先後今在堂諸君有肄業已滿三月而分數多者有未滿三月而分數少者又有會試落第諸君到未旬日全無分數者此其難於位置者一也有肄業多年班次在前本年考課不利分數短絀若降其班次使居新生之後則不足以服其心而非忠厚待人之道然強列於前又恐新到者有所藉口此其難於位置者二也東西文算學教習有寬嚴卽分數因之而異寬者分數多嚴者分數少喻重喻輕往往

可憫而不可憫然不能不與文分數並列門類愈多是非愈淆此其難於位置者三也山長平日重視諸生以爲皆通省人才不肯屈抑務爲調劑故弟兄分數十居其九山長免於謗訕而學憲遂無從分別此其難於位置者四也有此四難宜其煞費苦心矣

廿五日分班仍無消息蘇州陸尹甫今日趁船回去同號請渠喫點心餞行蘇州沈承懋接家中來電知乃兄病故遂與陸同伴涕泣以行見者爲之淒然下午聽差交來本科鄉試寶與費錢六千票一張須至金陵照付儲諸箱內湛如來約伴云出月初趁松江人船同歸允之四弟廿三發來之信今日接到東文算學今日起已停課因人數寥寥諸生已告歸者多也

果育日記節鈔

宣統三年辛亥正月十七日今日既無新生考驗又無別事可做所有校中各項簿冊半歸華蕩人收管半歸錢伯圭主政華因乃父六十壽未來錢則新正喫春酒忙余又不便催交也上午靜坐無聊往訪張守蘇蔚張錫城人與吳養正總角交少有神童之目精書畫篆刻文章經濟均有可觀在上海製造局每年有薪水千餘金猶復患貧本年二月初將往湖南其居瀆口因費於華荻初爲婿余之與相識則職業女校始其人性奇傲而心實仁厚開口便謂余曰古人曰庸人爲自了漢至如吾輩一身且不能自了則欲求爲自了漢而不得可嘆也

正月十八日疏實教員程季美瀆口人也從前曾爲此間教員人品及文學均近今不可多得而隨老獨不加信任聽其他去至於余則心非所願獨強而來此南轅北轍始信造物弄人之巧朱純安晚上到校宿樓下圖書室

旁

二月初二日擬牌示學生稿兩則（一）學生罷操懸操衣於儲藏室按號編排本極整齊近日各生往往不守公德手忙脚亂任意將他人已經安放之衣遺棄於地匆匆返走不爲拾起其心以爲人不我見一切可以自便後至者亦熟視無覩各顧其私此等用心均非所望於諸生嗣後責成各級學長值日生於罷操之時在儲藏室監視俟各生懸衣既畢方可退出遇有仍前不顧公德者當竭力勸導如有意抗違可陳明管理員分別記過至自習室退課之時室長亦須盡力稽查總以隨時隨地共求整潔爲主區區之意無非欲養成諸生習慣並非故事苛求其各遵守爲幸（二）各生於上課時往往忘帶書籍并有疏懶性成僞託在道遺失故意不帶致兩人合看一書越次亂坐業經隨時申斥仍未一律悛改諸生所司何事到此何爲將來尙有何事可做試自思之當亦無從置辯此後如再有前項情弊一經查知當從嚴記過毋謂言之不預也近晚時議定戊祭不放假謫人介圭二君決計屆時去城所有功課由余與純安替代據孫伯勳云去年下學期無一日無教員不請假殊屬不成事體隨老另立手摺現可歷歷數也

二十八日日前牌示後樓上寄宿舍居然鎮日清淨今日謫人喚學生晒被於是各學生奉有將令羣來取鑰余不之許謫卽自來余喚聽差將鑰交給令獨自登樓爲學生肩被出晒不准他人隨往謫亦默爾而去示墨未乾彼豈目未之見乎蓋故意弄人也

三月十二日朝上介圭到純安不來功課由我與介分代總算一日過去隨老在無錫孫伯勳歸家掃墓校中不復有人來過問晚上結分數

十三日純安仍未來心爲之鬱悶日間照常上課晚飯後謫人又請假往無錫兩人管三教室如何得過十七日介圭擬晚上趁船到無錫從無錫結伴往芙蓉山看會如此周折一日定不濟事伊可覩顏請假余却不便當面回絕不准略加諷勸竟置若罔聞晚上仍欣然而去

二十二日下午陸代教上音樂課授至三十分後忽二年生華敬疇與陸衝突純安來言陸在課堂聲稱請校長發落如不開除華生則渠將告辭散課後華哭而各生聲勢洶洶團體甚堅羣來聲訴據華生言因歌中有字質問陸非但不答反拍案大怒據陸言華出言無狀云須再學幾年方可勝任問之學生均稱並無是語余思各生輕欺陸師則有之至於陸之所述恐學生尙無此胆量當時只得代學生抵賴安慰先生一面往謁隨老商一兩全之法先見建伯告知情由及歸勸陸代教一切容忍蓋操之過切在學生爲有詞而於教員一方面亦不甚體面也黃昏擬就牌示往返商量人人手忙腳亂陸已安然無事代學生洒香水於髮笑聲滿堂親如兄弟矣此等人尙有心肝乎牌示學堂以嚴守秩序爲要學生上課須專心一意靜坐聽講遇有疑難不明之處應俟教員教授畢方可逐層質問華敬疇性情浮躁動輒攪問殊於全堂聽講有妨且散課之後全然不知學業爲何事致平時功課常不及格宜深自刻勵力圖上進此次從寬記小過一次（下略）

二十三日各生見牌示亦無異言看今日情形則知陸之不是蓋伊果責人以正罰當其罪未必能動公憤也諸葛武侯嚴於治蜀而蜀安之則史所謂能開誠心布公道也漢宣帝信賞必罰綜核名實而致中興治國然治學生何獨不然前數日有鴻聲里錢姓少年來訪陸陸留之食宿如舊相識人以爲奇蓋陸蘇州人此間並無親戚故舊也問之始知係前日看會時道遇而訂交者明日伊尙須請假往鴻聲里飲酒食鰻魚云

四月初三日上午自治公所甲級投票下午開票謫人有功課四時竟不假而去現在講求自治貌似熱心之人無非欲武斷鄉曲騙詐人財而已前月胡侍御封奏痛詆新政之不足致治徒以促亡可謂第一流人物能言人所不敢言他處教員無時常請假者卽有萬不得已事故而請假亦須將功課布置託人代教此間夜郎自大幾不知教育爲何事故上課旣極潦草請假與在堂無甚區別身在而在心不在亦不得謂之上課謂之胡鬧可也初九日是日立夏此間風俗以立夏爲佳節視之如端陽中秋等故校中亦備佳肴以餉師生下午復有米餅作點心諧之立夏餅中實以肉亦有糖者物尙可口此外必喫酒釀及海螵萬戶皆然亦一奇也下午各學生均往外游玩余與純安介圭步至木牌墳墳去溝口半里計規模甚壯約費必十萬金以外葬者一田舍翁耳無奇才異德何以有如許資財并子孫繁衍歷數十世而人才輩出富貴無窮耶造物之於人亦往往有失之過厚失之過薄之處眞所謂大惑不解者也

旅京日記

余生四十一年矣愧未一入國門（民國四年）乙卯夏教育部有召集全國師範校長會議之舉余以承乏無錫縣立女子師範學校先期與侯君保三約同行赴會藉觀北方風景侯君并要余同遊山西以盡其勝余諾之於陽曆七月三十日起行承孫君頌陀相送宿啓泰棧侯君偕夫人如夫人愛女另顧姓女士僱舟出城舟泊通運橋掛行李購車票訖夜二點零九分啓行天熱未睡七點到南京凡欲乘津浦車者必乘滬寧車之首節因全車均停下關惟首節開至江口便渡江也時江口泊有輪船守候余等購聯票自錫直達天津故除行李已交給

車站可不過問外卽人之過渡亦僅驗票不取資他客則每人需渡資六十文一夜未眠頭腦不清至此見江濤
洶湧水天一色心神爲之一快約數分鐘卽達浦口車站有聯票則不必購票徑登車謀坐位茶房見兩人卽招
呼入近處坐爲加席條尙整潔凡容兩人者一人可盤踞之莫得賞也其實津浦車坐位之算背爲橫板間有空
其下半截者坐臥尤覺自由一人可盤踞四人之坐位惟此等車常不在茶房近處余安頓行李畢卽搬往獨坐
安臥浦口車站連房甚賤一銅元可購四枚凡銅元稱銅子此爲起點直至北京或稱銅子兒或者銅兒二字但
稱子九時開行十時至江浦縣有江防隊鵠立擎槍迎送長官狀甚謹縵均未去十一時半抵滁州歐陽公豐樂
亭記東南皆山林壑尤美信然民居皆土牆茅屋田稻外遍種雜糧十二時至沙河集未停車道旁民居尤奇矮
自滁州以北軌道兩旁石子均青黑色土色深紅若楮地脊則民貧無怪流離轉徙以行乞爲生活也余謂省立
農業學校宜設於此使變化土壤以覘成績侯君曰土壤學爲農業之一部分且江北亦有農業學校矣將來研
究所得獲益當非淺鮮至光明站一望平陽誠光明矣土屋兩三椽大書安頓客商售物者均在木欄外客可任
意下購巡警遇車過則擊鎗致敬或曰此爲津浦車之通例亦不知其所以然沿途澤多河少直至徐州故一兩
卽成水國無雨則又苦旱國家設水利局誠當務之急但不知導河導淮何日觀成耳臨淮關爲江北要地於商
業上亦占重名乃居民數十家不知何者爲商店大率如吾錫南鄉之新安鎮欲比潯關則不如遠甚過蚌埠有
旅館有茶店此來所見自當以此鎮爲首商賈交易均於茅屋中迴翔蚌埠北行里許卽淮水有鐵橋車行其上
約二分鐘遠望梳檣林立水濁而黃再北行地勢平坦可百餘里使分其流成各支河溉田千頃則其土宜棉宜
稻今盡植高粱稈高者丈餘土匪往往伏匿其中爲行旅害匪謂高粱爲青紗帳謂高粱長大爲青紗帳起言其

可以藏身也車至一處木柵外售物如曩例惟多熟雞及麵包雞每隻僅售銅子十七八枚客多購隻雞和麵包爲食民生困苦道旁之童環顧求乞客棄其餘則狂奔跌仆起而爭食亦可憐也七時至徐州即項羽所都之彭城車站之大爲今日所遇各站冠地勢雄偉當南北之衝遠山迴環岡巒起伏洵乎用兵所必爭夜過泰安昏黑不辨引爲憾事天明已過山東境之半自張夏經黨家莊至濟南一路見田中所種無異於昨惟土性黏故收成較豐山多田少居民即以山爲田有種雜糧於山腰者疊碎石爲阡陌盤旋若螺紋旁無草萊修治甚潔所過村落屋皆不高非鑿石卽範土成長方形用以代磚築牆屋頂蓋草或瓦瓦皆灰黃色猶吾邑名欠水黃之劣瓦四周塗黏土如衣緣然凡數十家聚族而居者則築小城自衛蓋卽古之堡也經禹城縣桃大而味甘價極廉銅元一枚可購桃兩枚大約日不可少之物如麵包等類北方未必價廉於南方其餘如雞如水果均富貴者食之居民不以入口故價極廉其俗之儉令人心敬而感慨系之又同車無貴賤無識與不識食時先向左右招呼朋友相見則喜極握手此風亦非南方所有也

八月一號上午九時抵德州搭客獨多站屋紅瓦紅磚層樓高聳屋脊有亭有人均高不盈尺爲裝飾品至連鎮有富家女登車衣黑紗四周緣雪紅紗邊梳墮馬髻傅粉紅其兩頰手執執扇洋緞蘇滬二十年前之舊裝束彼輩今日尙以爲時髦云下午三時抵天津總站未抵站百餘里已有旅館接客者手執小旗向客招攬生意審許之則將旗插行李上下車卽有人爲照料余等恐到京天暮預定在津宿詢知泰安棧離車站最近卽以行李點交接客者下車至棧官房每間房金一元可連飯食多一人加半元其次五角多一人亦加半舖用板攔無帳廡空氣窒塞徹夜未熟眠

八月二號侯君應嚴範孫先生之招留津演講余乃先乘早車到京至正陽門下車雇街車往魏家胡同訪周君慕範時周君已散直暢談一切旋導余遊公園園在端門之西卽社稷壇遊時登端門城樓卽古帝王閱兵處園中古柏參天均數百年物壇前後有古銅香爐四款爲乾隆年製園後爲古物陳列所天已暮未及觀出游東安市場購北京地圖一歸宿周君處設舖於會客室北京無竹掛帳及晾衣均用繩學校手工用竹闊二三寸長一尺需銀二角云

八月三號游十刹海在內城西北隅京師人以爲名勝下午往旣至僅見一大荷池作腰員形荒穢不治荷花尙盛池西南均小本營生者設攤並搭草棚唱戲以娛過客再進有臨時茶店上覆蘆席四旁亦以蘆席爲欄見客過卽招徠之座分男女標男座曰官客座女座曰堂客座外懸招牌分載茶葉名稱紅色絲綫價以客計不以壺計如每客茶一壺售錢六十文兩客合一壺卽一百二十文地處溷隘而攤座占其大半人聲嘈雜不容插足卽廢然返池東北爲民居鱗次櫛比亦無可觀北人謂池沼爲海謂百錢爲一吊均可笑周君答拜他客余步行至地安門地安門者禁城之北門昔惟王公大臣得賜紫金城騎馬今則吾輩可乘車出入矣不識路徑雇人力車夫問何往以前門對蓋土人謂正陽門曰前門正陽門者內城之南門也地安門之正南爲天安門再南經午門端門卽至正陽門天安門以內爲清帝所居故車行必略偏於西再西卽三海爲總統所居此次車行實介於總統清帝所居之間從前亦禁地也過大高殿屋三楹手可及檐爲前清皇帝祈雨之所沿御溝行隔牆望見景山山巔有五亭今見其三一方一圓一八角構造精緻金碧輝煌似非人間所有其餘御溝建築亦堅實有橋二各闊五六丈雕琢甚工兩旁立白石柱有頂橫貫柱上作層樓形精美絕倫西華門爲清宮出入之門見宿

衛者出仍涼帽紅纓此行甚樂惟獨往始得遇之至前門外在西河沿看定迎賓館每天房飯銀五角菜不在內亦北京客棧例也約越一二天再往自西河沿至周君處甚遠往教育部則稍近北京人力車夫重財而輕路路愈遠則價愈廉自前門至魏家胡同約五六里有銅元十二枚足壓其欲至教育部則非七八枚不肯往蓋若輩心理以爲有銅元十枚卽成一吊錢得之不易失之可惜巡警督察嚴故車夫遇客尙恭

八月四號往訪願省臣前輩卽就其寓所飯遇王君甄士已就黑龍江財政廳事明後日起程遇錢君子才爲免考試主事候覲見者願君魯瞻別已數年北京話甚熟無事戲舉一二例爲笑樂北京街道甚闊修治亦勤作客最不便者居家旅館均無溺器卽婦人亦登毛廁所謂毛廁者掘地深不及尺周圍七八寸旁墊兩磚爲安足所遺溺於外穢氣薰蒸收糞者尤奇每晨背負一桶桶長二三尺口徑約尺餘按戶收糞滿桶卽負之行其愚可笑蒼蠅之多三倍於南故衙門寓所下至居戶均門懸竹簾以祛蠅各國使館在前門內東交民巷貼近禁城庚子之亂曾受攻擊今履其地並無高城深池不知當時以何抵禦抑攻者但精拳擊故不能深入耶

八月五號自周君處搬出前門外住西沿河斌魁旅館北京旅館往往除主體外旁掛他處之招牌如此間橫額爲斌魁旁又有天津迎賓館之額蓋天津旅館來北京接客者也日前來此招尋旅館誤認斌魁爲迎賓見住房尙清淨卽定一房間今日匆匆寫信寄家以迎賓告後知錯誤復寄明信片更正北京之屋均極矮僅及南邊尋常住屋高度三分之二各部衙門宮中諸殿亦僅如吾邑崇安寺之菜場西門之接官亭惟磚木各料則頗堅實防颶風也近來已改良有仿南邊造洋房者店舖招牌有所謂南式海式與吾南方店舖稱京式同憶吾錫北門外壇頭弄有京式盆湯浴室浴客趨之若鶩幸其名不副實使果如京式則人將逃避不遑矣進某店食雞絲麵未

畢欲嘔價五十文頗廉彼處店舖有稱局者廠者大約以局爲尙路見棺材店招牌爲槐局不知何解成衣店則稱成衣局亦奇至願君魯瞻處取日前遺忘彼處之北京圖歸途誤入琉璃廠久耳大名不意邂逅得之其狀如科舉時代江陰之貢院前南京之狀元境現內城設市場如西安市場東安市場之類商店均聚集一處又有俱樂部如茶館酒館彈子房之類故琉璃廠遂無人過問其地在城外西沿河之西離寓所甚近晚間無事至第一舞台看戲台面裝置如上海之新舞台正廳六角人多於蟻無插足所因夜戲祇此一家且各報所載大名鼎鼎之劉喜奎演新茶花也北京戲單不載戲園地址日戲稱白天戲又有外表爲戲園內實唱而不做唱均不帶白口猶南邊說書之開片并雜以戲法詞則甚雅純無淫詞嫖句出諸口且時有人偵察使偶違之必加重懲也戲單必呈警廳鑒定故北京警察成績之佳實爲全國冠內外城無失竊者同鄉均爲我言之

八月六號上午往教育部報到會場設學術評定委員會在西單牌樓手帕胡同招待員張姓略詢無錫情形發給議事規則及徽章至余僅第五人其他四人均近京如河南山東等省遠省尙無人報到下午在寓無聊往東安市場啜茗遇吳松雲先生又遇侯君季德云係昨日到京依舊居停謀路事旋往丹桂茶園看戲即在東安市場內正桌每人京錢一吊六百即銅元十六枚戲尙不惡惟秦腔哀音促節頗不願聞耳

八月七號晨尙微雨旋即放晴僱人力車往游頤和園園去西直門外四十餘里言明全日車資十六吊即銅元一百六十枚在途行兩點半鐘始到計程實有四十里見鄉人駕大車搭客進城者絡繹不絕一車往往載十餘人以一馬拖之北方之馬其苦過於南方之牛大車之制如大餐檯下有兩輪甚堅實人坐其上必盤膝不搭客即載貨不搭客載貨者上加布幔人坐其中亦盤膝即從前京官所坐之騾車今除馬車外此種車仍占多數自

西直門至頤和園馬路未盡巡警觸處皆是故地雖荒涼旅行實甚安穩使如南方則搶劫之案必日有所聞矣園在西山之東麓萬壽山昆明湖均包圍在內西山橫列西直門外自北而南綿亘百數十里門外有頤和園額游客入內門票每人銀一元二角准游全園之大略如欲到排雲殿南湖則在園內臨時購票排雲殿五角南湖三角坐船渡湖每點鐘銀兩元管理園務者向爲內監今則內監之富而有家者均歸爲民貧而老仍相依不去見一內監自市歸監備雜物衣破如丐其餘如守門除草均雇外人爲之售票者亦不知何許人待客甚恭此爲北京通例北京無論茶店酒館客出入必起立致敬售票者亦然入門一年約十五六歲之童子手持長衫欲衣以爲導叱去之其後至排雲殿則一年老者出欲爲引雖叱不去被詐錢四百文余喜行止自如不願人帶領而若輩則相依不去恃此爲生活偶叱無效亦不忍再加以聲色蓋其從前之如何擅作威福余不知也但見其今日之狼狽可憐而已在內城所遇監者亦然衣衫藍縷遠遜南方之乞丐盛衰興廢轉瞬卽異吾輩可以勉矣頤和園內宮殿與大門作一直線者曰排雲殿仁壽殿樂壽堂仁壽殿有寶座下有木級兩層糊黃紙爲清太后皇帝避暑時召見羣臣之所殿前砌石成廣場約二三丈作正方形圍以石欄與殿之地平同他處皆低蓋各殿自下而上就山之高下爲之引路老人謂廣場爲羣臣跪拜之所理或然歟寶座中懸慈禧太后像蔽以黃幔旁置桌椅甚亂如民家祭獻初畢狀桌椅均紫檀爲之刻雲龍甚細余於全園無所奇惟奇其雕刻之工如石欄石凳以及桌椅銅器之類往往一物之微覺從旁估計非有數千工不辦排雲殿之前有銅龍銅鳳等件分列石座座刻各種花紋雕琢之工均能相稱其餘迴廊曲折目爲之迷殿屋均甚矮占面積亦不多惟金碧輝煌望而知爲帝王之居牆上繪花卉人物則均俗工爲之不堪入目殿中字畫屏幅徑黏壁上不加裝池款爲臣某畫臣某書

均甚尋常真者想爲內監易去矣皇帝本不知字畫之美惡故易欺之至柱上之聯均漆匠爲之語在可解不可解之間款係乾隆御筆爲多旁有一殿不得入從門隙窺之有廣場有戲台想即慈禧后賜羣臣觀劇之所其餘各屋或爲雜殿或爲廊房均甚矮小妃嬪居之想見宮中不見天日之苦出至養心殿自東而西長廊數百丈隔數十丈間一亭廊盡處爲湖有石製樓船船上窗櫺均作石色細視之知除船底外餘均以木爲之塗以粉漆而已登最上層啜茗每人大銀四毛四毛者北京話四角也湖山之勝盡收入船坐一時久已夕陽在山不及再西望見湖中龍王廟林木青葱樓臺倒影由東岸往有十七環洞石橋一覺此境絕妙不可不往卽沿隄匆匆行經電燈廠文昌閣等處約二里許始至隄邊有石座一長丈餘闊半之花紋精美上安銅牛腹有篆文爲乾隆朝製使無石座但置於地人將疑其爲真矣誠巧奪天工哉再前有石碑兀立刻清高宗勸耕詩支離可笑碑之四周花紋甚細再前有八角亭出亭卽橋之東塊行未半風起水湧心爲之怯有西婦二人攜一僕至同行臆稍壯過橋環游龍王廟一周而返所見無他異惟覺隄石傾欹形將倒坍耳思慈禧后修飾此園爲世詎病夫以太后之尊受天下養治一園以自娛亦不爲過特病其過侈耳其實所費數千百萬用之於園者不過千分之一他均爲內務府宮監人等所乾沒歷觀全園均以天勝人爲者不過石工雕琢之細其餘宮殿均矮小可以數計使不知歷史所載費方將歎太后之儉焉至仁壽殿欲求出門路徑曲折不可得有內監負草出詢之遂如指行及門已無人收票懷以歸留作紀念人力車夫良鄉人沿途告余良鄉之水患人民流亡之苦在京拖車一日需繳車租警察捐大銀四角平常南北奔馳所入亦僅一元或尚不及一元除繳捐外家有五口恃以生活故狀殊狼狽云八月八號上午繕寫辦理學校報告書下午顧省臣周慕範兩君均過訪同遊中央公園並蒙邀喫館子談北京

風土頗堪發笑北京人互相稱呼惡稱大哥謂比之水滸中之武大郎也故常稱人曰二哥又惡稱大嫂子其意與稱大哥同平常店舖中人如客棧之類忌稱老班因妓家之管家爲老班也

八月九號晨起至周君處接閱答信返旅館作覆並謄報告書下午至東安市場啜茗此間茶樓酒館裝置富麗不熟悉者不敢入如東安市場德昌樓其招牌爲豫菜館登樓之客但有啜茗清談者有臨時食點心一二種者價亦不昂茶每客六七十文點心一二角不等肉絲湯麵七十文頗清潔可口地在余寓及周君慕範寓之中間周君無他嗜惟好飲茶自昔已然以及綢緞云此間尺知而價昂又縫工甚笨不知小裁故一衣之成價倍於南方並言北京寓公之奇大約月薪在百元外必帶眷所人卽不敷所出有手段敏捷運動得法者所入倍所出亦倍一衙門人數衆多肯喫苦肯做事者每司每科不過二三人情形熟悉則地位穩固餘均以無爲爲高大抵此種人奧援甚大升官發財不在事之能辦與否又有爲各部被裁之留學生惜者或曰此種人自視甚高實不能辦事從前普通人笑科舉中人曰書堆今日又將笑留學生爲洋堆矣靜坐聽之足解客中寂寞歸途塵埃捲地目爲之迷北京土少粘性故雨則泥深一尺晴則塵高數丈清道夫在路中灑水一刻停留無一處不如此可見路政管理之佳不識途問於巡警彼必先告人以現在所立之地位方向然後指點去路之曲折覺此法亦佳余出行必問路所遇巡警無不如此問明後走一二十步再雇車則車夫見所往躡不錯以爲熟人討價始不懸殊八月十號晨八時卽雇車赴會場既至詢知今日並不開會待明日先開一會會已發單告各會員各會員均未接到故徒勞往返者頗多是時見報到者已有五十餘人招待員詢余會否報到余以已報對蓋招待又另易一人矣余卽以學校兼况報告書與之見各校所繕者大小不一格式亦無一定既出便道至北京醫院候君希

民處因昨晚遇周君據稱侯君曾打電話招余也在侯處略談片刻辭出回旅館下午無聊往吉祥戲園觀劇元
年京城兵變東安市場一帶蹂躪最苦而改變亦最快新造各屋宛如上海之租界昨晚暇茗聞同鄉言北京政
界無往而非運動無往而不可運動有以賭運動者有以看戲者余疑看戲豈能併爲一談不意今日觀
之始信戲園中必有一二伶人享盛名者如吉祥園之有梅蘭芳爲各衙長官所稱賞張賽且以聯扇贈之其他
可知若輩非梅不歡日必一睹顏色於是欲運動者日往該園訂座假如每家戲資七吊合一桌六人共錢四十
二吊已先入座或邀他客一二人據之凡梅戲必在後梅出則一班亡國大夫至若相約者然惟時人多擁擠
覓一座位頗難運動者起而相邀適姓名即彼此相識被運動者正進退失據之時得一席容身自然感激莫名
謀所以酬則施于運動者必十倍於所受故請看戲亦運動之一法也他處亦然好在北風氣不相識者彼此
招呼人亦不以爲諂反謂其善於應酬必能辦事梅貌美噪好舉止大方小子和一流也今日所見之戲並不足
奇所奇者幡然老翁二十餘人見梅出張口叫好爲可怪耳

八月十一號晨起八時半到會昨接通知本定此時開會乃到者僅五人簽名畢即走入會場其地爲學術委員
評定會面積約一畝計中設會員席可容數百人兩旁安闌干外仍爲會場之旁聽座約各可容百人本日
即於東首之闌外將大餐檯銜接作一直線兩旁排椅七十餘張爲茶話之所會員東西對面坐主席設於檯
之一端上坐五人部員二人校長三人一爲崑山人方遠光復時會爲縣民政長今任北京師範校長年已六十
餘小面白髮談鋒甚健謂此次會議不宜多費時日凡總長交議之案固應議決其餘可不必再提議案即使有
不得不提者當由會將議案油印發給各會員帶歸研究俟明年開第二次會議時再議紛紛聚訟均未將部定

會議細則一觀蓋會員但須依法會議至於此會之有無結果自有部中諸人負責不必吾輩臆慮也旋有人問此次總長交議之案究有多少部員答因總長公務甚忙故尙未交出不知究有多少也至十時方陸續到齊共七十餘人僕役送點心至每桌各兩盆紙煙捲一盆或默或語或坐食良久始有人發問此會究竟如何部員言總長之意因各位天各一方向不相識故先開一茶話會大家會面至於正式開議須俟至十三號云其實七十餘人一時問何從認識仍私語者私語默坐者默坐又久之次長出各會員起立次長立主席位發言部員分立兩旁次長言聚全國師範校長於此實爲民國以來第一次諸君經驗很富故本部極表歡迎三數語畢卽入於是各會員仍坐而閒譚後均厭倦部員言今日之會本可不限時間行動亦不妨自由語係對個人而發並未公布於是聞者紛紛出未聞者見人出亦隨之而出抵寓午飯寄覆各信下午至民樂園觀劇正桌每人二百文近晚雨未出外在寓甚悶蓋北京之屋皆矮又蚊蠅甚多故窗戶皆緊閉僅有竹簾以通空氣人居室中如居牢獄焉

八月十二號晨起校長會議事務所送來開會節目單(一)宣告十三號上午八時半開正式會議(二)教育總長指定北京高等師範校長陳寶泉爲會議主席(三)舉行開會式程序教育總長宣布開會宗旨大總統特派員代致訓詞教育總長演說教育次長演說主席答詞攝影(四)教育總長提出諮詢事件人格教育與生活教育二者不能偏倚求所以實行之方法師範讀經方法使附屬小學模範之價值便教生練習應如何規畫進行法師範國文當如何遴選教材對於畢業生已任教員者攷查其成績當用何種方法對於現行師範規程有無修改之主張(五)會議時部派出席員姓名錄(六)到會校長姓名錄觀今日情形手續尙

完整惟女師範女校長到會時據余所知會場不設女會員席不知如何處置又校長姓名錄亦無女校長名目不知是否遺忘抑另有辦法至總長提出諮詢事件是否即提出之議案亦不甚明白念開會後即無終日閒暇今日擬遊三貝子花園即萬牲園又名農林試驗場在西直門外往頤和園時路過之但地方甚大兩園不能一日兼游耳自西河沿往進宣武門北京內城之南門有三正中曰正陽門左曰崇文門右曰宣武門進宣武門自南而北一直爲大街闊數十丈過牌樓二以其在西也第一座牌樓曰西單排樓第二座牌樓即曰西四牌樓不知其故抑當時本有牌樓四日久而毀之耶左進崇文門而北亦然此宜記者大街之兩旁爲諸胡同西城各機關如前參乘兩議院學務部今之教育部均在胡同內蓋北方之胡同即南人所稱之街而其開闊大於南方之通衢亦非目覩不能知者保三自津來信云今日可到京住乃姪所約下午往飯既至知尙未到即出另雇車至西直門講明車資一百五十文車中東望見莊王府在麻狀元胡同前即庚子之役竭力提倡排外之一人既抵西直門又另雇車至萬牲園講明車資八十文蓋如雇一車直達恐車夫無此長力若緩步又需時太多就全路計之中途換車一次可矣不必三次致涉糜費園門前設櫃售票如車站然每人錢一百六十文持票入門亦有人驗票至庭中見東西兩門即從東門入動物園面積大如無錫公園而四圍曲折皆河有木橋多座綠陰茂道風景甚佳河中有鴛鴦鸞鷖之類河畔設動物園內畜象駝狼猴鹿麋羚羊之屬駭色特奇若南方所織之標條布全身皆白黑帶間之且各就其所在而異背與腹則黑帶白帶如肚帶然餘如畫之有輪廓回環曲折無一處錯誤孟子朱註麋鹿之大者今見如小黃牛羚羊之體段亦如小黃牛但其角則羊耳象大於牛倍度亦類牛狀則如教科書中所畫自動物園北行稍西即植物園分菜蔬花草果木雜糧爲數區每區約占地七八十畝前

後左右皆河徧種荷芡可通船向嘗疑北京天寒植物必不發達今則見南方所有者北方均有之并有南方所無而北方獨有者菜蔬中除南方之茄及冬瓜外又有北方之特產茄大如瓜而圓瓜大如茄而扁花草中最奇如仙人掌不扁不圓孤幹獨立高二三尺作鹿尾狀惜未得華鑑遠君同觀之草棉開花正盛各色俱備有稻數畝在隔河橋危未敢往觀全園地約十里而方夾道槐柳成陰如鄉村狀北有幽風堂茶店兼售酒飯精雅同常熟逍遙遊迤西長廊曲折又有茶店數家暢觀樓高聳人雲未及登使登之必全園在目至豐春堂宋教仁長農林時曾居之有紀念塔惜未數年基址已壞矣及南離河遠澗大井一口安輪軸環以水斗半露井面上復蓋以輪輪齒相銜上輪轉則下輪隨之斗中之水卽傾於白鉛器內流灌各處其製如南方之桔槔但南方之水斗排作一直線而長此則圓轉如環占地少而取水獨多宜用於井駕驢工作正勤不容細察竊以爲旱地可取法也過照相館見規則數條載有禁游客帶鏡箱自照又該館只照相片不照風景謂園中諸景已石印成冊覆照便招是非訂此規條免人口舌措詞不知何指園直轄於農林部必部員手筆黃君子彥在園司職務未往候所至較他人已多然僅全園三分之二在園約遊四點鐘之久出雇人力車至西四牌樓言明錢一百二十文其地爲西安市場入見景色荒蠻與東安市場較有天淵之別出復雇車至東安市場蓋西安市場與東安市場對峙中隔三海及前清宮禁車進西安門卽紫金城之西門前爲總統府後爲副總統府經白石橋一望皆荷花橋東西各有坊曰金鰲曰玉螭金碧輝煌再東則前爲慈甯甯壽諸宮後爲北上門景山壽安門內軍禁森嚴北上門一帶均有內監及清庭衛兵巡行遇客步行必易被嫌遭盤詰故今日自西四牌樓至東四牌樓均雇車得穩度捷往而不受軍禁森嚴詰問之累在車中常自失笑蓋如明告車夫欲從何處行人必疑有他故不肯往矣遇周君

幕範等談之均笑余癡而黠以爲伊等老于京華亦未一履其地云

八月十三號晨起赴會場頗整肅總次長演說大致就明日提議之第一案人格教育生活教育發揮根本於大總統之國民學校令因既有國民學校必有國民教師師範實造就教師之地事得不預籌造就之方法揣其意囚有國民學校而師範學校之課程及種種辦法不能無所變更諮詢之六案實連爲一起攝影時有喜坐第一排者人謂後排光華誘之使起大有小學生攝影時擇坐不定狀今日女會員入席者僅楊達權一人在各會員之間坐第三排而會員姓名錄未著余以爲此種辦法尙欠斟酌苟能在姓名錄用女會員名義標出則一視同仁人無閒言矣日前尋新建會館不得今日往長巷下頭條胡同尋南昌會館擬尋得南昌會館後再問新建會館乃二館並立一處曹學監長兄翰廷以知事覲見在京談次知家中並無特別事故蒙允即日寄書江西勸令到校余同寓王君子掄奉天人向官江蘇亦以知事覲見下午無聊約往天樂園觀小丑張黑兒演窮秀才作賊形容盡致足令讀書人同聲一哭京戲之佳在描摹逼真無伶人氣象黃昏侯君保三來寓旋辭去

八月十四號晨起循例到會是日本有三議案會員陳述太多自八時半起至十一時半僅舉一案會長猶難宣布討論終止至第二案討論未半已過十二點即宣告閉會按第一案人格教育項多數主張尊重舊道德生活項多數主張練習勤勞第二案則江蘇人反對讀經他省又以爲讀經足以救亡余以爲讀經已有明令規定吾輩不做校長則已如爲喫飯計懸棧不去則不得不服從中央命令徒於會場標示一種矜奇好異之氣概無益也到寓已兩點鐘同寓王君約遊宮禁開放各地遂雇車至西華門購票每人銀三角入門右爲內務府今爲清廷護兵所居廣場一片有河自西而東環抱作弓形中設三橋凡居中之橋與路均刻雲龍琢工之細狀物如生

覺一石非數萬工不可橋南爲太和殿其狀如各省之大成殿向見頤和園殿柱之大疑世間無此大木今就已朽壞者祭之係一大木外包木片數層再纏麻絲加漆故大無與比庭中叢草沒徑窗戶均剝落從太和殿東側門入見太和殿後爲中和殿再後爲保和殿塔均高出平地數丈人往必歷殿而升所謂天子之陛九級是也分中左右三路中爲皇帝所往戲擬一履其地見雲龍雕刻之細使人有不忍踐踏意保和殿前有銅龍銅鶴四銅鼎十龍鶴古色斑斕栩栩欲活又有缸四云係黃金所製叩之潏然太和殿兩旁爲體仁閣方略館出至殿東爲文華門出門北爲文華殿南爲內閣再東則東華門今清史編纂館卽設門之北首此行一路細觀因王君力衰且所至必稍憩息爲時甚久後又過清庭居處計余遊已及全部四分之三矣至東安市場喫茗遇保三松雲慕範諸君本約余晚飯因有王君同行不便舍去二人食雜點當飯歸卽臥北京至晚十時店舖已閉門晨起獨早此從前之良習慣至今未改者

八月十五號今日爲星期停議昨晚接大哥明信片云有人託購象矢謂可治瘴氣病見者無不失笑旅館主人謂有此物外城大柵欄左近有同仁堂藥店最著名余卽徒步而往藉觀各種商店情形乃見購藥者如雲有巡警在門外彈壓如無錫楊慶和銀樓之開市狀據稱無一日不如此蓋信用卓著已數百年也及問之并示以原信答無此物後遍詢各藥店均答以無有乃返寓下午慶樂園觀戲角色頗不弱北京之戲實較南邊價廉大約前門外及內城之東半城各戲園均經余寓目矣復大哥信言象矢不可得憶動物園曾有象其矢未知可用與否等語

八月十六號今日議讀經案仍一派竭力主張一派竭力反對主席言當討論讀法不當反對惟如何讀法一時

却亦難定請退還教育部俟修正後再議於是提議國文案其實此案謂國文宜求清淺切於實用不當重論說已不啻明言其故乃仍有議讀經史百家雜鈔請著爲令甲者至提議整頓附屬小學案有謂每星期試教九時師範附屬兩不得益不如併作一起完全由師範生試教如此附屬小學可不請教員以省經費此語甫畢即有人謂附屬教師因有試教關係受俸已低于前責任亦遜于未試教時師範教員又舍其教育責任致教生無師承收效頗難此後宜以師範教師資格管教附屬高其俸給又謂宜調查國內附屬小學之可爲模範者宣告大衆以資觀摩討論至此主席宣告終止指派起草員大約會場一發言即有起草員之資格多下半年日之忙故有始終不發一言者有時常起立發言以健風頭者最可咲者如某會員誤以爲師範學校程度之高下由於所立之爲省爲縣而異令人驚疑注目十二時散會下午大熱寓中不能安居即雇車重游萬牲園覓白象矢購票入園間看守者據云另有發賣物品處伊等不能私售今日天氣酷熱品茗於林蔭深處亦不能耐恐將下雨即往發賣處詢以象矢當作珍物每洋僅可購五粒開有發票至出門處即有人將票收去爲稽查是否私賣之證計象一次所遺約有十餘粒日食米一斗及草料可不另籌費至是否可以愈病則余不敢知矣故未多買將來如有人需用此物託京友購買加車費遊資須合洋一元猶必好游而篤于友誼者方肯爲之且萬牲園之象僅此一頭動物之死者甚多象亦不能久存使無象則矢又從何處求耶歸時僱車至東安市場言明車錢二百六十文此次車夫經北半城進地安門東南行非從前所由路兩旁商店景象無異吾無錫之推官牌樓途遇周君慕範談其家太夫人病日竟失明現在各機關時時改組人多於鮑使離京歸省所事即不能繼續頗覺爲難仍食雜點當飯沐浴一次化錢三百文仍尋常盆湯其最高價有半元一元者長安居不易可見一斑僱車歸寓又去

錢一百二十文

八月十七號上午如常到會保三發起一女師範校長談話會徵集各方面意見以便共同提出議案付會場討論約今晚八時在北京醫院會集午後天熱旋即雷雨故未往北京果類甚多有以糖製果如南邊之蜜餞者名果脯杏仁蘇荔亦著名於路見娶妻者鳴鑼張蓋僱夫均衣醬灰色大袖短褂腰繫紅帶頭戴紅纓涼帽中雜大鼓七八面新人坐轎四人舁行轎前吹號筒筒以銅製外包油灰與蔴使下截相大如近人所吸之香煙杓繫繩一人背負前行一人在後吹之又有南人所謂鑿架者多件皆木製金漆轎衣綉花甚麗一紅而二綠綠者係伴送人所乘後隨驛車則喜娘乘之北京除娶妻外無人乘轎亦無轎可乘語言如彼此遷就對談略緩尙易通曉惟街中叫賣之人則細聆之亦不能辨猶無錫人之賣豆腐花者但喚碗也婦女遊行市物并入茶樓酒肆者頗多此風起自滿人近已相習成風不以爲怪警廳取締甚嚴如戲園之分座如茶樓之另包一房然猶到處生事防不勝防居室必閉窗戶出外必穿衣服雖苦力無亦膊者夏以避蠅冬以禦風不特有益衛生兼有利于觀瞻故談警政誠全國之冠非他處所能學步也

八月十八號侯君保三約余去山西可游太原并參觀學校持有教育次長梁及天津商務印書館某君函可借宿太原商務印書館余亦覺在京已倦遊遂決計同往允翌日下午四點鐘至石駙馬大街北京醫院晚飯後並轎出前門趁車

八月十九號自北京往山西之鐵路曰正太余以爲必自北京搭京漢車至正定府換車而至太原孰知須過正定府至石家莊方換車下午七時在前門總站買北京至石家莊三等票計價三元三角爲路五百五十四華里

七時半開行至夜三點半抵石家莊車中客少可勉強臥惟恐失時故臥不能安石家莊爲直隸至山西之要道商店甚多辛亥革命吳祿貞被刺於此墓與正泰車站並左爲參謀周君右爲參謀張君種樹築牆立碑占地畝餘余等下車後卽有永安棧接客者攜燈相迎導客往棧至則見棧房甚寬敞大門能容車出入入門爲廣場所以停頓車馬者兩旁爲廊房卽過客所居門懸竹簾應用玻璃收拾尙整潔每房一坑以磚築之占全房之半三面均接壁就壁繪坑緣上舖白氈毯中置坑几兩旁坐處卽爲臥所蓋南邊三牀之面積不及北邊之一坑待客甚恭問何時往何所作何朝食囑客安臥謂必不誤時至天明果喚客起他客居近者亦互道勞苦情景與南邊異余等食雞蛋果腹房飯迎送共洋六角較南邊爲廉白石家莊至太原三等票每人三元九角晨七時啓行車較南邊小而狹搭客亦不多茶房無手巾供客蓋民風樸儉惡浮費卽與之亦必遭斥責也近京買賣均以銅元計算至此則又行錢碼初見錢碼交易甚奇遇賣果者每個索值二文戲與銅元一枚取四個令找錢伊忽索余再給銅元一枚再與余四個余言其計數之不準伊曰客自誤耳此間銅元一枚尙作制錢八文找余兩錢而罷萬山重疊車繞山盤旋或穿洞而過洞凡十餘處長者經四五分鐘始出山高入雲巖石壁立狀至怖人過娘子關站客言關在車站之西南古時之碉堡烽墩及關門尙存旋果見山巔有石砌之方城二殆卽古之碉堡歟惜未一見關門爲憾山多則澗多澗水曲折匯而爲河水急泥紅勢若江潮然河身甚淺中多石子無平地人畜往往亂流徒涉而過植物均種於山腰穴山而居偶有屋必平其頂爲晒場蓋終日所見惟山平地甚少故貴之耳過程家隴底見車站搭白石子排地成紋中種雜花頗有巧思過片泉平地漸多山邊有牧羊者一人驅數十羊如南方之驅鴨然車過山洞煤煙無所洩盡吹入窗余提火被至窗外揚之不意被中藏紗衫一件遽墮於橋

石上越二里卽至芹泉站茶房爲喚人往取謂如未被人拾去則代送至商務分館余亦許酬銀兩元然心知物已失不易復得也北人謂長衫爲大褂子謂夾被爲夾被窩六時至太原下車今名陽曲縣雇人力車入城沿路巡警盤查甚嚴抵商務館其經理爲程潤之常州人協理華恂儒無錫蕩口人感佩之浙江紹興人又有交際部程鴻臣太原人招待周摯有賓至如歸之樂

八月二十號上午參觀省立第一師範學校校址爲前清張文襄撫晉時所建書院規模與江陰南菁書院擘髮改充師範校舍甚合式屋亦足用校長赴京會議庶務員梁君徐卽梁次長之介弟約同學監張君履仁出迎導觀各處山西之庶務員司經費出入管理全校事務受巡按使之委任其權同於校長猶前清學院衙門之有提調各省鄉關之有監臨也校長均不兼課另有教務長爲之主持教務故終歲甚逸客至設茶用托酬應周到卽小學亦然全乎官場習氣而學生則甚儉樸可喜江青布操衣袴粗鞋布襪與春間所見蘇州苦兒院學生同入宿舍見係土坑每坑五六人不設帳蓋北方無用帳者亦習俗使然也夜寒已具被褥質樸如其衣有帶旱煙袋者侯君以爲非余曰吸煙誠非是然較我南方之宿舍所見惟舶來品捲煙尙去一間過食堂有表載星期二米食餘爲麵食廚夫甚逸有二人蒸麵備午餐問之方知該校伙食分數廚夫承包苟一處不潔卽撤換令他廚夫兼辦或另招人承充使不得要挾以是知該校慮事之周而又歎小人難養南北如一轍也留余等食設饌甚豐特別備飯感且愧下午往省立第一女子師範學校參觀晤教長吾蘇泰與人陳君夔康導觀各室頗宏敞足用蒙養園及初等小學已散課師範及高等小學或課國文或課算術唱歌女教員皆他省人吾錫王君海濤之妹爲學監太原各校設置職員大抵不盡依據規程如學監外有教務長各級主任外有總級任設員多則事權不

一耗費之鉅此其顯著者也晚上省教育科杜君宴客同席除已識外有省視學吾蘇江陰陳君醒齋

八月二十一號上午觀省立模範小學校省立第一中學校中學校長王君濬才爲西人李提摩太創設山西大學時之高材生精明幹練勇於任事凡學校普通情弊無不知之并能首先改良使職員學生奉令維謹出訪陽曲縣立高等小學校在途次飯館喫飯兩人共用錢六百餘文肴饌甚盛烹調亦勝於北京既至校長不在校舍監出陪有教員二人問之尙明通教室三處學生七八十人年需經費五千餘元細爲計算教員俸給每小時合銀五角僅占全年經費五分之一其餘如何支出頗難猜測辭出陪陳君醒齋及省教員會會長蘭君向青約住公園啜茗四時侯君在第一師範學校演說晚上第一師範第一女子師範省教育會合作東道主余因日間受熱勉強陪坐歸即臥汾酒爲山西特產託商務館代購五瓶共十二斤價銀二元七角六分

八月廿二號晨起在商務書館早餐七時起行程潤之華恂儒戚佩之程鴻臣諸君爲送行李至車站梁君徐王濬才陳醒齋陳燮康諸君相繼至旋各握別車站在太原南門兩山東西並峙如鳥張翼車行常傍東山與西山愈離愈遠過榆次縣山爲高原所蔽不可見至北合營車行如在釜中兩旁皆高原高出車頂望之如山越東趙村見高原之下層漸露大石下作深黑色上略淡蓋山脈之既伏者將掀起也居民多取石鑿而方之備建築用過口口羣山糾紛莫辨主賓復過山洞二較前遇特長山奇峻澗水西流如故至上湖則山洞聲起澗中大石如雲臥水細而急仍西流過山洞一兩旁皆高原與澗水或卽或離澗中不復有石關數十丈乾涸如平地鐵路夫役方疊石作隄過壽陽澗不復見僅有溝斷續至芹泉又漸有澗水皆東流嘗聞王君濬才云壽陽芹泉之間爲太行山之南幹山泉下注西匯爲汾河東爲永定濬沱諸河今信然太行山爲國內至高者而不覺其高蓋原之

高卽山之高吾輩今日所履較在江南已不知高出幾千萬丈也抵賽魚有煤礦陽泉尤多設有保晉公司專事開採山西之煤鐵甲於天下惟正太路爲法人所經營運輸不便國家又不爲之謀棄貨於地殊可惜也過亂流澗水縱橫越山洞三至岩會衆峯高聳均名副其實至下盤石車沿山盤旋如羣蟻之行於磨上過山洞四至程家隴底曲折盤旋見南北山巔有烽墩二一圓一方卽娘子關站也沿南山東行未數里山麓有城堞十餘丈設門額曰娘子關車行由西而北過鐵橋徐徐沿山行山勢漸低薄暮抵石家莊以下卽直隸省境昔嘗嘆金陵形勢旌偉今觀娘子關則金陵不足數也在太原登車時程潤之爲將行李交給賓興旅館接客者故至石家莊卽住賓興館清潔不及永成一房一宿一餐索價一元嫌其地之不清潔將往永成卽跌至兩人小銀元五角晚飯四碟兩碗高粱酒四兩米飯無限制云係旅館供客之常例侯君戒飲余笑而獨酌怪其所求之不敵乎供焉侯君倦臥余畏熱乘涼坐候至夜二點鐘登車有南京客帶行李甚多余等則甚少旅館接客者卽將余等行李與南京客行李合作一起過磅得南京客銀兩元方知其用意之所在蓋行李至車站過磅每三等客准帶六十斤過六十斤則加半票之價旅行狀況非親身經歷不能知也天明過盧溝橋

八月二十三號晨七點鐘至前門下車入旅館略收拾行李卽僱人力車赴會十二點鐘逕往周君處取信件並銀四十元東安市場啜茗罷出崇文門至新建館訪曹君翰廷返寓晚飯

八月二十四號侯君約余明日南旋因接大哥信囑再購象矢乃往萬牲園略走一周在動物園見鱷魚二長各三四尺頭如虎身有鱗甲爲前日之遊所未遇購象矢三枚卽出僱車過總統府繞至東安市場遇吳松雲先生周君慕範茗談及出周君言北京黑汁甚好一酒瓶裝僅錢百數十文價廉而合用勸余購買吳先生先歸正議

價間二巡警尾隨於後觀者麇集余異之卽約幕範且去俟返寓往琉璃廠買及出市場四門已閉其三蓋疑余所挾者爲炸彈也余卽告以故並手持當衆示之無不失笑巡警亦自咲其愚旋即雇車歸顧君魯騰託帶歸食物數包并送余白蓮酒及餅乾因物多不便攜帶受餅乾而却酒

八月二十五號北京車站三等客准帶行李六十斤過六十斤則照車票價加二分之一如北京至無錫每客車票銀十五元六角五分須加七元八角二分余行李兩網籃計在百斤外如侯君行李少可混合一處過鈔彼既帶家眷物必不少只可各自爲計因與旅館帳房商將重要物件收拾一籃約六十斤先託茶房往站購票過鈔裝入行李車既畢再以票給余以一網籃自隨並皮包等物送余登車及保三至則行李之重出乎意外楊達權等諸人手忙腳亂狀殊狼狽車廂秩序欠佳捷足者先得個人占坐席可以坐臥外所帶行李又可置於身旁座位間余招茶房覓得一處商他客將物另置座下讓余坐臥客許之其人自京至寧互談頗洽蓋讀書而初入政界者也晚間擬看黃河鐵橋及泰山至德州天忽晴忽雨月光不明悶極側身臥至十一時客紛紛言黃河驚醒起視先見一小山旋見橋偉大堅實車行於中旁尚有兩路以便人行約數百丈誠大觀也河身闊而淺大半乾涸僅南岸一衣帶水據客言水漲時一片汪洋全河苦不能容每至泛濫昔禹疏九河分承黃河之水而緩其勢使歸於海今故道不可復得且河亦遷徙無常不能以人力抗誠吾國莫大之患也過橋畢卽濟南府復睡

八月二十六號天尙未明月光皎潔將至張夏驗票者喚余醒及起正東對泰山喜極不復寐憑牕凝視覺山之稱岳者每有一種偉大尊嚴氣象不復以一丘一壑取勝車行其下亦不辨何者爲地何者爲山蓋其地由漸而高數百里外之地皆山也車行近山如履平地而不知已在山腰月下見三峯並峙略如筆架實則鼎足而立中

爲玉皇左右曰丈人日觀至泰安府山仍未盡復臥晨起過徐州見下車客被兵搜查甚苦符離集產水晶石榴余購六七隻以其物無錫不見售也十點鐘抵浦口站過渡自提網籃一具保三等早相失先至下關站守候十點鐘又乘車旁晚遠無錫收拾行李雇人力車返棹

師範日記節鈔

民國四年一月一日無錫圖書館開幕先日分送觀禮券承高仰山先生送我五券准時往觀禮者人尙不多少頃縣知事至卽振鈴開會館董侯保三君報告接辦後情形駐館辦事員劉素勛君宣布看書規則地廣聲細語不可辨縣知事代表巡按使致詞則聲更微而不知所云矣當館董報告時有地方士紳五六人列坐於旁知事坐上座忽鄉先輩許某垂小纒戴瓜皮紅結小帽蹣跚而前知事讓坐推挽者久之史某繼至戴風帽帽顏上捲過半又與許周旋寒暄其狀態至爲可哂許史皆前清貴官使其不忘舊君古衣古冠入山必深入林必密可也乃仍往來於鬧熱之場與民國官紳相晉接不新不舊真令人百思不得其解

一月九日凡人作事無論大小不可苟且非必爲名譽計也蓋人作一事及其成苟無絲毫缺憾常有自喜之心以爲我素不習此不意今日竟能有成且較他人爲優其愉快爲何如故謂作事爲圖快樂可也若謂爲名譽計則今日掃一地得一名譽明日措一桌得一名譽天下安有許多名譽供人享受嘗聞人言我不貪名譽故感而書此

一月十日榮喜太黠王寶太聰二人均不可特點須時時監督之釐亦須時時扶助之也久未買蝦不知蝦價憶

從前阿虎會每斤浮報錢二三十文爲余揭破今日因試驗炒蝦之法晨起令榮喜往北門買蝦余卽往大市橋見一老者購蝦一籃問其價知每兩十二文余亦買大蝦一斤歸途因有他事稍延及抵校榮喜尙未至久之始歸見已有蝦在狀甚驚遽責其何以緩不答問其每斤錢若干則以二百四十文對稱之分兩不少各無言蓋前令買山芋共錢三百六十文會賺錢一百二十文故不得不防之年尙小似可教誨然本性不可移也屢言之而卒無效故知教育之遺之不盡可恃也

一月十一日躉糠賤時每銀一元可買七担貴則五担賣於居家較賣於茶店担小僅半業此者性頗狡猾結有團體近城各躉坊均爲所包買無零售者若初購於甲繼惡甲而購於乙則乙必故昂其值使苦無所訴其來也往往直入廚下刺探躉糠有無無則其價愈昂俗謂之算命若主持家政者偶不經心則廚夫與通同一氣待躉糠已盡日向主人饒舌往覓躉糠船久不得卽得之其價愈昂主人忍氣吞聲廚夫於中取利人心之壞至於此極本校今日亦嘗此况味飯後使老榮持銀往鄉購買焉

一月十六日生鑿去水中積穢價甚賤去春曾親購數斤儲廚下細察廚役凡担水入缸尙能如法和鑿蓋此輩貪懶性成儲鑿不多卽與以藉口近來未曾躉購日前見担水不和鑿責之以無鑿對給錢二十文令往購買不數日所見又如前責之復以無鑿對蓋此輩知無可稽攷則乘隙而入買鑿時可以賺錢担水時可以偷懶一至微極細之事而弊端百出矣可見慮之於先則省事在後凡此均主持家政管理夫役者不可不知也

一月十九日有事赴虞勾當畢夜宿逆旅走訪老友趙石農未晤翌晨遂安步遊虞山從前遊山均有友人同行頗不自由憶前年遊虎丘則一人獨行且時甚早與此次相彷彿爲平生最快意之舉蓋多人導游或力弱不勝

攀登礙於情誼勉強陪我中心終覺不安反不如子然一身行止自由之爲愈也虞山在常熟城之西北隅半山在城內半山在城外城內山麓皆茶肆設置精雅花木清幽門外有肩輿數乘則鄉先生之官成歸來借林泉自娛啜茗清談者也此輩入茶肆甚早日以爲常且必肩輿往僕攜茗具隨之人初見之無不驚異亦一邦之特色也及余下山入茶肆見學生兩人長僅十一二齡幼約七八歲桌置書包默坐不交一語共傾一甌牛飲久之約八時半各攜書包匆匆徑去想係赴校就學者余不覺失笑二生尙回顧似疑余笑之無因焉噫自古風俗皆一二人醞釀成之有肩輿入肆之大人先生自必有挾書包入肆之小學生一家亦然父兄之教不嚴子弟之率不謹大人先生之於鄉邦其舉動可不慎哉聞之各教員晨起亦必入茶肆一次不則目爲迂怪不齒於同列至晚亦然故全城商業以茶肆爲最盛酒家次之大率晉人清談曠達常熟士夫摹仿最肖聖人復起不易吾言矣常熟爲言子游故里有舊宅在言子巷面南外繚以垣廣約十丈門扃加鎖自門隙窺之蓬蒿沒徑雜樹叢生階石尙完好東偏有井井闌大倍於恆至近亦必數百年物惜未能手加摩挲不知有無題識世稱爲墨井者是宅之深不能知其究竟問之隣人知中無屋亦無門者徘徊久之悵然而返言子之墓在虞山之東麓距其宅不半里墓門向東自山腰及於平地至於通衢初見石坊一中額有言子墓道四字旁列年月及承修官姓名模糊不可辨再進有池池上駕石橋過橋平地畝餘中有石坊額曰南方夫子稍進旁蓋兩亭中立豐碑則清高宗御祭文中也中仍爲墓道惟至此已山麓地勢漸高疊石爲階歷數十級復有一坊曰學道愛人字均樸茂堅勁再進復爲石級過石級即言子墓在焉四圍皆石牆以鐵柵爲門不得入蓋三年六月常熟縣知事謝葆鈞捐俸督修禁探樵之作踐也自言子墓後登山路南即太伯弟虞仲墓四圍石牆與言子墓同但傾欹過半人可逕至墓下墓後

圍牆列石碑七八文曰商逸民虞仲周公之墓碑文皆同惟旁列修墓年月及修墓宮姓名各異最遠一牌爲崇禎之某某年最近則同治年間也立墓前觀之言子墓向東而偏於北虞仲墓向東而偏於南由虞仲墓而下亦有石級數十中立一坊文剝落不易識再下則無石級亦無道路可尋余不欲復返舊路遂直前乘勢而下及抵平地回顧見三石矗立石上刻小三台三字殊秀逸下有大理石四五則皆刻時人題名記字頗粗惡境旣無奇石又在平地本無足記甚矣人之好名往往而然遊畢重訪石農高臥未起蓋新自清江歸也向索委鐫牙章刻方過半強攜出門並約同至旅館飯後督令奏刀約一時許告成

一月廿六日閱學生日記其中樸實說理頭頭是道者竟居多數心殊喜悅惟年少氣盛往往逞情而出不顧忌諱不爲刪去懼阻其興味也大抵見人不是處宜默識於心不可形諸筆墨即鬱結於心不能不發亦宜靈空出之以言者無罪聞者足戒爲主旨

二月一日今日課英文時又有一二人發聲甚高不知學生失禮於教師於教師無所損於己之心術行爲則大不可問昔岳武穆學射於人人死武穆持服尸祝之終身試問武穆之能豈僅善射即其人以射稱亦豈能爲武穆師而無愧然武穆獨事之如斯者蓋事師之道宜然也今之學生讀書不多但悍然自以爲是不與明言將終身不知其錯應令取宋史岳武穆傳讀之如讀之而不知內愧也則余亦可以無言矣

今日各學生送黃前校長家賀禮每人小洋兩角銅元一枚合之得大洋陸元在某綢布店購衣料票一張票後仍書明作銀六元不過較送銀元得體耳此事因余年假時間人言從前供職北京遇同寅中有慶吊事公送之禮派認不過京錢數百文然皆顯宦其節儉可知今中等以上學校每年學生互送慶吊禮物需數十元年少祇

知交結不顧物力艱難且不知難乎爲繼教員亦不加干涉此風不革則所謂教育者可知矣將來必養成無數不知難苦之人才故今日爲學生謀之亦將來經紀家政之一道也惟處事無一定法則可省者省之不可省者亦不能省也如作文然當相題行之耳

二月七日簿記之學列爲功課然運用之妙存乎一心近來女子之任校長者甚多至文牘會計則仍借助於男子安得人才輩出一吐巾幗之氣乎大抵百聞不如一見見一物稍稍留心之積久自無所不能又心粗氣浮者必無一能如本校經費向由縣公署發給故報銷冊收入經常門第二款收縣公署云云此次由教育款產經理處發給則亦應改爲教育款產處餘均板法應行斟酌之處年不過一二次耳一地方有一地方之習慣一校有一校之習慣初次接手審問而詳思之以後卽迎刃而解無所不通民國二年縣立各校除在城五校外餘均以報銷不合法紛紛指駁余曾見學務科人員大罵某校長爲木偶某校長爲弊混其實木偶則有之謂爲弊混余不敢信蓋凡工於弊混之人其人皆小有才報銷必天衣無縫處處合法八股時代之讀書人四書五經外無物足摠其心強起任事宜受此辱現在之學生必有以藥之勿徒沾沾於科學已也

二月十八日踐北萱約偕游虞山車抵蘇州逕赴齊門輪船局及至船去已遠遂進齊門東行至婁門大街奉直八旗會館在焉本名拙政園門前石獅一對雕刻之工爲余目所未覩由東側門人有紫藤一架架朽另以他木支之紛紜錯雜至不可數根大數抱圍以石欄前清江督端方立碑於側文曰文衡山先生手植物賴人傳自古已然端亦不失爲風雅士也遊園者每人銅元六枚全園景物無足紀聯額均俗不可耐兩人歎所見不如所聞旋至玄妙觀午飯出閤門搭第二班輪船往常熟新年出門人少乘客寥寥可數抵埠已晚投宿招商旅館旅館

宿客不飯客各食舖均閉門祀五路神覓食不得託茶房出購久而後至僅粗飯兩盂蘿蕪湯一碗濁酒一壺兩人對飲甚歡以爲此種况味人生亦不可不一嘗之云

二月十九日晨起登虞山謁虞仲言子墓兩墓之間有荒塚一讀塚後殘碑知爲吳王周章墓此墓從前兩游均未見蓋爲虞仲言子所掩也午後攝墓影夜飲沈君雅卓家主人知客善飲請趙君鳳書爲陪趙號拳王猜拳鬪酒所向辟易數巡後座無與敵一技之精似關天授有非人力所能勝者

二月二十日出北門至破山寺唐常建所詠處也今名興福寺因殿後突起一石成福字形往視果然寺中情景仍不異昔登山入三峯寺寺爲翁松禪少年讀書處後被議回籍仍寄居寺中與寺僧結方外交有贈聯云丈室重開且莫論有宋元明現在幾經滄海劫漢公何在猶幸得吾師翁趙相攜同看大江雲字體蒼勁句亦悲涼懸正殿中出寺門萬松夾道至劍門懸崖壁立一回顧如山石欲墮令人心悸由西門入城據聞錢牧齋柳如是墓均在西門外同遊人多不能孤行一意入山搜訪仍屬憾事

二月廿四日按例四年七月至五年六月預算本可在四五月間編造本屆縣署轉巡按使准財政部飭限三月初開報到省急如星火意在整頓國家收入減削地方支出學校爲地方支出之一大宗故不免又起恐慌本年底已屆畢業是否續辦或即停止均在此次編製預算時定之苟不按時勢強與人爭人將疑其戀棧苟默不一語存五日京兆之心將來接任之人必罵今日不早爲計以故往候孫卿先生兩次未遇晚上伊來校表示種種辦法余覺不盡可行然縣立學校權在縣著校中職員不過負其一得又私人談判不足爲憑因約明日由校備文詳縣請示辦法再將預算編造

三月三日保三先生課畢見余曆四年預算並見從前請示辦法詳稿批詞等件異常驚怪曰子其如斯而已乎余曰余自揣才力不足有爲在己已一身皆累在人且疑爲戀棧任職一日盡一日之心以待賢者他非所知也伊嗟歎而去

三月十二日附屬小學當時縣署本不願開設至相爭不下後蔣仲懷先生出作調人比照四鄉小學經費月准領銀二十五元八角三分除職教員俸銀二十五元外僅餘銀八角三分教員無飯食僕役無工資此中調劑之法全恃師範方面支出處處留心藉資挹注故凡校中用具除元年度黃前校長購置外餘均節縮而來各同學將來如担任本校附小教職此節不可不知也

三月十六日上午觀師範生試教較昨日似勝一籌孫北宣侯保三兩先生同至目覩心營非常認真以余所見宜改良者小學生對答聲細如蚊且答時欷側其頭彎環其身若不勝羞澀者然二三年級爲一年級之表率小兒富於摹仿邯鄲學步僅半年已維妙維肖治爲一爐殊屬可笑教生聞此極細之聲音自己尙聽不清楚反問各小學生曰汝等曾聞之否其不明事理尤爲可笑應代述一遍曰某某言如是汝等以爲然否乃合第一時參觀後默存於心至第二時顧藝菊孫苕英試教均能代述如余言心頗爲慰猶石勒讀漢書至張良阻高祖封六國曰賴有此舉耳

四月廿五日晚上閱學生日記見有患頭痛者三十二人中幾及三分之一此種常病較偶發熱爲苦西人惟食阿斯匹靈一藥當時雖獲效日久仍發不能絕根余家兄弟子姪均染此病而余尤重當弱冠時幾無日不痛歷三四年之久在錫各醫家嘗試已遍無一當者因府試至常州聞朱子衡之名造門求治見病者滿屋無容足地

以次及余按脈久之曰此胃熱也呈閱舊方曰均庸醫問余曰子讀書乎曰然曰子聞頭痛醫頭脚痛醫脚乎若方列川芎菊花鈎鈎者皆是也要知頭痛病不在頭治頭痛治其標也治病必治本子之病已三四年服藥亦必三四年而後可愈毋求速效既愈當不復發願弟子書方已口述藥名果他醫所用藥均無之以石膏爲主輔以元參伏神等品囑飲三四劑必得小效若嫌往返跋涉卽以此方改製丸藥逐日食之可也後果如其言尤奇者一日偶忘病卽復發連服一二年病卽不復發至今安然朱歿余弟患頭痛無醫可治不得已取原方試之竟不效蓋頭痛雖同頭之所以痛者不同也

四月廿六日閱報室時常有物亂堆學監曹先生已屢言之不知清潔者依然亂堆學校與家庭無異在學校不知收拾在家庭可知此後宜養成清潔之習慣見有宜掃除者卽隨時喚校役掃除之不可以爲非我之責無庸過問要知獨善其身不能兼善天下非聖人所許若必責任所在而後爲之不肯於責任外稍盡義務此被役人之存心也余從前與黃前校長相處凡校長職權所在未嘗敢侵犯絲毫獨管理工役及一切對內對外之勢力所能爲目光見到者不必曾受委託常先代爲之雖不敢謂合法亦庶幾有公德心者今日之師範生卽將來之教員與人共事亦當如此

五月九日余觀同學日記凡加圈者不僅賞其文之佳或教員訓話有須謹記者或校役不力有須懲戒者或各個人言論足以補助身心者胸無成見隨筆圈圈故有所言甚切當因檢閱時已在深夜不及加圈卽懶而不圈此種圈點何足爲憑乃竟有因前記多圈近記無圈致懷疑莫釋者此則仍不脫孩子氣也大抵遇改筆甚少上加閱過二字卽係佳文否則有別字有疵累亦批閱過二字人不笑余無目者幾希所謂文章千古事得失寸心

知諸同學不必求陶多但求自己無別字無不通句可也

五月十七日膠棍已損壞多日任校役等爲之膠汁四溢汙穢不堪上午爲收拾心殊憤恨若購現成膠棍兩個需銀一元三四角大家喫公家飯即應爲公家節省使余安坐不做人必無譏余者全係良心問題而若輩竟無從感化中國之所以弱也今日實習體操甲組參觀生竟設席安坐使來賓見之其謂我何行將畢業畢業後不再由教師指導而不合法之行爲層見迭出令人氣短亦思學校設體操一課非欲振作人之精神乎學生方直立操場不敢告勞教生獨安坐於旁如看戲然天下寧有是理

五月十八日竈下缸脚俗例由廚夫售賣與人人心不古往往將餘下粥飯亦雜置其中冀多得錢今日挑去時余目視其收拾一担中飯粒居小半若論國法可殺矣人之精神有限終不能處處顧到治家總以不多用僕役爲第一義如勢不能省則宜處處留心之

五月二十日前聞縣立高等小學各教師往蘇參觀歸述苦兒院辦法之善思往一觀今日無事個人提前午飯趁十一點半鐘車往抵蘇即雇人力車車價八十文院屋爲常州盛宣懷產光復時收作苦兒院用院旁設出品所即售院中所出之品如藤椅皮箱皮鞋肥皂木器及各種用刀價尙平廉惟物不甚多視畢即出大門在其西常閉左有綠色小門一通出入及入闈人索名紙與之持以入余隨而往草場一片圍以竹籬籬邊均植花草其役亦學生任之至招待室坐俟片刻一教員出辭姓字和之年約四十餘無錫人頗篤實無一語虛僞可親也惟在院已四年究竟內部用款若干不甚了了招待室之左毘連三教室最近一教室年齡最大程度亦最高導余往觀時或習字或看書或演數學數學已學過代數二次方平面幾何等字則大小楷均工整向例上午學文藝

下午作工因見伊等不作工詢之知工場教師請假故退而自修一律青布鞋土布短襖狀至樸素然處處見苦兒真相學問工藝無一不能令人肅然起敬既出導至膳堂堂共五楹橫列長桌數十張據稱每食人素菜一盂惟星期三六有小輩如蝦鷄蛋之類星期日則人給肉一塊稱大葷余常以爲教師之與學生猶將帥之與兵卒必同其甘苦方能使之服從均人也人粗糲而我獨梁肉返躬何以自安况天下事未可知吾輩不耕而食不織而衣一旦時窮勢促恐求如苦兒而不得然學界中人往往未易語此此教育之所以不良也詢以會食時教師是否同食亦以不能茹苦但監督之對膳堂之後另有一小學生教室時適女教師監督習字師生均寂無聲息略一觀覽卽出至浴室所設均係木盆庭中有學生二在井旁洗滌被單互相補助各執被單之一端用力絞去水分如兄弟然一種親愛之情令人望而生憐旣出折而西爲各種工場如木工藤工均一教師監督十數學生工作最可觀者爲金工之作鐵器爐火方紅一學生鼓囊教師執鐵二學生繞而鎚擊之餘則執銼治鋒或執刀削口與尋常鐵舖無異惟學生則均識字能文者也識字能文而忘其執役之苦受工師之驅策我愧不如矣此行擬調查其內部之處理并用款之豐蓄用款不可知內部處理又多半女教師事未易得其真相遂辭出將來全體往觀若晨往暮歸觀其飲食觀其授課觀其工作得女教師而詳詢之必能處處貫徹觀第三師範附小所以師其教授觀苦兒院知吾輩投身學界所作事必有益於社會以辦理此種學校之心辦理尋常普通學校未有不到處歡迎也

五月廿一日孫卿先生至以下學年事相約究竟如何辦理余實尙未計及屢次請渠另延他人堅執不許余之欲去實出至誠渠則以爲有意爲難延擱已久若再無解決必彼此不歡遂許以半年至陰曆年底此班畢業止

由北萱先生轉國立約定議焉

五月廿六日學生日記往往積至數日然後交出閱之頗難一事因循他事亦必因循應設法督促改良擬此後但閱當日所作以前補記者概不補閱如此既可改去學生一種延挨習氣亦不致勞逸不均上午參觀實習覺要好之心都有惟嚴厲態度應去之在競志授課適有某君參觀第三師範附屬來信口雖黃言單級教師之嚴厲若相罵然以爲大不合法余不敢作昧良語強起與辯可見天下無真是非作一事只求自己信得過他人之諛我罵我均不足計宋司馬溫公明東林諸君子當時且目之爲小人吾輩更無論矣至人之是者我不可言其非此亦良心問題也下午訪黃前校長託請振漢先生帶去合同兩紙約明日去取沙先生合同託鑑遠先生帶去下半年事完全辦理結束舊教員擬一律挽留

五月廿八日天熱如昨頗不耐煩下午命停止體操以免有礙衛生四時半即開批評會六時宣告休息晚飯後續開至九時畢將各教員加惠學生許維持到底并公同挽留曹先生之意當衆宣布并託級長舍長代表余送合同請蓋印冀得早日解決蓋師範事辦妥即可布置附屬也

五月卅一日去冬之冷爲從來所未有今年之熱亦從來所未有天運循環無往不復猶國家不至大亂必無邪治也今日日本有作文課因參觀筆記若陸續令學生抄寫必難如期收集故與北護先生商令學生改抄筆記將來編輯成書確是一種最好之成績閱學生日記遇見別字不爲改正但旁加一豎作爲符號讓作者自己去想苟有志好學逐漸研究當不致一誤再誤也

六月五日上午在競志授課一時帶去新授國文教案一紙擬即請保三先生改編模範教案分三時教授據云

伊校師範班迭開批評會非跡近攻擊即橫加非議從不在教授上研究昨日貴校之會何大方乃爾令人驚奇擬視學兩星期後當帶領此間實習生到貴校參觀批評會俾知女子亦有顧全大局不從個人之得失著想者未云貴校學生頗可成材擬作一模範教授給大衆一觀以盡教育教員之責任但無實在閒暇時間可否約一日期來競志參觀余曰暑假在即須預備攷試君又須往外視學只可臨時再酌不能一定伊曰貴校學生不來此間學生必到貴校一觀也按保三先生不輕許人此次竟獎借逾恆蓋比較的意思也其實彼校批評會情形與此間一二月前何異余不敢言此間同學從前之短亦不敢以保三先生所言爲得意識之俾同學知一校有人才即全體均得美名不可有妒忌心亦不可但顧眼前起無理之爭執苟處處實事求是是非久自見也以後宜隨時隨地人人格外要好

六月七日師範有法制一課議者以爲不倫不類實則生今之世普通法律知識無論男女不可不備也丁知事之糊塗鄭承審之貪賄幾人人能言之往往甲賄則甲是乙賄則乙是一案之事旬日之內可更換其是非新安會館案鄭左袒典業余憤不能平初三日具狀有縣長前後批諭自相矛盾是否有效有此種司法謂爲合於法理某等實不敢知有縣長不論案情是非顛倒其如司法尊嚴何云云見者均爲咋舌今日批示竟不敢回罵一切順從民國官吏如此無恥如此下賤吾輩縱未喫虧小民之怨氣不伸者多矣

六月十一日阿荅之不是處可恨阿荅之是處亦不可忘尋常雇役往往見勢不可無其人則營私舞弊百端作惡有阿荅在足以抵缺內外皆不敢肆即阿荅本人亦自知託命於校無可活動不敢妄生他想吾輩所以宜優容之也至於平時教督所以望其成全校均有此心即全校同負此責凡有言其不是處者余甚歡迎焉

六月十二日下午整理教案并謄清參觀所得開批評會各生所言皆有見地惟教案太略授課時僅重形式精神尙嫌不足此事關於學力然亦苦無人指導國文教案每星期七紙使補偏救弊詳爲修改非有半日功夫夫不可又須時時參觀實習方能知何處當改良何處當補充也

六月十三日天熱則宿舍中多病歷年如此昨晚孫汝舟忽發熱華實孚先生疑係猩紅痧聞乃兄如山在縣署卽遣榮熙往久之不至余卽自往見學務科聽差正通電話至教育款產經理處因託代詢行踪答稱未到旋令榮熙往車站守候及歸云未見方知今日實未來城俗云急事緩做心雖不安強示鎮定乃八點鐘忽稱手足麻而筋絡拘攣心爲大慌卽託汀鷺先生借通電話至普仁醫院請西人李克樂來校診視據稱尙非猩紅症惟不可不防耳此時先以生礬令食覺口澀知非急痧心乃定蓋病之最足驚人者疫癘與急痧其他均可設法今晨僱船送歸病已稍減諒可無妨上午收國文教案孫先生忙偶代其勞下午因連日少眠倦極欲睡又慮滿屋太陽睡必染病遂往外閒步至家省母及晚回校

六月廿七日閱學生日記知有負病勉強在校者於生命有關於學問未必得益擬設法託紹介人勸其暫歸醫治以冀速痊他校校長可以實做惟本校不然對於教室猶一級之級任也他教員請假宜設法爲之代理對於僕役則負管理之責猶他校之庶務員也對於銀錢出入雖有會計員不能不任其責如本月所領經費僅數償還各店賬一月開支全恃借墊會計室無錢發付惟向校長取足校長不能不負責也種種困難在余以爲並不新奇亦不足恨比之鄉間小學一教員教授數十兒童校長兼教員兼會計并兼聽差已不啻有霄壤之別作事如行文須相題行之富家翁出必輿馬食兼數味使小家子效之其家無有不敗者使縣立學校處處與省立

學校比卽小家子與富家翁比學校以能造就人才爲榮不以門面裝飾爲榮教員以學問優長忍苦耐勞爲勝不以妄自尊大強人加敬爲勝近日有人謂此間教員學生如何不盡禮夫教員十餘人究竟如何盡禮自有公論非一人所能捏造學生三十餘人亦未必人人不盡禮安能一概抹煞初聞之異常懷喪繼思此輩實無如余何又無隙可乘故作此不痛不癢之譏誚耳爾相如有言以秦王之威相如尙庭斥之何畏廉將軍哉當元年冬議會聲勢甚盛本校已不絕如縷此輩何在均與本校有休戚相關之誼何當時不敢建一議設一策乎則今日所言無使人懷喪之價值可知也願師範同人主持公道相與扶此殘局願學生毋忘所聞所見注意於學問道德在今日勿貽人以口實在他年必力反時下人之所爲是則馨香禱祝者也

六月卅日上午在校授課下午閱批評會紀錄至四時方告竣五時往孫宅弔喪回校時過公署前見地保催征不力被追比者累累因思告罷坐墜公款終歲不知所作何事猶自誇曰教育事業以爲於社會有莫大功德誠不知羞愧者矣農人火耕水耨半菽不飽所餘盡供諸官一班高等游民分潤之不公不平則天下之亂以起故無論教師學生均不可不知懺悔之法懺悔如何亦惟各盡其職分之所當爲者而已然能知此者有幾人哉

七月廿四日附屬招生廣告已發貼恐學生多則無屋可容擬就後園建屋兩間闢一教室進深三丈分作六架每架五尺以五架爲教室一架爲走廊工料力求節省擬不出百四排須每間闢一丈五尺進深三丈分作六架每架五尺以五架爲教室一架爲走廊工料力求節省擬不出百元木工尙易核算泥匠則最多虛僞索價懸殊約其思索後再談工人去後余將去年之屋每架用瓦若干蓋磚若干鋪地需磚若干逐一數去照現在之市價及現在所建屋之尺寸有銀三十元足矣牆不在內明日當另就熟悉工程者商之下午鄒同一先生來談次詢知縣立第一高小學校聽差每半年每人可得節賞約二十餘

元工銀每月每人二元售糞每人月得錢四五白文合計每人每年可得銀七八十元無怪此間之無人可用矣十一月廿一日單級可以讀書之時機甚少貴在教者不論何時不論新授複習凡有可以讀書之時機卽令試讀一二過學校成績所以今不如昔者未始非誦讀時少學生之於書如過眼煙雲久不復親也今日接縣轉教育部飭二件一限制流通教員以爲教員兼課多則有教授而無管理並無責任心弊害不可勝言二提倡學校團縣教育會發起縣屬各校聯合運動會成否雖不可必然備預不虞古之善教今日乘第六時未授體操告學生情形使公舉附屬司令四人藉事預備並令整理附屬主任室將實習用具置之一處預備實習亦在其內女教員預備室向在宿舍中間亦宜拂拭清潔俾女教員來者有歸往否則我偶然疏忽人不相諒必退有後言也十月廿四日昨夜未九時卽睡及胡先生歸均未聞知喫得下睡得着是余之好處前六七年一病幾殆身體反轉弱爲強亦奇矣哉晨起擬代裘先生課伊客氣遂未果兢志已往請假懿瑾信卽交聽差帶去無事做往縣署借各校辦畢業案卷閱之有合法者有不法者繕寫之工整則以縣一及乙種工業爲最私立學校則往往一再被駁蓋教員非書辦出身平時又不肯留心世務遂致愈弄愈錯今之師範課程教育一門所以須研究教育令也其實百聞不如一見作事無呆板方法平時文件往來多半不在教育法之中余前將本校案卷儲藏內應接室蓋欲師範生暇時隨意翻閱既可知本校實在之內容又可識公文之程式將來出任一校期高過今世之女教育家倘必明言然後翻閱仍屬勉強必自己見之肯時常翻閱知其中有趣味方能入門未識曾有人翻過否職教員履歷表每學年之始造送一次縣道省部共四份余起詳稿臆正胡先生臆表費十日功夫方能送縣臆表時曾請胡先生往教育科問究用何紙因官紙式樣時常變化使人無所適從不意今日仍發還重繕此事

可與反對因法令無規定且伊之所謂官紙不過一縣用之并非騰表專紙也下午課畢嘗如學字即用縣署之所謂官紙重騰除縣署一份算渠要好通融收去外餘三份共六紙費余三點鐘功夫連重詳之稿一律告成詳文紙已用罄致未騰正余性不喜延擱然事常不了且性急者亦未嘗無弊天下事得失正參半也學生記學校沿革均清楚可觀惟據余個人之意須一事記畢再記一事則所記詳細而不喫力并可隨時參以議論如親屬證則說親屬證之式樣及所以用此證之緣由并後來之如何有弊將來應如何規復如此說得頭頭是道後人閱之方知作者識見及文章之好壞若將數事并作一起必定說不盡許多即一起說盡亦無可容議論之處矣十月卅一日上午裝訂六月至今之政府公報因東拋西散缺少多本故延擱至今昨日貼一廣告竟由內部尋出送來學生尙算有公德心肯盡力於公衆之事聞之知爲某某云本校購此報自三年四月起四月以前闕如偶須檢查非常不便見其廣告欄凡自臨時政府起直至三年底止尙有餘報可任人補購價亦較廉因即寄明信片託周慕范先生補購無論何物余最恨不完全故此物雖非我有然我欲移交與人總不可不完全也不完全則我心總覺不快無事即將詳報畢業之稿件送教育科請孫卿先生閱看免得將來贍正後或有不合多費手續下午教育科借無錫市立第一小學開會召集全縣體操教員商量開運動會辦法旋議決陰曆十月初八日爲開會日每一教室得動作一節如一校有兩教室則在會場准作兩節作一節者聽逾兩節則不許因校數太多時間有限也

十一月四日今日汀鷺先生甚勤奮爲贍畢業表六份余騰詳文至飯後一時畢及余觀第一時實習後至會計室已加封送去矣忘填年月日可見性緩誤事性急亦未嘗不誤事言次相與大笑近來男役如徐棠榮熙女役

如王媽常偷懶取巧余使之狀若甚忙其實惟面從而已一轉身卽事無結果徐棠王媽以爲余相識已久必能容之不知此間僕役爲余私人者惟最初之廚夫金榮其來也因驟不包飯無從下手故商於長兄惜之來校事草創旬日間布置井然其功實不可沒後以恃功而驕並喜與人言笑暑假卽辭去另爲紹介於洋貨店蓋公私之間吾人最宜分辨不可以私害公此等人往往不加深思以爲從此飯碗穩固矣宜加以懲創始可

十一月十四日上午因胡先生不在校校中無人未便出外卽收集前星期教案依次訂成一冊閱婦女雜誌覺古來婦女之能詩者甚多自設立女學後婦女遂少通才亦談教育者之羞也閱監護日誌覺此冊亦可爲成績送教育會陳列惟極不通處宜各自檢點人終不能永久有一教員爲之改削至師範生對於附屬教授管理均稱熱心將來可以付託惟日常喜出外爲女教員之通病今日喜出外一做教師更覺行動可以自由吾終不願此間畢業諸人與時下女教師同也

十一月廿一日友有以書相招者覆稱信誓旦旦固不能如近人之反覆然人生上壽不過百年何妨息影蓬廬享半年窮餓之樂使世尙承平則稍緩須臾再出問世聯朋友之歡報知己之德未爲晚也覺尙尙擬重上午閱學校設備沿革記下午閱學生日記九月份五本畢已天黑目不能見矣

十一月廿二日今日各校均紛紛探聽運動成績之優劣評判員已去尙無實在消息分數單約後日寄來據保三先生云全場評判員均稱本校爲動作合度服飾大方不愧師範二字將來分數發表必不落人後且據評判員云無論參觀何處運動教材總不適當女學之遊戲尤數見不鮮此次女師範所演何恰好乃爾實得未曾有云聽外界輿論亦以爲程某素持不出主義何此次獨肯預賽且若練習有素預備爭勝者然其實吾輩做事不

可一往無前凡歡喜出風頭者一味胡鬧其風頭必不能健故余甚望本校學生保守樸實作風若花團錦簇如時下各女校之偏重裝飾實無意識也將來送教育會成績亦必不惡無論他校如何優美凡本校之物均他校所無可斷言也又學校設備沿革記所抄之小楷工整秀麗余可決其勝過第三師範以予觀之大約本年以字之進步爲最多國文次之易曰滿招損謙受益苟從此不自滿足大家致力於學問品行不愁不出人頭地也

十一月廿五日大總統曾頒發一種文告令學生時常誦讀畢業時須各默一通現在事事均復古此與前清科舉時代所默之聖諭廣訓同言聖諭廣訓余曾大喫其苦李宗師殿林督學江蘇余蒙拔取常州闈屬古學第二及覆試默廣訓漏寫一行致文不能解部抑置第四時第一人得拔貢余則連每年之四兩八錢亦未得到四兩八錢者前清例廩生每年應得之俸銀也現在學生已無知者誌此以資談笑黃昏偶然憶及此項文告放在會計室因非緊要故未歸卷明日當尋出卽作小楷之攷試

十二月十日五年度預算須重造而又不能增減其數目此題大難蓋師範仍一班可無庸增減而附屬擬於春季開三教室秋季添高等小學不得不增加經費若此時不言須來年冬季方可說話過少不夠用過多又恐他人艷羨致起合併問題且恐官廳亦未必答應躊躇至夜二時方將兩份預算膽好覺詳稿措詞頗難圓轉寢而思之今日上午復握管搆思至十二時脫稿余在此間帶辦文牘之成績以爭膳費及此次擴充附屬兩稿爲最佳均值無可置喙之時而侃侃陳詞言之成理使人不能不從戲謂諸先生曰今日可飲酒矣陪北萱先生飲談次謂無錫學界最不平者爲女學生之學費大於男學生而女教員之修金則小於男教員使此次而能如願以償各校必受影響有功於女學前途不少下午將各稿加封送署

民國五年一月二日午後往黃淡如先生處因迭次催余往也先生於政界情形不甚熟悉故所言均難辦到蓋招師範一級省署批准有案現在財政困難在官廳之意恨不能使停止不辦耳若再自請改辦高等小學即是自討沒趣不啻促斯校之死余從前冀有替人誓不戀棧今則如大總統之騎虎不下不能復顧誓言看學務科主者意亦以此校爲可有可無時局如此財政困難如此只可順勢做去使果時局變動隨各校俱停亦堂堂冕心安理得一月六日運動會評語今日正式發表以知事名義行文飭知并附獎狀一紙此事應歸功師範生又另文飭知改元洪憲不稱民國亦不稱帝國但稱洪憲元年此舉讀徧廿四史無從尋起欲做皇帝則竟皇帝耳何必遮遮掩掩以示嘗試如以爲大局不穩則并年號不改可也如以爲力能左右全國則稱皇帝稱某某帝國洪憲元年可也不稱國則不啻無國無國安有皇帝又安有年號楊度盡利令智昏鬧此種笑話留我國歷史之恥辱真萬死不足蔽辜時報仍稱民國五年余日留心看之近來報紙消息甚冷淡郵信又須拆閱人如坐甕中無一線光

一月二十一日少純先生來擬請葛循儀往任女學管理兼課每週十五時年俸銀九十元余卽以前日彬生先生所言對倘該處可成似乎近便伊繼問王佩莘如何余答今日不及定奪明日函復可也伊卽去旋問之循儀答須商之家中是亦正道但以余觀之現在人請不去將來必致無人過問讀書自娛不求聞達恐此福未易修到卽余家計亦不過難憶第一年在補公時月修僅十元每週授課三十時初嫌其難長兄曰農人日出而作日入而息一日有十二時汝等每日五時已嫌吃苦耶又曰吾輩商人資格最老任事最忙者每月俸錢不過七八千讀書人畢竟得錢較易余不敢與爭任事五年以主人之誠亦不忍舍去每年均有友人函招他往必詳書所

以不能遽去之理由爲覆卽如本年鑿遠先生兩函招往同里許東修葺甚豐余以該處未必卽少此人而此間則諸待布置者輒於去就與執一不變均足令人灰心試就無錫學界言之凡起初多人羅致一再不往及後連年賦閒欲覓一枝棲而不得者實繁有徒俗所謂脫氣也諸人方畢業卽有人延請正氣盛之時不可使脫將來當思余言若志在轉學不妨姑訂半年合同以觀時變時勢太平卽可以束修所入供給學費苟半年中成績優良人必稱誦至欲轉學人必不加強留且以爲有志可敬此等處非言語所能盡達必閱歷已深方能知也

二月六日孫子頌陀多閱歷能詩好遊余亦喜從之去年遊廬山以舊歷正月四日出發本年有預約擬探鄧尉梅繼以無遊侶乃改議遊鎮江之焦山胡子汀鷺胡子頌銘願從約今日同乘上午十時五十分鐘車西行迨五時五十分抵鎮江步行至江口宿萬憶樓旅館黃昏偕往蓋舞台聽戲聽客滿座未聞有口角鬥毆軍民衝突之事蘇州獨以防務重要一切禁止之致市面瀟條幾無生氣豈地爲省會不可與鎮江等埠一例推耶抑治有寬嚴李廣程不識之主旨不同鄭子產子太叔之所見各異耶

二月七日昨雨傘晴皮鞋已濕且延及襪之前半乃往購鞋及返寓孫君等已在酒樓手招登樓舉云船已雇定約價銀一元二角遂同返寓旋至江邊登舟舟子以今日爲舊歷正月初五第一次開行祀神放爆竹鳴金思之大有科舉時赴甯鄉試試船放江情形日暖風微東望焦山一角如拱立相迎聚譚甚快約行一時許抵山麓泊舟登岸爲定慧寺當門一彌勒佛甚偉旁一聯云眼前皆是有緣人相近相親怎不滿腔歡喜世上儘多難耐事自作自受何妨大肚包容入門匆匆卽出見瘦鶴銘碑嵌壁間另有中流砥柱四大字爲十三齡童書以未帶鉛筆所見均忘其姓氏折而西沿山見石上題名甚夥凡在二十年前者卽多剝落夫其人尙名公鉅卿或文

章經濟卓然於時雖附其名於山而名不能與山俱永若吾輩碌碌今日在山今日已無人知遺論他年是亦人
生之可慨者也所至僧房均以茶草客客給以銀一二角不等畫有彭剛直之梅及僧人某之竹均奇偉聯則以
集句爲佳如灤平兩岸關江上數峯青極巖貼自然登山顛地平均半畝有大砲二一北向揚州方面一南與象
山對峙危樓高聳登樓則風帆上下沙鳥迴翔俯視若去地千百尺誠大觀也山東北復有一小山在江中徧山
皆白色如積鳥矢無數其上故俗稱鳥矢山定慧寺之東爲松寥閣據一山之勝遊者必登之始快僧人名治泉
東台人年三十餘酬應甚工出示畫一小幅爲近人臨本并尺頁數方則臆鼎也均惡劣不堪入目蓋以余等爲
俗客故以俗物示之唐突太過未免與人難堪北萱先生索紙謂欲作畫僧卽唯唯旋出紙筆畫具并問客如裹
腹麵與飯俱可因索麵僧卽令人備麵且出手卷一則珍品也閱竟麵至有碟八小碗四膝以酒兩壺余與孫君
盡之菜甚潔可口繼胡君汀鸞作焦山圖一角孫子題兩絕句有試問此行何所得江山一幅壓歸裝蓋定計畫
成卽懷之歸不與白眼僧聯香火緣也下午三時畢給酒麵資銀兩元四角辭僧出至海西菴余購焦山志正續
十冊銀兩元楊椒山集四冊銀五角胡君頌銘則購石刻之彭剛直梅米南宮字海西菴卽阮文達公元藏書所
僧出石盆一中儲石子四枚有天然之老人美女帆船等形亦文達物盆四周刻隸書舟人以風急促歸未細觀
登舟挂帆行風緊舟側欲覆濁浪掀天余攀舷坐舟子譏笑自若有昏昏入睡者天下事惟習則夷險一節舟人
習於風濤故處之怡然余則抵岸若慶更生入旅館少坐隨同人出就晚餐轉入與新舞台觀劇

三月六日晨起檢出陸鉅石陳其年吳錫麒駢文三種張問陶詩一部以手巾一方包之來校至新市橋私塾教
師之投攷者絡繹於道見余雜廁其中以爲亦個中人也相與心非而目笑之蓋此次攷試不准攜帶書籍尋疑

余未知攷試規則余初不覺後見笑余者衆方知人猜測之誤心中不覺暗笑抵校北護汀驚兩先生已起正擬往觀點名卽三人同行至則各烘先生均徘徊門外少頃知事堂皇坐警備隊分列兩行書記唱名給卷宛如科舉時代之縣試退往崇安寺食點心畢兩先生往遊梅園余返校

三月十三日木匠裝坐板及欄干廊柱五枚大小不一且一方而四圓頗覺刺目令用薄板加之使方此法得自頤和園石船上之木柱價廉而工省乃匠人不顧門面缺下半截未方并急不及待草草完工欲去令修一年級桌椅亦不肯余卽聽之去告以價尙未清余當另喚他匠爲之也未幾匠頭來允越日補作

三月二十二日閱葛循儀日記鄉村宜多種樹夏可蔽日余意種他樹費昂不易成長惟楊樹一扞卽活可令校役爲之又河遠不可無井開一土井上略築瓦所費想亦無幾惟當照顧學生俾免危險若甚難耳吾人終不可存五日京兆之思雖非久居其地略爲布置亦足留後人紀念召伯之有甘棠韓子之譽嘉樹古君子之用心大抵然也又王陽明先生貶龍場驛忘其所居爲蠻煙瘴雨之鄉并忘其爲貴官達人常集蠻人子弟而教督之身爲之師吾人居一種不開化之地方能感化之使知禮讓雖不足與古人比烈亦庶幾讀過古書見解異於庸俗苟幸而有效則其自慰自快之心更難言喻雖南面王不與易也

三月三十日晚間閱薛毅日記覺管理教授均有見地某某日記似於人情世故尙欠通達如做書架豈可不先與講明式樣價目而一任該匠爲之哉對學生一味嚴厲至學生反抗則又無法處置據伊日記常有今日稍安靜云云則是學生未嘗無畏懼先生之意但先生實自己手段劣耳大約對於學生功課不可在一時間責其有若何進步而管理則無時可以或懈非必終日責罵而後謂之管理也時不離學生左右能弭禍於未萌斯爲

管理之善者一星期功課各任三日外人觀之卽以爲教員儉急宜改變否則視學報告必有警議余常謂二人均深自要好但尙未知要好方法耳

四月九日閱同學日記知葛循儀近况擬函告一切忽忽未果校長有管理經費之責偶遇缺乏卽應籌墊如本校亦然惟必先期籌劃時刻在心支款之可緩者緩之收入之可提前者提前之有錢到手卽應將支款擇要付給不可任意延欠致愈積愈多清償不易又管理學校與管理家庭同應顧惜門面無論如何窘迫縣署之經費不到期不可住取也逐月應付房租已到期者不可延欠也其餘如教員修金略緩數日未嘗不可若積欠不清亦非道理之正要之責任所在無一處可以偷懶亦無一處可以不用心葛之處境余聞而大快蓋喫一番苦卽多一番經歷將來於辦事一方面或稍有把握至於該校暫時拮据將來定有了結斷不使校長賠錢也儘可放心余在此間墊款最多最險最困難之時莫如二次革命南京已失守應領之款縣署措不給發各家均預備收拾逃難校中火食已不繼後向友索得舊債十元爲校中半個月開支然逐日與友朋談天未嘗戚戚於心也卽如本年幾日日愁窮一種暗中盤算挪東補西之方法前後用盡而未以告人今日如不向附屬收取學費則會計室已無一錢過夜想各同學均未知也

四月十八日今日地方頗安靖無所聞見課畢因天熱悶人至車站觀新到各軍時均露營於前運動場及歸見三月分報銷縣批彼等均以余爲可欺憤憤提筆屬稿與辯至二時方畢

詳爲奉批愧悚謹陳辦理失當情形請予撤任懲戒事竊校長於本月十四日詳送五年三月份收支報告清摺請予核銷奉批詳摺閱悉所開各款均尙核實應准核銷惟該校教員顧藝菊等均係該校師範畢業生照自費

生待遇亦應服務三年何以所支薪水與他教員無殊該教員等更事未多遽受優薪亦非該教員等之福應由該校長酌量情形勸令該教員等分別核減以免物議等因仰兗縣長尊重教育擇節學款之至意惟本校實在情形及從前經過歷史縣長蒞任伊始或未周知校長不德繼棧五年所經種種有不敢估過而仍不能已於言者敬爲我縣長陳之查本校開始於民國元年維時黃龍驤氏爲校長所聘教員如某某等均一時之望且爲本校之發起人學監女教員均爲某女學師範畢業生校長謬承推許時忝任國文教員所支薪俸比較獨優餘均含有半盡義務性質例如某君以他校教員兼任本校教科每周三時月支俸銀七元某某兩女士以私立師範畢業生對於地方無服務之必要尙能勉盡熱誠月支俸銀二十元東修過薄卽無以維繫高賢理論雖長或不能見諸事實今本校畢業生顧藝菊任體操樂歌習字每週七時月支俸銀十一元二角馮懿瑾等任課較少支俸亦減誠如鈞批更事不多未能遽與優薪然在校長惟知以教科爲重苟能勝任其爲教員則一應受學校同等之待遇至薪之果優與否校長疎於計學第知授課三時支銀七元授課七時應支銀十六元三角有奇今支銀十一元二角於受授之間似已斟酌人情公私兼顧况日常駐校於學校學生各方面均獲益無形較之兼任教員時常缺席者其得失不可以道里計此校長對於延聘教員未先期請示辦理并未詳攷師範生服務規程於年限外究竟有無限制支給薪俸之明文而應請懲戒者也至開辦附屬小學尤校長之過而爲今大教育家所不能諒者查本校開辦附屬小學始於民國三年秋季延省立第二女子師範講習科畢業生楊敬勤爲主事私立祝羣女學畢業生汪克明爲教員計一教室學生三十餘人除去師範生實習九時兩教師每週僅授課二十小時月支俸銀二十五元平均每週一時月支俸銀一元二角五分女教員缺乏省校師範生任事屬縣兼有

服務性質又承各該校校長念縣費困難一再懇懇始肯屈就楚材晉用終覺不安於位借才異地蓋又如彼其難也今本校師範生孫汝舟等在附屬小學服務者每週一小時月支俸銀八角較之從前教師所受辛俸僅及三分之一且級任費未列主事一職亦由校長兼攝不另支俸其所以不辭勞怨犧牲一身者誠以平時教導學生常持勤慎廉介主義不以空言爲炫耀本身作則冀以挽回薄俗不意縣長猶有受俸過優非該教員等之福之批校長不才竊以爲此實一己之過平時暗於世故自誤誤人致該教員等無多取之心有傷廉之謂至現在所支之俸既奉鈞批指爲過優應如何核減校長實無前例可師并無章程可以採用惟有呈繳鈞署第三科商承前知事與校長協訂條約并延聘該教員等存校之應聘書計共十二紙請予撤銷另訂賢能以爲校長不明職權者戒并請即時委員接替以便束裝回籍省親并乞現准暫時離校事商請舊教師維持聽候懲戒再附屬小學虧銀九十二元五角六分三厘鈞批令設法撙節彌補將來能否撙節彌補未敢預知然其所以致虧之由則有可以言者查該校創辦之初僅有學生三十餘人所領臨時費銀六十二元置備課桌椅黑板僅敷一教室之用此後逐年添設均未請領臨時費本屆鈞署爲製附屬預算係按照上年度學生人數支配除收入學費抵支外僅予月領銀三十九元不意一月份開學學生驟增至九十二人近以停止私塾學生復有加無已本月已逾百人所租民房面積有限不得不分作三教室種種設備所費不貲照現在預算年領經費銀四百六十八元又預算收入學費銀一百八十七元共銀六百四十八元以三教室分配每教室僅佔銀二百十六元連臨時費在內較本市經費最短之校恐尙不止此數是否有當理合詳請鈞鑒（下略）

四月二十日上午第三時師範授算術畢孫卿保三兩先生均在座致挽留留意並問所以辭職之故余曰余亦不

知所以然彼此大笑留食午飯去下午約學監裘先生並師範附屬任教各同事託維持現狀外部託汀鷺先生所有書籍衣服並緊要物件收拾兩箱令聽差送歸汝舟因乃姪喜事旋里囑轉告若英孟錄如無事可於星期一到校

四月廿二日晨起出門聞趙子安君談各典舖已暗停質當市面蕭條民間不能舉火者多現象頗不佳至勸學所閱報忽孫旸香君來云高橋下滿河均兵船心即因之而慌乘車出光復門遇沈錫鈞君所言與孫君同抵車站無所見聞回至吉祥橋遇過接三先生高涵叔同學伊等往電燈廠探信息余亦隨往適顧仲滋家文郎自廠出云在校諸同學已心慌萬分頃往余家有所商量余曰少待即返校旋即出見敗兵三五入城衣履不全狀頗狼狽據人云此項兵士爲馮上將所統之禁衛軍今日用輪船兩艘拖船十隻運往青陽防守不意尚未登岸江陰軍即開鎗轟擊致船隻輜重盡被掠去全軍覆沒得生還者甚少於是知事機果迫矣即回至校中是日爲星期宿舍學生僅二十人默坐無善策鄒氏姊丈來以蘭蓀甥女在靖江爲慮高涵叔來此時外間盛傳蘇軍往攻吳江者亦大敗二人去四弟大姪至云家中擬明日徙居上海余意上海非安樂土不得已擇要往一二人餘俟實在無可如何時就近往鄉暫避大姪歸四弟尙在對門王鈺亭處問病忽槍聲起於北郊急出門探視見入城者如潮湧四弟復趕往城外守店余即令聽差將校門關閉少頃聞門外有人聲勢似稍定即啓門探視知城門已閉街中談者紛紛莫衷一是然秩序尙好即託汀鷺先生送楊婉英丁靜慎歸余送荷芬桂芬歸餘均在城共十三人晚飯食不下咽槍聲絡繹繼以礮聲至夜兩點鐘始止如城破擬令登屋入附屬第一教室後夾弄內暫避地甚僻可以無虞放心雖急尙不致十分倉皇

四月廿四日吳江已取銷獨立北查¹先生於午時到城談笑終日若慶更生今日火車已通徙家者紛紛發汝舟
藝菊信并發靖江蘭蓀信接縣署第二〇六號批該校長任事五年備極艱辛人所共知前批原令該校長酌量
情形現既據該校長於授受之間已斟酌人情公私兼顧是該校長既斟酌於先應准照舊辦理至所請辭職一
節辭句之間該校長恐有誤會且既與錢科員訂立合同年限未滿亦難遽然遠引現值時局多故該校長尤應
共體時艱力持初衷毋萌去志是爲至要所呈條約應聘書共十二紙仍發還此批

四月卅日日前購馮林一行書小軸今日周蓮甫先生來言周維之父在山東味雲幕有友人欲購以送禮託向
余轉購此幅確係真迹且單款一時兌購頗難以情誼難却許之下午往家中取來瞻玩一過物經收職卽如舊
友不忍其遽去也明許右史牡丹一軸肯出三十元惟聞購去後須割除原款易寫宋元人款以博重利則未之
允蓋余藏此物爲無錫鄉先輩留一貞迹於世若有人購去珍藏則楚人得之楚人失之天地間物正不必藏於
一家又一經兵亂或化爲煙雲然我盡我心天下事大抵如此凡力能保護時須保護之也使余不知其購去割
款則亦與之矣知之覺良心上有所不安耳

五月十三日孫卿先生來商可否將現在預科延長一年至來年秋季爲本科一年開始余曰此事應待後賢主
政惟程度深淺從無一定標準就實言之多一年卽多一年進步於學生方面亦無不可但來日方長五年已
覺太久女子有種種窒礙中途退學者必多若延至六年恐時屆畢業學生已少若晨星現在對於學生亦無從
說起語必根據法律使果如尊旨宣布苟學生家屬執章程羣起反對余實不能自圓其說別時約黃昏再談近
來人心太險自全之策甚少思之慨然黃昏孫卿先生果至首言布置各校校長新人選次言此間事仍須拜託

云云旋出合同二紙余曰去夏以不能勝任力辭君慮以爲辭將畢業未便遽易生手故勉強敷衍至冬季又請退避賢路君以爲各校均無更動一時不得相當之人囑候開辦半年預料後大局相定再請他人繼任今所言之人均未接事正可羅致伊問余何人可以接手告以某某等即閣下從前所提出者也伊曰某當留以有待此校與各市鄉均有關係欲求得各市鄉之同意甚難再三欲將合同留校強爲納入囊中送至門外約日後再談五月十六日上午觀若英授算術條例井然講解誠懇及後在第二教室監溫課擇要發問并命造句能者居多數足徵進步之速天下無真是非可歎

五月十七日本校無臨時費故購辦校具均按月報銷檢查不易屬陳君植庭另騰一簾分三層上層爲物之名稱及件數中層爲價格下層爲置辦年月以便交代共計有一千元之譜人家之家具亦然逐漸購辦則不覺其費之鉅也友人多來省余似有慰藉意情實可感但不爲校長即可寬其責任有何不快戲謂之曰諸君應於前月廿二夜來或曰某小學擬延任教席恐不肯屈就余曰此又非知余者苟其校不以開會爲能事雖至困苦之處余亦願就惟環顧無錫全市無此合式之校耳

五月十八日過縣署前見景雲市公民訴學務員楊君浮吞學款批亦係某君手筆中有查該學務員浮吞屬實本應撤懲但詢之縣視學一時尙無相當之人接替該公民等究竟有無公民資格何喜訟乃爾必非安分之徒等語此種不通之批尙高挂照壁可爲胆大既稱浮吞屬實何又責備公民詢之縣視學云云顯係徇情包庇一市之大謂不得相當之人豈以能浮吞者爲相當耶况公民資格得之甚易四萬萬人中除犯罪概奪公權外卽竊賊亦公民也此卽所謂欺鄉下人語耳年少氣盛佔便宜遂以爲無往不可古人所以讀書尤貴養氣某君

之氣虧氣也未足與言聖人之道

五月廿二日本校始於民國元年故事事與民國之國運相似馮將軍在南京調和南北其難與余今日之代留教員同日復一日終無結果將來不知至若何地位而止前數日以爲均可就緒乃今則各人意旨已大半披露幸余見機而作無意戀棧否則如蕪菊之堅決余亦無如之何也名爲技能科在女校較男校爲難有非女教員不可之意苟有志就學力求深造有真實之學問無普通體操教員之習氣亦本校之光但時世如此從何說起請校長請教員高談教育亦姑作如是想耳

五月廿三日上午閱葛循儀日記半本覺文較去年明暢惟喜用夫字記事文尙不相宜卽爲除去之克明來延余教該校國文此事議已數日因該校教員半屬相知有佔人位置之嫌未允外人不察常疑爲不肯小就其實俗語所謂蘆菲上跌倒地下地爬爬到蘆菲上有何區別旋卽簽押惟年級未註明俟後再定

五月廿四日今日蘊珍耀瑛來聞人云耀瑛曾至東亭訪辭毅伊等離校後同學感情甚好卽是學校之興發氣象現望留校任事同學將來遇同學至依然留餐留宿結一無形之同學會余雖去有可使本校發達之機會必仍加贊助也

五月廿八日上午在校代人作薦書情節甚多并約儘上午告成故未往外華君少純來命若英簽字午後往大姊處因母親在彼命余往也匆匆卽返校隨北萱汀鸞往西門吊鄧傳若夫人之喪順道至慧山遊過馬貞女墓覺一弱女子亦居然千古吾輩碌碌數十年後卽無知者人貴有以自處以不讀書不識字之女子能明於禮義若此可敬也今則廉恥道喪士大夫且不知名節爲何物欲求如數十年前之善良風俗恐及余身已不能見矣

五月卅日近日政局仍在醞釀中故報紙亦無新鮮事可見顧洪渠國文進步甚少而算術獨清楚晚飯後顧君子靜來談學監事據稱預算師範若干元附屬若干元所收學費在外較現在規定經費核算多七百六十元學監孫卿保三兩君合薦劉某其餘尚有數人即從前屢薦余未接受者頗難定奪云在余則引退之時機恰合且人無閒言足留去思并強項之名人頗稱之亦足豪也希望將來附屬能擴充俾高小班日益發達一切照縣立男高小辦法鄉間女學生就學有所不受私校之婪索則忘本校者愈忌而愈不能立足庶足以償余願矣天熱在梧桐下改課作惜新植發葉不多因言及十年樹木百年樹人之實非虛語且後之人未知能愛惜吾樹否北萱戲言曰吾爲汝銘於樹梧桐兩株程子所蒔摧折權殃伐之則死余曰若學生能作此四句則饒有天趣余卽銘之於樹矣惜吾輩爲先生似尙嫌俗做先生所以不如做學生容易見長也

六月四日余姊知余幼時喜食糯米物以爲年長亦然自來此校每年端午必饋余角黍數十枚今晨吾甥偕一婢來時適朝粥卽分而食之亦應時物也余食粽喜食豆粽不喜食肉粽食糕喜食黃糖糕不喜食白糖糕殆所謂與俗殊酸鹹者也舊同學照相昨已往催言明添印二十張今日天雨未能曬乾明晨先送數張來便在鄉者帶歸於右角寫小字一方文曰丙辰端午前五日師範同人以蠶假集母校共十八人合裝師志成得十九人攝影以爲紀念字之劣無過於余今日則親書之并爲欽若姪書扇跋曰錄隨園詩話字亦類隨園誠恨事也六月七日阿荅做夏衣欲白色旁人均謂青色者宜故買青色所有用款由余個人念其孤苦略周恤之伊尙不知物力之艱若吾輩應格外優待者卽如伊今日自開一單令根培送來云欲買臨帖及烏龍水筆吾輩自考試時用過烏龍水後二十年來未曾買此種貴筆伊斗大之字能識幾個居然欲用此種筆其無心肝可知且所開

之單僅九字別者有六天下不能太平卽此種人成之北京師範招考家事技藝專修科前在競志見過章程科目均欠切實惟中國人做事向來不從實質上着想而北京風氣爲尤甚嘗見北方諸省之女教員文字多半不甚通順而風頭獨健北京師範尤占優勝畢業後所至歡迎故如謝樹英倪咏絮輩去亦無妨既可一覽北數省風景且於各種科學略事溫理年幼來日方長必不虞半途中止學成而後當不弱人只要不脫現在樸素氣象定能爲本校光蓋北京學校之學生貴族居多數裝束與上海無異識者早已憂之吾南人而無南人浮華氣象人必心許而欽敬惇五似研究國文英文爲宜現在程度略高之學校各科均用英文苟時局大定學校必日盛能教程度稍高之女教員必異常缺乏三年之病七年之艾宜儲之於先藝菊專學體操亦鑒於現在各校所需要計亦良得但不可不於暇時自己研究國文英文等課因現在一般體操教員於文學實相去太遠總之能獨具一種見解不與庸庸者同流合汙未有不出人頭地者也

六月八日汝舟合同余以爲已簽字乃今日乃兄來仍然未簽并決意將合同還去余思如余爲校長則汝舟不肯另有他人承乏亦不必強人所難但子靜則一定請何人担任卽未可另以他人紹介現在各人宗旨已定亦未必肯留如汝舟不肯勢必請一外邊人將來如不能合作附屬勢必拆台故孟錄之體操唱歌尙須強爲挽留若裘先生則余不屈留因將來師範學監一職頗不易任子靜來自男校男校對內對外學監分去校長責任之半若以男校例女校豈非大謬在彼無論何事以爲此學監所宜做也處處不接洽而學監苦矣前聞薛某頗有意於此席又聞學務科往第一二師範聘畢業生來任學監辦事之荒謬思之實堪髮指對於本校畢業生處處苛求責備無半點保護之意對於外人則不勝欽敬此實與本校畢業生莫大恥辱余所以謂附屬宜維持者

無非欲一顯同學之能力附屬辦好地方自有公論我畢業諸同人之恥辱雪矣故下學期肯任附屬課者實幫全體之忙其餘就學於外力求深造者亦幫全體之忙總之能博得將來地方輿論調縣立師範第一屆畢業生學問品行實在不壞辦事才及識見超出尋常萬萬則中庭草木亦與有榮施豈特二十個人已哉

六月十四日今日新無錫報登載本校招生廣告開明所招者爲本科一年生余爲現在之預科幸蓋縣署對予種種非難今日已解決其一矣北萱因商會事忙與裘先生換上課時間并請假一時余即乘便攷算術兩題覺現在預科程度雖不甚高亦未可謂十分惡劣性情忠厚者多苟將來管理之得當成績必可觀也下午如山奉代汝舟簽字并言設半年後請代須責成余負責余既有言在前允之

六月十八日文章貴通通者非僅詞句間無疵病即用意亦須處處想到令人無指摘處今日往觀某校見高等級綴法成績題爲慰同學丁內艱書中有登堂拜母既受訓戒之詞復荷果餌之賜子之同學何等客氣有何不是須受訓戒至驟聞噩耗如失怙恃尤須重責手掌人死其母而謂如己之死父死母天下安貴此種忤逆兒子使學生作此尙當指其謬點况出於先生之改筆耶天下實多妄人國文亦日壞一日至於學界之品評全係耳食更不足憑矣

六月二十日近來報紙沈悶與前月同黨見省見恐仍不能盡淚哀死黎繼轉禍爲福實千載一時之機會若再不革面洗心從此萬劫不復中國亡矣時報新山歌甚好文章貴有興趣以此教小學生較讀課書一首得益萬倍惜乎爲功令所限不能自由教授也

六月廿二日晨起問陳媽裘先生是否已愈若未愈宜延醫診治伊答已愈故遂置之後聞仍未清楚明日無論

如何必爲請醫服藥作客在外惟病爲最苦衆多人於一校校長之干係亦惟以師生之疾病及校外之風紀校內之水火等患爲最重再閱一月可脫然無累矣閱通祥日記知鄉民之苦然脫粟之飯無油之菜窮鄉僻壤往往如此吾輩尙思念之憫憐之若一般偉人及新學界則以爲此種愚人分宜如是一若彼輩則分宜錦衣玉食構以鄉人爲比例無不笑其迂者閱報知各省仍多內訌一國之大意見各殊宜非旦夕所能平也

六月廿九日上午見汀鷺購婦女雜誌歸閱之中有雲南雜記一篇甚詳爲一女子所記亦天下有心人也下午縫紉兩時改使溫國文適讀蘇長公論養士篇謂智勇才辯之士不可不靡衣玉食以養之否則若輩不甘窮餓天下受其弊矣余以爲長公此論雖奇而實正今日袁死黎繼似國中可從此太平乃廣東則龍李相爭四川則周陳交鬩又湖南北之互相防範山東民軍與張懷芝之衝突滬上海軍之獨立無非思乘時崛起以都督將軍爲畢生靡衣玉食之根基大之如南北新舊之爭小之如無錫校長教員之更動何莫非此物此志故余以爲人不甘退讓甘窮餓則天下太平矣若謂爭內鬪爭約法爭國會將來如願以償豈遂無所爭哉仍非根本的解決也近晚出遊過小竹廬令刻圖章一方每字價四角余曰前與汝三元八角有小洋三角留存汝處可抵付一部份刻價伊卽告余根培如何去索賄伊如何應付前賄不足此次又代刻緘之二字章未付錢云云抑若例所應有無怪從前一行作吏雖約束僕役非常嚴厲而舞弊者如故索賄者如故也若輩誠不可與言矣

七月二日爲仲堪作一書寄友下午外間不能安居代悼五課一時在庭中擬競志放題五個今日見附屬下半年簡章學費書籍費均須預繳膳費每餐加至銀六分計需錢八十餘文師範預繳書籍用品費五元膳費半年九元余叨祖父之蔭家境尙不十分貧寒然深知銀錢之難栽培子女之不易何今之學界中人但知有己不知

有人耶

七月六日本校從前師生四十餘人連校工每星期食米一石三四斗今僅加少數附屬教員學生然師範生未足額且請假者多而每星期食米則加三分之一需兩石左右并人少如此人多亦如此今日挑缸腳者來余留心察之見其將浮面之水出去故遲遲不已余卽返至會計室及水已出盡將真正缸腳入桶肩負以行則重往視之滿担皆糜爛之粥飯也徐媽知之無可推諉稱係內部日剩飯碗頭太多陳媽出余問何人剩飯碗頭伊出不意辯曰師範無人惟附屬小學生略有餘剩余曰然大學言小人之爲不善無所不至如根培徐媽足以當之用刨花水洗墨迹有奇效此亦看日記之好處晚飯後至舊勸學所託蔡蔭階及各友如聞有人往北京轉送一信與余以便爲謝樹英倪咏絮搭伴遇周季梅言今日學監裘先生旋里同學送行有泣者余曰余未之知何閣下消息之靈也伊曰學生歸言之耳

被兵日記

民國十三年甲子農曆十二月十七日滬寧綫客車驟停錫地尙安穩每日有電與寧滬往來惟蘇軍一連駐站及皋橋掘壕布防鄉間稍受損失十九日下午五時余在麗新批發處忽見羣衆向城內奔逃而老北門內各店舖亦紛紛閉門致城內外秩序大亂幸事先信息靈通知無何種危險全係人心浮動所致未幾秩序漸定廿廿三日市面如常廿三日上午接敬堂揚州來電知蘇奉兩軍在鎮江已接觸渠避走江北擬改道回錫同時上行車只能開至丹陽以下之陵口外間卽傳丹陽已有奉軍等語往車站觀望惟見滬來兵車絡繹不絕終日西

行約有三四千之衆並不停留亦遂安之聞蘇州城門緊閉廠中有染司家任蘇城者因不能入城原車折回黃昏因頭痛早臥廿四晨痛止到崇安寺啜茗兼買過年小菜近午擬到批發處驅車出光復門見人如潮湧車夫棄車即逃余尙立一刻鐘之久被擠不得入城旋聞大洋橋一帶已有鎗聲逃者亦稍稀林知事帶警出城余返身入城城門瞬息卽下鍵各處均有柵門恐行路被阻擬走打鐵橋大街中途聞松茂祥左近亦起鎗聲知城中已混入兵匪卽走裏黃泥橋職業學堂等處到家午飯在城人心較定飯後到崇安寺聞城內獲土匪一已解水警廳審辦潰兵三則解除武裝另由商團處置在崇安寺遇城外相識多人均避難入城問知馬路一帶及北柵口廣勤區有多數商店被搶行人亦間有被剝衣服劫去銀錢者幸未傷人六時有三旅長入城約各公園在縣署開議索款十五萬元每旅五萬時余等均在公園用電話探聽城外消息據答馬路及後竹場一帶均爲兵士盤踞前竹場及北大街則有商團把守兵士所在常聞鎗聲究竟秩序如何亦無從得知也此次較從前澄錫之役人人胆氣稍壯如若輩志在錢帛家非素封雖搶亦不及也故廿四晚同人退出公園後仍往聚樂園羣飲而散歸途遇貽孫弟交來趙頌眉寄我銀念元並書一封知純安已安然抵里爲之一慰到家無事作書復趙未知明日情形何如恐航船亦不能如常通行急景凋年復遭此意外之變人民受苦實深久未見滬報消息異常沉悶聞鄰人言光復門外馬路火起出視紅光燭天鎗聲不絕至天明止麗新廠夥友六七人昏黑中逃至南門通電進城謂批發處亦在劫中典當衣莊同付一炬東門外典當及華純安家亦被搶電詢麗新廠知亦有兵往搜索無多損失廿五晨七八點鐘鎗聲漸稀出至崇安寺僅茶店開門行人三三兩兩均談夜來事入店尙未坐定見一小兒來尋其父云北水關有兵要混入與商團搏戰正酣語未畢見路人往南奔逃余亦雜人叢中歸見聖

公會門前婦稚塞滿外人一一招待入內到家午飯畢見無何種動靜往市公所探聽消息聞齊雲元已到變兵歸隊擄物即鎗斃陳屍十餘具餘衆索性往榮巷燒搶仍無辦法商團已一律入城布置防城工作城外九餘達昌祥綢號均被掠大約石庫門店舖無一倖免三點鐘時聞齊雲委徐景華爲知事令前知事林公交卸先開五城門恢復交通正驚懼間忽傳奉軍已至常州齊已退兵但究竟如何不能出城一觀適接敬堂在北鄉來電話云擬往塘市暫避是夜仍不能安睡因防城人少城外變兵甚多也此次商團成績優良在外黃泥橋與亂兵相持一夜大街一帶保全實多即退至城內布防余曾遍歷五城門目見商團裝置電網堆砌土石勞苦功高可敬可泣丁茲亂世欲求自衛應工有工團學有學團農有農團庶有互助不受兵匪蹂躪廿五一夜居然安臥無驚廿六日晨聞齊退蘇州盧香亭兵至錫站驅蘇軍向泉橋前棧抵禦奉軍徐知事傳軍事當局意迫人民開城恢復交通一時人心大震既懼戰禍之必不能免又鑒於城外各方糜爛恐全城將爲之續繼聞盧實未至徐膺知事則確命地方各公團將縣印送無錫飯店徐辦公處接受徐眷屬本居城中各公團應負現在及將來保護之責城門可暫不開放約九時許遂印出城同時北門外商團入城并昇有各銀行錢莊現款若干備發城區軍警餉項下午聞洛社到有西來車三節旋即折回係奉軍偵探云云城外仍時有鎗聲四鄉被災者東亭羊尖張涇橋榮巷等處數十里內幾無完土入夜孟淵旅社弄內又火係典當被搶約共焚屋數十間二十七日晨聞徐知事仍意在開城自西門入假座四鄉公所與紳民洽議華藝老爲民請命向徐屈膝各紳繼之放聲大哭徐爲揮淚始允三日後待城外秩序恢復再行開放某軍受地方供應担任維持北塘治安是日竟縱軍大掠每入一典當輕輻熟悉取贖包以去贖包者包中皆皮衣外掛一太陽形之標簽非業此者不知也而此項匪兵自江浙軍興

飽掠已慣故知之典墓所在多半偏僻則取電話用戶名簿爲向導致無一遺漏凡居戶之裝有電話者卽精神富亦同歸於盡矣避難者搜沒其包裹外且剝去皮衣自城上望之歷歷如繪知出城萬難倖免也是夜偶聞鎗聲無他驚恐二十八日晨見九餘學徒某據述其父尙在東城外某絲廠該廠堆棧乾繭亦被匪用船載運他去施瑞庭懷鈔四百餘元啓門思遁陡遇二匪礙其長衣搜索以去且鎗擊下體傷重不能行動午飯後外聞風聲驟緊因徐知事傳兵站軍官令索餉三十萬元不則將入城致全城混亂紛紛竄擾家中婦孺倉猝聞全數入壘公會暫避負擔既輕人心亦略定出至公園見消防隊在草場開會人多不知所語云何在茶社稍坐聞索餉三十萬元之議無結果全城現款三萬元亦難籌也又聞奉軍從側面來今夜必接觸入夜仍消息杳然旅滬錫同鄉會有兩輪船抵錫救濟城外難民城中除商團消防隊外又組織自衛團尅日成立軍器以刀棍石灰包等爲主二十九日以小建是日爲除夜齊令籌軍餉三十萬元會議結果各銀行五萬元各錢莊一萬元典業迭遭搶掠損失已鉅未能決議由商團公會長市總董同出見齊先以二萬元塞責并告地方困苦情形至夜二時許始入城夜十時城外大新樓菜館一帶又火至天明始熄是日聞盧香亭軍集中洛社右翼展至西高山堰橋左翼在梅園一帶然均揣測之詞並無確信以西面各鄉鎮電話已被阻不通也上海同鄉會組織救護隊僱輪來錫救婦孺出險今日已第四批開實係各同鄉挂念家室回錫一行至實行救濟與否以無錫紅十字會理事長去滬職員星散各人觀望不前無從接洽下午有匪兵一人混入被商團在大市橋盤獲身穿綢褲三條銀鼠皮袍嗶吱單罩衫不倫不類厥狀可哂身畔有鈔票現洋二百餘元解商團公會轉送警察局核辦徐景華布告謂奉江浙聯軍第一路總司令齊委任縣事以權務甚繁不克兼顧重以地方公推勉出維持一俟繼任有人卽當傑

身引退宋鎮濤布告謂各公園函推爲警察局長誼關桑梓不得不勉起任事等語天雨氣象愁慘乙丑元旦天尙未明卽聞炮聲隆隆傳說不一大約前綫已經接觸中市橋某姓尙放爆竹被警拘辦大市橋西藥店主某全身新衣抱一小兒買花燈玩具歸羣衆注目謂爲太無心肝全城無第二人光復門有匪兵叩城觸電網致斃見者稱快敬堂歸謂由江陰至嚴家橋暫避僧商團入城並未至西塘市下午有各鄉避難者數千人麇集西北門外城中紅十字會員募集年糕十餘担昇往散給公園飯店生意大佳投止者均城外金融界富戶及鐵路人員初二日昨夜較前安靖全夜未聞一鎗聲晨起急出外探聽據林前知事電詢北城外警察第一分所答稱蘇軍傳說會西進十餘里證以夜來情形似屬可信及至崇安寺又聞人言今早開出之紅十字會救濟難民車在安亭被阻該處鐵路已斷似有人截蘇軍歸路等語頃之人言齊變元設席縣署聞喜堂宴在城紳士大約仍爲催索軍餉人情嘖現恐慌時已聞鎗炮聲起西北隅距城約十餘里歸與顧君蘅泉胡君汀鷺王君雲軒飯於王君之鶴巢飲酒排悶出訪周君連府於西城病足家居較吾輩尤苦內外隔絕并道聽塗說而無之顧胡兩君往水泥公司高樓望作戰區歸言一在運河南岸之錢橋一在北岸之皋橋鎗炮聲起處且見有煙塵旋辭周君出過大市橋見市人舉動慌張問知因城外已淪焦土蘇軍官擬入城就浴恐被騷擾繼聞喜堂之宴改設四鄉公所先議籌款初索十萬元繼示讓步除前解二萬外再解八萬地方仍難如命終以五萬元定議本日先解三萬餘以明日爲期當爭議時齊代表李廷玉呂言李闖入都箍達官貴人之腦千百萬立集使非體諒地方區區一城何足固守一小炮轟之足矣華藝老言城外焚掠已空城內僥倖僅免然戶鮮蓋藏可先加刃余頸入戶搜索以明不欺時門內外聞者均髮指李亦匆匆乘輿出徐之縣印此時忽隨帶入城交第一科邑人顧冰生爲保管

謂在城內啓用較使人疑前敵必失利蘇軍後退彼亦將乘隙而遁矣且聞眷屬已先日移居城外云竟夜鎗炮聲不絕各街巷人語聲亦不絕似因久困城中苟得早分勝負即早出火坑也初三日天方拂曉鎗炮聲愈迫愈近似已在西北城外全城人心甚定方幸奉軍至而蘇軍可盡殲也在稅務前聞人言昨夜奉軍會稍卻今復反攻而前是蘇軍實力尙未消滅又以爲懼與王君雲軒訪顧君蘅泉登水泥公司三層樓天霧無所見出至毛梓橋遇商團中人謂奉軍左翼已占勝利自惠山背面入約有一團分三路一自惠山過吳橋一自西弔橋沿城根過老北門進至馬路一自五洞橋經南門趨旗站斷蘇軍歸路昨有邑人張某年二十餘自滬隨紅十字會出發援救家屬在西城外中鎗斃命林知事避居第三師範邑人僉請入署繼續任事至公園聞汽笛聲知蘇軍將遁旋傳消息開車時有最後二輛車中途脫落徐景華及齊暮僚多人均飲彈死已開各車亦被阻東門外軍士紛紛向東逃命包裹物件棄擲滿地至十餘里外不絕警界中人消息齊設司令部於車站左近之鐵路警局即舊漕運局故址昨夜尙傳電匠添裝電燈並飭警局供應火爐夜索肩輿兩乘云往前綫督戰未卜死生何如遂有傳齊已陣亡者一時訛言四起均無確據惟奉軍至吉祥橋有蘇逃兵迎降仍放鎗擊斃謂焚燒劫掠有餘辜警察局鎗斃蘇軍一衣女褲三女襖三長皮袍二絨帽一有新美華牌號均係搶劫得來壽州人約二十餘歲時西門已告肅清北門車站一帶炮火連天據聞中路梟橋及右翼廣勤區仍有蘇軍數千盡力惡戰至下午六時鎗炮聲漸息全城均懸白旗書歡迎二字悉案所有得猪二十八頭羊二頭出城向奉軍犒師自陰曆二十四日閉城起至此凡八日青菜每斤百文一二日後即不復見他物稱是均較平時價貴十倍五城電網今日撤除傳言奉軍馬隊過電網處即不肯前進是否故神其說均不可知初四日消息最覺沈悶惟見奉傷兵進城求治臂

章之濫以此次爲最自衛團也消防隊也商團辦事員也警察所偵緝也並有並非各機關人員無一不臂纏黃色袖章招搖過市至於紅十字會白十字會紅卍字會虛實更不可究詰下午崇安寺有戲法小攤倡家婦女不知兵革之苦盛服出遊地方遂有一種警告并派勸導員若干人挨戶勸告於是勸導員徽章又懸挂胸際頓時街市中多此一種名色之人所謂粉白黛綠果因以絕迹亦足賀也約朋輩四五人登北城樓閒步至南城下城牆最薄處僅容一人行綠光復後城根歸官地局執管凡近熱鬧之處被賣殆盡買者又蓄意侵削致有此現象將來宜一律贖回并浚裏城河卽以浚河泥土挑培其薄處是所望於熱心桑梓者初五日見崇安寺大殿設有第一軍警備司令部開司令爲前水警區長師蘭亭稅務所長水警區長均已易人前水警區長程星三保護地方不遺餘力人有去思謂爲軍界好官云聞北城門開放遂偕朋輩數人出視城外災區見近門處警衛所前設一方桌插大令於爐內兩旁警衛森嚴城外負牆各屋均已拆除瓦礫木材紛棄於地過吊橋至蓮蓉橋折向竹場巷各店舖均有本店被搶停止營業字樣在通匯橋左近見有室如懸磬后来其蘇聯款署六十八歲老百姓汪某道無行人狀極淒慘過通匯橋至馬路兵皆踞地爲炊鍋異常製有兩環可繫以繩昇之行每鍋約容米四五斗竈以鐵板數方連綴而成可隨時裝置拆卸攜帶便利比戶駐兵門外繫馬拾盛餘爲燃料有縫婦一當街爲兵縫補衣物餘均民夫運輸軍需被焚各處頓易向來景象幾難辨認由太平巷走裏黃泥橋過吊橋入城隍廟省政府令縣預借國稅十萬元撥給軍需地方實無餘力一再求減允解六成由縣趕辦印收分百元五十元十元五元向各戶勸認上午時有炮聲下午聞江陰蘇州次第平服城外人歸云昨夜惠山仁裕館火延燒秦園一角及西首錢武肅王祠至香花橋止有軍人二於今午攻門入麗新廠飽餐午飯劫銀錢及夥友衣服去損失約

百數十元初六日雪景象益覺蕭條茶肆因缺煤僅開半日滬報因火車不通被阻地方各報均未出版消息沈悶閒行過城隍廟前見廟內收容西北鄉被災婦孺七百餘人係基督教徒發起城外商店一時不能復業軍士紛向城中購食然來源已斷供不應求思之亦殊危險商會設奉票兌換所令各店收用奉票向之兌換然何如徑向商會兌換現銀再行購物以免小本經紀者疑懼歇業或曰若奉票徑兌現銀恐紛至疊來將無限制必購物而後使用爲數必不多也初七日晨起遇一郵差云昨有奉軍十餘人入郵政總局迫開鐵箱搶去現銀一千餘元包裹無算井人貼鄰生生藥房縱火及大隊奉軍聞警馳救已不知去向至崇安寺喫茶見林知事布告下游蘇州崑山上海已一律解嚴全省大定茶後與朋輩兩人擬往惠山一遊並着戰後情形出北門見第一軍執法處布告正法強姦婦女犯一名沿西城根過吊橋遇西區巡官秦滌新云前途方拉夫駐西郊軍隊將開拔彼井不知城中情形與吾輩不知城外情形同別向西門大街至棉花巷聞鄧君傳若被兵士以鎗柄擊傷君好佛而佛偏不佑亦可慨也凡臨街大宅均駐重兵廳事多馬盤旋蹂躪甚慘在城西小學暫憩商進止校役阻余等行尙躊躇不決西望外弔橋一帶惟見兵馬塞途料難通過卽折回由原路入城遇曹君某供職省公署家住南門亦繞道入城尙衣重裘若不知有兵亂也者爲近日所僅見友有好戲言者謂吾輩今日求死甚易只須入城時將所供大令翻倒謂這是什麼東西當立正典刑及入城有二棺出死者一爲炸彈隊士兵一爲工程營士兵均第一軍受傷後療治無效而死者也後隨荷鋤者亦兵士江浙之戰時值青黃不接邑人慮閉城後人不得食屬分途調查極貧戶口今日余家有販毛骨者某特來尋覓與以米不受要求給養全家無缺怒而斥逐之始去自水關填塞河水不流於汲飲一方已起恐慌今日各關開放始有活水入城然秩序恢復甚難須各鄉航路通

行方可生色各工廠一日不開業千萬工人無從生活大可慮也本地報既不出版滬報亦不至一城斗大沈悶之至初八日光復門開奉軍亦多數開拔往滬人心大定上午往車站經後竹場進城各家均貼被搶字樣流亡未集開市營業恐尙在二三月後縣議會主張開關亮壩使北來船隻直達通匯通運兩橋柵口商民反對謂船不繞道殊於商業有礙今日見有多數工人開始拆除乘逃亡未歸無人阻撓也下午與王君雲軒顧君竟生經北塘過吳橋至惠山各處均閉門下鍵狀極蕭條秦園自紅羊劫後屋都頽廢然如凌虛閣等處猶存舊觀民國光復改建洋房三楹不倫不類見者引以爲憾茲則付之一炬連類而及者如西首沿街各屋並錢武肅王祠均蕩然無遺聞當火起時軍士禁止鳴鑼恐驚其馬匹故無救者入泉亭池已無魚聞均爲軍士取食真所謂殃及池魚矣由北門歸在教育會見正月初四日報初九日與顧君衛泉竟生吳君幹卿出光復門至車站遇見王君師梅據云昨午自海上乘車來沿途阻滯直至夜半始抵錫此來專爲視其夫人柩今日擬搭車返滬尙無定時據述浙軍已退出上海集中松江將來恐不免尙有問題過柵口及後祔街兩處被災最甚十室十空在廠飯聽同事談兩軍激戰時情形驚心動魄比較坐困危城僅聞鎗炮聲者危險百倍普濟橋木行有臨時避入男女二中流彈死女抱一小孩獨無恙豈真死生有命歟過雙河口訪孫君定安家已破形容憔悴幸人口尙安蓋亦在戰綫中也至龍山梢爲蘇軍安放炮位處與皋橋梨花莊相犄角勢尙優惜未慮及奉軍之由山南一帶襲其後也志在搶掠則無意於戰故一敗塗地屍橫遍野尙未掩埋盡淨見鄉人方埋一屍軍服內衣女皮襖兩件人入以爲其死固宜無致惜者衛泉竟生先歸與幹卿登至山顛在送子觀音庵前下入北門已六時門將下鍵到家晚飯將睡忽聞城外火車站左近鎗炮聲齊作火光燭天頓時人心大懼疑有他變婦女小孩紛入聖公會暫

避俱謂戰事如再發生必致全城糜爛無路可生男子往來奔馳探聽消息後知爲通運橋下大吉利旅館奉軍軍械庫失慎人心稍定然巨大之炮聲繁密之鎗聲歷三時之久始漸稀息恐該處劫餘房屋從此將無孑遺而人之死傷尤難想像焉初十日晨起卽偕雲軒出光復門見昨晚所焚軍械在沿運河之鐵路貨棧火車十餘輛並棧屋同遭毀損有皮棉衣服數車云係蘇軍劫掠敗後遺棄奉軍指爲虜獲品者亦悉成破布自邑境被兵人心惶惶有時驚魂略定卽亦安然惟昨夜城鄉均不知所措以爲大禍臨頭蓋事起倉猝不知虛實也

附錄

程君頌嘉行狀

世愚弟戴克寬拜撰

君諱宏遠字頌嘉姓程氏江蘇無錫人系出晉新安太守元譚之後宋紹興間先世自歙遷婺源爲婺源人曾祖光迪祖世芳父登瀛字軼雲母方氏生子四人君其仲也世營木業軼雲公自皖來蘇經商常熟無錫聞家於錫遂轉籍焉君幼而聰穎舉止端莊異常兒天性孝友得堂上歡與其兄祖庚弟祖植祖慶怡怡如也年二十八辛丑歲試入無錫邑庠翌年壬寅科試擢冠多士檄調南菁書院肄業南菁爲大江南北人文淵藪在院諸生多鴻博之士君相與昕夕切劘學業大進逾年厥考棄養君哀毀骨立與諸昆弟料量喪葬悉準諸禮瞿梅梅杖而後起自是家居讀禮并以課徒服闕出應華氏補公兩等小學之聘爲教員及校長者五年繼長蕩口華氏果育小學一年鼎革後迭長本邑女子師範女子職業榮氏女學等校十六年復任職石塘灣高等小學一年上海愛國女學三年綜計前後服務教育三十載瘡口呻吟不辭勞瘁經其造就有成者不下數千百人中以女子師範君繼黃君淡如後爲校長時縣撥經常臨時兩費年不足二千元支持最爲困難然君刻苦奮鬥未嘗稍懈學生成績反爲各校冠以極少之經費收大好之效果卓然有以自立非所謂豪傑之士歟又長該校時以校款支絀膳費規定過非不足營養君輒分己俸每週添肴一二品藉資調劑並督學生更番入廚執爨練習家政厥後教育部始於女校增設烹任課目令行全國不知君已開風氣之先行之有年矣君又令學生於正課外作日記對

於自身之修養校務之良窳及應與應革諸大端皆得昌言無諱君一一爲之批改因之對於校中情況內外洞澈且知學生向學之情緒與平日之勤惰而或推或挽之故收效之捷不可思議邑中名士吳眺庵常於鄉間路隅遇一嚶嚶啜泣流落之女子名阿苓佚其姓挈之來城遍覓寄頓之所而人無應者君聞之慨然領回師校中衣之食之教識字從諸女生習女紅炊事諸役及笄爲嫁某商人與己女歸楊氏者同日嫁君兩處主婚乃舍己女而就阿苓直至阿苓遣嫁完畢始於日晡歸家親友嘖嘖稱異丹徒莊啓傳氏嘗品題錫邑人士謂德行無過程君識者縫之君恆關心鄉邦文獻搜羅先賢事迹尺素寸縑珍如拱璧或攷證其里居廬墓春秋佳日結伴出遊往往臨風憑弔剔苔蘚捫碑碣凡邑乘失載者心誌手紀歸而輯錄於篇又借各家譜牒參攷成寶硯齋筆記若干卷備他日輶軒之採生平交友不濫務以直諒多聞爲主旨幼時讀書虞山與趙古泥王芝塔朱純安三君最莫逆蓋皆金石書畫卓然名家者也三君先卒君感舊傷懷倩名手繪四友圖志之於無錫則如裘葆良華文川曹衡之馮君輝蔡蔭培丁寶書胡汀鸞吳觀岱幹卿孫希俠北堂錢子泉孫卿及常熟蕭蛻庵丹徒謝公展諸君或道德文章或藝術皆名重一時者君無不友之於以知切磋砥礪深得古人擇交之義非苟焉而已旋以家境拂逆喪其長子日照次女學敬蓋皆受過高等教育者中年哀樂之感烏能已已其初別號戲署懺僧謂終日常居教席如僧人之禮懺課經也至是改署罪僧則引佛家輪迴之說今生受諸魔劫由於宿世孽根未淨也繼丁內艱母方太君年逾八十而逝君年已五十有七猶作兒啼擗踊無算哀動閭里喪葬畢遂杜門謝事不復出矣君胸懷恬淡態度安詳生平無疾言遽色與人交初若落落然久之而其味彌永故人皆樂就之在菁校時布衣一襲道貌岸然朋輩戲以程夫子呼之余與同學且同齋舍風雨連牀往往清談至夜午時或一尊陶然彌見

溫克或吸蘭州水菸噓氣成害談興益復颺舉蓋其真率也如此甲子齊廬交闊無錫戒嚴居民相率遠避君處危城晏然自若嘗口占兩絕云迭經憂患已餘生又見潢池盜弄兵歲晚偏多朋友樂同岑相處是危城朱門富貴餘燦肉世亂民貧一飯難等是幾莖菜蕪清腴味勝大官饜素患難行乎患難其涵養功深也又如此君雖與人無忤與世無爭然仗義經經亦有凜然不可犯者尤以維護地方公益最爲盡力邑公園清風茶墅爲士流休憩之所每日昃遠近畢集互論邑政得失有不便於民者僉主力爭推君主稿君審度再三有非爭不可者輒毅然司筆政一稿旣出傳誦全邑諸事賴以匡救者不少無錫新安會館坐落舊金匱縣亮壩地方爲徽州府祁門績溪婺源休甯歙黟六邑旅錫同鄉所公建者也清季忽有人以會館丙舍隣近火車站喧闐不便爲辭主張購地遷徙將所遺基地借資造屋出租收息擅將會館各屋拆去改建大有堆棧僅餘供奉朱子正殿三楹及殿旁餘屋數間夫遷徙殞舍以妥幽靈誠是也而拆卸舊屋借資改建堆棧負債甚鉅得不償失不數年後非將會館屋地全部抵償不可設計之左措施之謬無出其右君迫於水源木本之思不忍坐視同鄉諸先輩締造會館汗血勤勞盡墮於若輩之手遂起而力爭迭稟列憲再接再厲卒獲判令對方租地造屋解除會館負債重累而會館賴以保存常事情緊急時竟有某紳受人央託暮夜餽金冀寢其事君峻拒之絕不爲動事後卒隱其名不傷厚道其磊落光明也又如此君家居數年突患中風神志雖清語言蹇澀跬步必杖以行迨病亟親友往視已不能言微頷而已淹纏四年之久一九三六年八月十四日卽夏曆丙子六月二十八日易簣正寢距生清同治十三年十一月十五日春秋六十有三君一生事業致力於教育最深功亦最鉅綢繆梓福利周濟朋友急難其感人也尤深卒之日弔者大咸有哭失聲者老友王雲軒氏至龕納君位於家朝夕哭之榮氏女校校長榮張

沈芬女士挽詩有盡瘁教育三十載勞苦功高衆所知畫家胡汀鷺氏挽詩有接物能虛己逢公不讓人諸語語無溢美蓋皆紀實也君幼時更有一絕技善挾彈百步外跳躍命中無一失爲隣里兒童所駭服自云此術得之徽籍同鄉戴某某額有創痕忘其名僅以書生目君者猶皮相之見也配黃氏內助稱賢先君十一年卒男子子三日照早歿日勳日省女子子三學禮適楊健年學敬未字卒學勤適華定一孫男二與點與震孫女三申和舜華蘊華生平詩文罕留稿筆記若干卷遭倭亂散佚大半詩僅存十餘首不成卷惜哉孤日勳等以君遺櫬久厝時艱迄未安葬亟爲窆窆之謀以余知君稔乞爲之狀遂不辭繁瑣絮絮述之俟當代銘傳作家之筆削焉謹狀

祭文一

維中華民國二十有五年十月二十三日受業弟子朱祖烈沈光鏞蘇斌威程鎮圻程昌圻程光圻高文海等謹以生芻一束絮酒一觴致祭於

頌嘉夫子之靈曰嗚呼惟吾 夫子邦之彥直敦勵樸學閑邪維則不倦善誘後生作式門牆三千正視不忒遜清之季執經程門瞻前在後言厲貌溫剛經柔史無間朝昏道歸一貫學有委源江河入海無涯渾渾仰之彌高瞻之彌尊所愧不才有負立雪文不成名品乏立節卅年遠教更增頑拙或抗塵俗或勞耕舌猶承憫念途人稱說 夫子厄陳亦嬰覲折茫茫天壤古道掩閉瑰寶蘊積甯受緇涅酒後茶餘傾吐鬱結不識曰狂疇聞風烈杜門却掃晚節更堅課子蒔花亦云樂天圖書盈架左佛右仙旁搜字畫古香孤妍有時入山縱跡古賢臨穴憑弔剔蘇磨甗才人片技忠義殘編馨香寶玩俗慮都捐天詎可問乃不佑善命旣困寒病又輾轉手足不仁痰逆哮喘

喘三載在床愁眉未展一旦云化奄奄忽忽生有自來死歸太空達人早覺無礙寸中生等閒味仰失高風未能
忘恩涕泗則同紙短情長哀念罔窮雲旆來格鑒此丹衷尙饗

祭文二

維中華民國二十有五年十月二十三日女弟子孫汝舟王佩幸錢保真過懿瑾孫錦尙孫若英胡通祥孫孟錄
謝樹英倪詠絮等謹以香花一束玄酒一尊致祭於

頌嘉先生之靈曰嗚呼山頽木壞遽喪吾師厥疾弗瘳天道難知先生爲學博通今古自攝芹芬有聲鬻序先生
敷教善誘循循本身作則春風風人先生持家有條不紊克儉克勤自垂家訓先生接物和而不同周旋濁世清
明在躬先生內行不勝屈指甘旨奉母義方訓子爲嘉品學負笈從遊一堂絃誦幾歷春秋二豎相尋纏綿已久
藥石無靈忽驚撒手平生嗜飲此去疑仙文章道德歿世而傳敬薦先生寒泉秋菊桃李無言同聲一哭尙饗

誄文

頌嘉先生效忠鄉邦誨人不倦垂三十年蓋真能以教育爲樂者余雅重其爲人主上海愛國女學校時每星期
六輒與余及吳眺庵陳仲英丁芸軒仲祐蔡松如諸君相會於一樂天之茶樓風雨無間至今猶留影於腦海中
君故嗜飲歸後數年以家中死喪相繼無好懷益縱酒自遣得痺疾竟不起可哀也已弟裘可桴敬誄

挽詩挽詞

修士潔其魂賢人酷其身趣途各冥莫不與凡類湮寄形宙合中壹是銷其異榮名耀石火所貴不辱親自我識
君年知君魁等偷弱冠連勵志常爲席上珍小心飭佩鱗清望同縶巾恭承畢萬後維是福德因孰云賦大哀吁
嗟生不辰黃泉招骨肉白日百鬼隣越陌復度阡逍遙何處津理數固有盡言之恐焦唇昔歲共海濱杯酒雜笑
噴蒼狗幾朝市君病吾方呻君病塞且噤箝口聊避秦我病有眼耳無益耗精神追思平生歡十有九灰塵俛仰
誠坦然念歸亦成仁行矣暫離別遲我蓮池春 頌嘉老友逝矣弔之以詩意猶未盡也弟蕭退閣

弟行兄能述書來一愴然秋風頻哭寢

肖關
作古

舊雨獨承賢皖水鍾靈秀澄江列誦絃舟車羅典籍經史費探研詩

禮尊衣鉢清高守硯田潛心植桃李餘力覽山川

曾與君同體金
焦北固之勝

賤子論文久英才樂育先卅年桑易海一醉酒如

泉 君蒙
於飲

近市心滋愧安貧志最堅鄉關斷消息床褥訝纏綿祖孫枝茂傳家世德全問君去何處感逝到樽邊

頌嘉先生千古 弟孫肇圻

十年君長我與我最相親接物能虛己逢公不讓人舉杯懷酒德推食感情真始信周公瑾論交勝飲醇

暇日頻相過模糊舌更僵幽幽疾無主格格語難詳握別境猶昨追思淚滿眶五年高臥久睡破管甯牀

意猶未盡更寫數句代奠並系以詩

一盞寒泉菊一枝含毫忍淚薦君時於今又是重陽節相約登高却共誰

頌嘉我兄千古 弟胡 振

少壯詞壇玉屑，寒夢痕卅載，認依稀。栽桃李三千樹，誰識江南老布衣。
龍山高會，幾星霜，正是寒花九月黃。一臥茂陵驚四載，那堪風雨又重陽。

弟張照南

數椽卜築，費精神卅載，論交氣誼真。不啻春風常拂我，比如秋月最懷人。
靜山逝矣，君長別，悵絕浣花哭鄭蘇。知己平生能有幾，那堪凶問一年俱。
飄蕭鶴髮亦星星，隣笛山陽不忍聽。一幅畫圖千點淚，黃花無語慰英靈。

頌嘉抄哥逝世鶴既挽以長聯，悲難自己，復成小幅，綴以三絕，不知涕泗之何從也。通家弟 王鶴

盡瘁教育三十載，勞苦忠誠衆所知。家國殷憂灰壯志，豈徒吾校失名師。

頌嘉先生長榮氏女學校五年勞苦功高，遽爾逝世，謹賦無辭以當哀誄。二十五年九月 梁張浣芬

回首論交三十年，慨君憂患歷時艱。驅車辟召出陽曲，舉盞豪情臥酒泉。
往事何堪聽鄰笛，老懷孰共競先鞭。承賢橋畔黯斜日，一爲沉吟一愴然。

頌嘉先生千古 弟侯鴻鑑

剛直其性藹然，其神磊磊落落，如見高人。

寶松挽頌嘉先生 弟謝公展

皖江壯闊梁溪秀如水交期長久立雪共尊山斗課罷頻呼酒哀時不管容顏瘦斯疾穀君消受人去黃華依舊
一編

淒絕西風吼

調寄桃源憶故人懷僧先生解脫既詩以挽之顧懷舊雨更倚新聲 弟孫頌陀

挽聯

克振宗風迴想河南兩夫子

飽嘗世味自號梁溪一懺僧

世弟楊珍甫

風義最堪思煮酒論文往日神交惟剩我

艱難無可語焚香習靜暮年心事合依僧

世弟孫保圻

講學卅年餘能爲河南衍宗派

遺詩數行墨試從硯北想平生

姻弟張懋績

驚黃梁一夢積門外雪霜半生立教程正叔

惜濁酒三盃澆胸中塊壘千古悲懷劉伯倫

弟顧倬

墨盃澆愁弔影空餘禪俠味

臥病避世倦懷不作亂離人

世弟孫靖圻

守先待後卅年教育著宏施寧得爲罪

朋因證果一切苦惱皆孽債了澈惟僧

冷禦秋

同儕四十人慨霜凋夏綠雹碎春紅懷舊嘆飄零弔影淒涼君又去
落日玄黃劫值隣石停春山陽聞笛悲秋感搖落遭時衰亂我何堪

弟楊壽杓

交聯管鮑誼結朱陳平時問難質疑直諒多聞推益友
繞室芝蘭傳家詩禮今日歸真長別文章道德是完人

姻弟華昌壽

懺悔學高僧病榻纏綿經四載

流離忍失所遺詩誦讀感三秋

弟黃蔚如

絳帳猶存卅載傳經成往事

黃墟無恙幾人黃酒賦招魂

弟曹夢漁

與公會共學澄江馬帳憶傳經桃李門牆宏化育
有弟亦同舟吳會雁行嗟折翼文章星斗黯光芒

弟于小川

一生與教育爲緣興學培材看絳帳傳薪自有成規繼安定
四國以風雅相重茲詩讀畫驅編車會葬豈徒誅筆擅河陽

弟郁馴鹿 吳濂隱

論交早在卅年前爲君童子軍中作認保
感舊迴思十載外約我女學校裏充教員

弟張子惠

同學又同鄉當年仗義爭墩會向雲山追驥尾
立言兼立德此日歸真返璞每聞風雨憾鷄聲

弟胡西麓

情聯桑梓誼切葭莩交契慰三生直而溫如語如箴最難忘酒席言歡病牀話舊
學窺闕閩門盈桃李考終逾六秩士與女或歌或泣洵足稱有功庠序無愧人天

姻弟趙希正

是教育界前輩善誘循循小女昔曾沾化雨

爲公園中茶友清譚娓娓故交今愈感晨星

弟鄒同一

惟君樂育生平看及門立雪不獨鬚眉巾幘廣栽成和氣一團如明道
知我謬稱狷介嘗把酒臨風相傾肝胆前塵難回想傷心雙淚灑季芳

弟沈壽桐

在異學爭鳴時聖教昌明山斗尊崇隆頌望

自文化衰落後儒林隱伏林泉把晤悵無緣

世弟王鏡洲

壯年力學晚歲逍遙恬澹表襟懷飲醪賦詩據逸興
暨陽蜚聲梁溪敷教栽成多俊士守先待後式遺型

弟過永銘

樂育作人桃李春風滿江左

倦勳厭世梧桐秋雨泣梁溪

世弟林錫楨

所謂格物致知心傳克紹伊川學
不爲危言激論行誼無慚有道碑

弟唐漢伯

卅年教育桃李盈門不愧是士林祭酒
滿腹經綸清高邁俗可稱爲鄉里善人

弟龐樹森

講學垂卅年，譽含稱尊。早有令聞馳惠麓。
論交兼一脈，玉樓遽召不堪感。逝憶山陽。

程幹卿

欽君早信輪迴家，子先離末次更名消宿業。
恨我晚聞佛法同，庚後死西方垂引冀。他年

世弟秦執中

令聞著經師，化雨春風卅載栽。成桃李盛
承賢多君子，金昆玉友一時傷。感鶴鶴飛

世弟章康平

菁莪造士械，樸作人畢世辛勤深可佩。
皖水風寒惠山月，冷老成殞謝至堪悲。

弟張帆歐

敬學門前佳話會，傳立雪
承賢橋畔有人景仰高風

世晚張德載

借盃中美酒，滌萬斛愁。凝能效莊周，遼觀
得天下英才宏。卅年教育克承明，道家風

世弟陳獻可

二難俱賢盈室芝蘭推後起

重陽節屆滿城風雨哭先生

弟穆榮卿

數十載道義相交手足情深溯當年諸務承擘畫君嘗心力勞瘁熱忱誰能及猶憶舉盞同斟譚笑互託身後事
千萬言哀思難寫肝腸寸斷痛今日良朋漸凋零我亦疾病纏綿枯淚剩幾何那堪撫棺一慟追隨恐已不多時
全身俠骨滿腹眞忱常以疑事折諸君君能啓我
卅載深交一朝永別若問故知誰益我我愈思君

通家弟王鶴

弟顧竟生

知己一生多酒客詩人畫士

悲秋萬籟寂素車白馬黃花

世姪孫伯亮

惟先生樂育爲懷解脫在新秋邑喪名師盈門桃李無顏色
辱令子方外取友几筵布重九魂依惠籠照眼菜羹不忍看

闕獻之

療俗有藏書五載沉疴不幸文壇權宿將
消愁且縱酒卅年敬教何堪學校失良師

世晚王韻樓

家學有淵源舊文章新教育當年馬帳流風千載薪傳惟一貫
後生循軌轍始依玉繼班荆此際羊哀遇雨兩行珠淚洒重陽

姻姪江導山

三十年化雨春風鬢舍羣欽講席

一兩載琴荒劍老士林頓失導師

晚姚福生

德馨噪澄江追思蠅術傳經絳帳春燈慚立雪

靈光圯魯殿忍看鯉趨銜恤白衣黃菊感新霜

門生高涵叔

憶髻提立雪程門愛逾所生一樣相看愧另眼

忘歲月寄情管樹頷而不視三緘應是欲無言

門生程鎮圻全弟昌圻光圻保圻

憶昔年長侍几席道心久傳深感伊洛春風廣被沐化

嘆吾師遽返泉台遺規安仰從此重陽秋雨倍覺傷神

受業顧毅嘉

立雪記當年絳帳殷勤方媿師恩猶未報

重陽同哭寢黃花悽婉能離濁世卽長生

無錫縣立女子師範第一屆畢業生全體

昔年長校獨濟顛危幸今日絃歌今不輟飲水思源千百輩毋忘先德
息影南城屏棄氛俗痛世途蝸角之多爭凌雲終古二三子空仰遺型

無錫縣立女子中學全體學生

師門受業甥館蒙恩數十年小草相依方欣貳室承歡椿庭不老
花甲逍遙蘭丁馥郁千餘日沉疴不起從此華堂再到嵩嶽誰宗

子婿楊健年

十二年甥館承恩小草無知叨預鯉庭討禮訓
三百里滬江聞訃泰山安仰忍教鶴駕海大秋

子婿華定一

跋

無錫程頌嘉先生卽世後十餘年中經喪亂頻仍迄未爲窀穸之安其孤景溪曾三悲懷風木耿耿於心去冬踵門請撰行狀兼請虞山蕭退閣先生撰墓志銘已皆如命應之於是卜葬有期足慰故人於地下矣君子疾沒世而名不稱古來能垂名於不朽者惟著作耳先生一生務實向不求名非獨生前不屑汲汲於此卽身後之名得稱與否亦何嘗在其腦海中以故有所著述皆直摭胸臆不避忌諱不事藻飾莊諧雜出修短不拘務求達意而止以爲不如是不足適吾自然之性聊以自娛焉耳隨手脫稿隨手散佚絕不作千秋之想偶有存者大都雜之故紙堆中毫不加以管理景溪等乃惓惓於先人手澤不忍其湮沒始爲之搜拾叢殘或另求之親友家中得其一鱗一爪隨時筆錄積之既久遂哀然成帙名曰寶硯齋遺稿余受而讀之覺其所言多有關世道人心間有憤激之辭仍不失忠厚之旨科頭箕踞具見本來面目與優孟衣冠矯揉作態者截然不同嗚呼此頌嘉之所以爲頌嘉也書旣成行將付諸剞劂景溪等有志竟成其孝行誠加人一等矣明德之後必有達人於茲益信爰書其後歸之公元一九五三年九月戴克寬